

उत्तराध्ययनसूत्रम्

.....

Uttarādhyayanasūtram

उत्तराध्ययनसूत्रम्

Uttarādhyañanasūtram

A Jain Canonical Work

Edited

for the use of University Students

BY

R. D. VA DEKAR, M. A.
Professor of Sanskrit and
Allied Languages,
Fergusson College,
Poona-4.

N. V. VAIDYA, M. A.
Professor of Ardhamāgadhi,
Fergusson College,
Poona-4.

POONA

1954

PREFACE

This edition of the Uttaradhyayans-Sutra is specifically intended for the University students of Ardhamagadhi. The text followed is essentially based on the excellent edition of Prof. Jarl Charpentier of Upsala. But as the edition is no longer available and as there is no other good edition of the text available for the last so many years, we are presenting this complete edition of the text only, at a moderate price for the student world. We have corrected a few misprints in Prof. Charpentier's edition and have incorporated a few better readings, as given in Devendra's commentary. We propose to bring out another edition with introduction, The summary of chapters, Index of verses and vocabulary of difficult words and technical terms if possible. We take this opportunity of thanking the management of the Aryabhushan Press for prompt and excellent printing of the book.

Fergusson College,
Poona
26 January 1954.

}

R. D. Vadekar
N. V. Vaidya

॥ विणयसुयं प्रथमं अध्ययनम् ॥

संजोगा विप्पमुक्कस्स अणगारस्स भिक्खुणो ।
विणयं पोउकरिस्सामि आणुपुट्ठि सुणेह मे ॥ १ ॥

आणानिहेसकरे गुरुणमुववायकारण ।
इंगियागारसंपन्ने से विणीए त्ति बुद्धई ॥ २ ॥

आणानिहेसकरे गुरुणमणुववायकारण ।
पडणीए असंबुद्धे अविणीए त्ति बुद्धई ॥ ३ ॥

अहा सुणी पूइकण्णी निक्कसिज्जइ सव्वसो ।
एवं दुस्सीलपडिणीए मुहरी निक्कसिज्जई ॥ ४ ॥

कणकुण्डमं चइत्ताणं विट्ठं भुंजइ स्यरे ।
एवं सीलं चइत्ताणं दुस्सीले रमई मिए ॥ ५ ॥

सुणिया भावं साणस्स सूयरस्स नरस्स य ।
विणय ठवेज्ज अप्पाणमिच्छन्तो हिबमप्पणो ॥ ६ ॥

तम्हा विणयमेसिज्जा सीलं पडिलमेज्जए ।
बुद्धपुत्ते नियागट्ठी न निक्कसिज्जइ कणहुई ॥ ७ ॥

निसन्ते सियाऽमुहरी बुद्धाणं अन्तिए सया ।
अट्टजुत्ताणि सिक्खिज्जा निरट्ठाणि उ वज्जए ॥ ८ ॥

अणुसासिओ न कुप्पिज्जा खंतिं सेविज्ज पण्डिण ।
खुड्डेहिं सह संसर्गि हासं कीडं च वज्जए ॥ ९ ॥

मा य चण्डालियं कासीं बहुयं मा य आलवे ।
कालेण य अहिज्जिता तओ ज्ञाइज्ज एगगो ॥ १० ॥

आइज्ज चण्डालियं कट्टु न निणहविज्ज कयाइ वि ।
कडं कडे त्ति भासेज्जा अकडं नो कडे त्ति य ॥ ११ ॥

मा गलियस्से व कसं वयणमिच्छे पुणो पुणो ।
कसं व वट्ठुमाइण्णे पावगं परिवज्जए ॥ १२ ॥

अणासवा थूलवया कुसीला
मिउं पि चण्डं पकरिन्ति सीसा ।
चित्ताणुया लहु दक्खोववेया
पसायए ते हु दुरासयं पि ॥ १३ ॥

नापुट्ठो वागरे किंचि पुट्ठो वा नालियं वए ।
कोहं असच्चं कुव्वेज्जा धारेज्जा पियमप्पियं ॥ १४ ॥

अप्पा चेव दमेयव्वो अप्पा हु खलु दुद्धमो ।
अप्पा दन्तो सुही होइ अस्सि लोए परत्थ य ॥ १५ ॥

वरं मे अप्पा दन्तो संजमेण तवेण य ।
माहं परेहि दम्मन्तो बन्धणेहि वहेहि य ॥ १६ ॥

पडणीयं च बुद्धाणं वाया अदुव कम्मणा ।
आवो वा जइ वा रहस्से नेव कुज्जा कयाइ वि ॥ १७ ॥

न पक्खओ न पुरओ नेव किच्चाण पिट्ठओ ।
न जुंजे ऊरुणा ऊरुं सयणे नो पडिस्सुणे ॥ १८ ॥

नेव पल्हत्थियं कुज्जा पक्खपिण्डं च संजए ।
पाए पसारिए वावि न चिट्ठे गुरुणन्तिए ॥ १९ ॥

आयारिएहिं वाहित्तो तुसिणीओ न कयाइ वि ।
पसायपेही नियागट्ठी उवचिट्ठे गुरुं सया ॥ २० ॥

आलवन्ते लवन्ते वा न निसीएज्ज कयाइ वि ।
चइऊणमासणं धीरो जओ जत्तं पडिस्सुणे ॥ २१ ॥

आसणगओ न पुच्छिज्जा नेव सेज्जागओ कया ।
आगम्मुकुडुओ सन्तो पुच्छिज्जा पंजलीउडो ॥ २२ ॥

एवं विणयजुत्तस्स सुत्तं अत्थं च तदुभयं ।
पुच्छमाणस्स सीसस्स वागरिज्ज जहासुयं ॥ २३ ॥

सुत्तं परिहरे भिक्खु न य ओहारिणिं वए ।
भासादोसं परिहरे मायं च वज्जए सया ॥ २४ ॥

न लवेज्ज पुट्ठो सावज्जं न निरट्ठं न मम्मयं ।
अप्पणट्ठा परट्ठा वा उभयस्सन्तरेण वा ॥ २५ ॥

समरेसु अगारेसु सन्धीसु य महापहे ।
एगो एगित्थिए सद्धिं नेव चिट्ठे न संलवे ॥ २६ ॥

जं मे बुद्धाणुसासन्ति सीएण फरुसेण वा ।
 मम लामो त्ति पेहाए पयओ ते पडिस्सुणे ॥ १७ ॥
 अणुसासणमोवायं दुक्कडस्स य चोयणं ।
 हियं तं मण्णई पण्णो बेसं होइ असाहुणो ॥ १८ ॥
 हियं विगयमया बुद्धा फरुसं पि अणुसासणं ।
 बेसं तं होइ मूढाणं खन्तिसोहिकरं पयं ॥ १९ ॥
 आसणे उवाचिट्ठेज्जा अणुच्चे अकुए थिरे ।
 अप्पुट्ठाई निरुट्ठाई निसीएज्जप्पकुक्कए ॥ २० ॥
 कालेण निक्खमे भिक्खू कालेण य पडिक्कमे ।
 अकालं च विवज्जित्ता काले कालं समायरे ॥ २१ ॥
 परिवाडीए न चिट्ठेज्जा भिक्खू वत्तेसणं खरे ।
 पडिरुवेण एसित्ता मियं कालेण भक्खए ॥ २२ ॥
 नाइदूरमणासच्चे नच्चेसि चक्खुफासओ ।
 एगो चिट्ठेज्ज मत्तट्ठा लंघिया तं नइक्कमे ॥ २३ ॥
 नाइउच्चे न नीए वा नासच्चे नाइदूरओ ।
 फासुयं परकडं पिण्डं पडिगाहेज्ज संजए ॥ २४ ॥
 अप्पपाणेप्पवीर्यंमि पडिच्छन्नंमि संजुडे ।
 समयं संजए भुंजे जयं अपरिसाडियं ॥ २५ ॥
 सुकाडे त्ति सुपक्कि त्ति सुच्छिब्बे सुहडे मडे ।
 सुणिट्ठिए सुलद्धि त्ति सावज्जं वज्जए सुणी ॥ २६ ॥
 रमए पण्डिए सासं हयं भइं व वाहए ।
 बालं सम्मइ सासन्तो गलियस्सं व वाहए ॥ २७ ॥
 खड्डया मे चवेडा मे अक्कोसा य वहा य मे ।
 कल्लाणमणुसासन्तो पावदिट्ठि त्ति मच्चई ॥ २८ ॥
 पुत्तो मे भाय नाइ त्ति साहू कल्लाण मच्चई ।
 पावदिट्ठी उ अप्पाणं सासं दासु त्ति मच्चई ॥ २९ ॥
 न कोवए आयरियं अप्पाणं पि न कोवए ।
 बुद्धोवथाई न सिया न सिया तोत्तगवेसए ॥ ३० ॥
 आयरियं कुवियं नच्चा पत्तिण्ण पसायए ।
 विज्झवेज्ज पंजलिउडो वणज्ज न पुणु त्ति य ॥ ३१ ॥

ધમ્મજ્ઞિયં ચ વવહારં વુદ્ધેહાયરિયં સયા ।

તમાયરન્તો વવહારં ગરહં નાભિગચ્છઈ ॥ ૪૨ ॥

મળોગયં વક્કગયં જાણિત્તાયરિયસ્સ ડ ।

તં પરિગિજ્ઞ વાયાપ કમ્મુણા ડવવાયપ ॥ ૪૩ ॥

વિત્તે અચોઈપ નિચ્ચં સિપ્પં હવઈ સુચોઈપ ।

જહોવઈટ્ટં સુકયં કિચ્ચાઈં કુવ્વઈં સયા ॥ ૪૪ ॥

નચ્ચા નમઈ મેહાવી લોપ કિત્તી સે જાયપ ।

હવઈં કિચ્ચાણં સરણં મૂયાણં જગઈં જહા ॥ ૪૫ ॥

પુજ્ઞા જસ્સ પસીયન્તિ સંબુદ્ધા પુવ્વસંથુયા ।

પસન્ના લાભઈસ્સન્તિ વિડલં અટ્ઠિયં સુયં ॥ ૪૬ ॥

સ પુજ્ઞસત્થે સુવિણીયસંસપ મળોસઈં ચિટ્ઠઈ કમ્મસંપયા ।

તવોસમાયારિસમાહિસંવુડે મહજ્જુઈં પંચ વયાઈં પાલિયા ॥ ૪૭ ॥

સ દેવગન્ધવ્વમણુસ્સપૂઢપ ચઈન્તુ બેહં મલપંકપુવ્વયં ।

સિદ્ધે વા હવઈ સાસપ દેવે વા અપ્પરપ મહિટ્ઠિપ ॥ ૪૮ ॥ તિ વેમિ ॥

॥ વિણયસુયં સમત્તં ॥ ૧ ॥

॥ પરીસહજ્ઞયણં દ્વિતીયં અધ્યયનમ્ ॥

સુયં મે આડસં તેણં ભગવયા એવમકલાયં । ઇહ સ્વલુ વાવીસં પરીસહા સમણેણં ભગવયા મહાવીરેણં કાસવેણં પવેદયા, જે ભિક્ખુ સોચ્ચા નચ્ચા જિચ્ચા અભિભૂય ભિક્ખવાયરિયાપ પરિવ્વયન્તો પુટ્ઠો નો નિણ્હવેજ્ઞા । કયરે તે સ્વલુ વાવીસં પરીસહા સમણેણં ભગવયા મહાવીરેણં કાસવેણં પવેદયા, જે ભિક્ખુ સોચ્ચા નચ્ચા જિચ્ચા અભિભૂય ભિક્ખવાયરિયાપ પરિવ્વયન્તો પુટ્ઠો નો નિણ્હવેજ્ઞા । ઇમે તે સ્વલુ વાવીસં પરીસહા સમણેણં

भगवया महावीरेण कासवेणं पवेइया, जे भिक्खु सोच्चा नच्चा जिच्चा
अभिभूय भिक्खायरियाए परिद्वयन्तो पुट्ठो नो निणहवेज्जा । तं जहा ॥
दिग्गिच्छापरीसहे १ पिवासापरीसहे २ सीयपरीसहे ३ उस्सिणपरीसहे ४
दंसमसयपरीसहे ५ अचेलपरीसहे ६ अरइपरीसहे ७ इत्थीपरीसहे ८
चरियापरीसहे ९ निसीहियापरीसहे १० सेज्जापरीसहे ११ अक्कोसपरीसहे १२
वहपरीसहे १३ जायणापरीसहे १४ अलाभपरीसहे १५ रोगपरीसहे १६
तण्णासपरीसहे १७ जल्लपरीसहे १८ सक्कारपुरक्कारपरीसहे १९ पन्ना-
परीसहे २० अच्चाणपरीसहे २१ दंसणपरीसहे २२ ॥

परीसहाणं पविभत्ती कासवेणं पवेइया ।

तं मे उदाहरिस्सामि भाणुपुट्ठिं सुणेह मे ॥ १ ॥

१ दिग्गिच्छापरिमए देहे तवस्सी भिक्खु थामवं ।

न छिन्दे न छिन्दावए न पए न पयावए ॥ २ ॥

कालीपव्वंगसंकासे किसे धमणिसंतए ।

मायन्ने असणपाणस्स अदीणमणसो चरे ॥ ३ ॥

२ तओ पुट्ठो पिवासाए दोगुंछी लज्जसंजए ।

सीओदगं न सेविज्जा वियडस्सेसणं चरे ॥ ४ ॥

छिन्नावाएसु पन्थेसु आउरे सुपिवासिए ।

परिसुक्खमुहादीणे तं तितिकखे परीसहं ॥ ५ ॥

३ चरन्तं विरयं त्थहं सीयं फुसइ एगया ।

नाइवेलं मुणी गच्छे सोच्चाणं जिणसासणं ॥ ६ ॥

न मे निवारणं अत्थि छावित्ताणं न विज्जई ।

अहे तु अग्गि सेवामि इइ भिक्खु न चिन्तए ॥ ७ ॥

४ उस्सिणंपरियावेणं परिदाहेण तज्जिए ।

धिंसु वा परियावेणं सायं नो परिदेवए ॥ ८ ॥

उण्हाहितत्ते मेहावी सिणाणं नो वि पत्थए ।

गायं नो परिस्सिंचेज्जा न वीएज्जा य अपपयं ॥ ९ ॥

५ पुट्ठो य दंसमसएहिं समरेव महामुणी ।

नागो संगामसीसे वा स्रो ओभिहणे परं ॥ १० ॥

न संतसे न वारेज्जा मणं पि न पओसए ।

उवेहे न हणे पाणे भुंजन्ते मंससोणियं ॥ ११ ॥

- ६ परिजुण्णेहि वत्थेहिं होक्खामि त्ति अचेले ।
अदुवा सचेले होक्खामि इइ भिक्खू न चिन्तए ॥ १२ ॥
एगयाऽचेले होइ सचेले आवि एगया ।
एयं धम्माहिं नच्चा नाणी नो परिदेवए ॥ १३ ॥
- ७ गामाणुगामं रीयन्तं अणगरं अक्किचणं ।
अरई अणुप्पवेसेज्जा तं तित्तिक्खे परीसहं ॥ १४ ॥
अरइं पिट्ठओ किच्चा विरए आयरक्खि ।
धम्मारामे निरारम्मे उवसन्ते मुणी चरे ॥ १५ ॥
- ८ संगो एस मणूसाणं जाओ लोगंमि इत्थिओ ।
जस्स एया परिन्नाया सुकडं तस्स सामणं ॥ १६ ॥
एयमादाय मेहावी पंकभूया उ इत्थिओ ।
नो तार्हि विणिहम्मेज्जा चरेज्जत्तगवेसए ॥ १७ ॥
- ९ एग एव चरे लाढि अभिभूय परीसहे ।
गामे वा नगरे वाधि निगमे वा रायहाणिए ॥ १८ ॥
असमाणे चरे भिक्खू नेव कुज्जा परिग्गहं ।
असंसत्ते गिहत्थेहिं अणिएओ परिव्वए ॥ १९ ॥
- १० सुसाणे सुज्जगारे वा रुक्खमूले व एगओ ।
अकुक्कुओ निसीएज्जा न य वित्तासए परं ॥ २० ॥
तत्थ से चिट्ठमाणस्स उवसग्गाभिधारए ।
संकाभीओ न गच्छेज्जा उट्ठिता अज्जमासणं ॥ २१ ॥
- ११ उच्चावयाहिं सेज्जाहिं तवस्सी भिक्खु थामवं ।
नाइवेलं विहम्मेज्जा पावदिट्ठी विहम्मई ॥ २२ ॥
पइरिक्खवस्सयं लद्धं कल्लणमदुव पावयं ।
किमेगराई करिस्सइ एवं तत्थऽहियासए ॥ २३ ॥
- १२ अक्कोसेज्जा परे भिक्खुं न तेसिं पडिसंजले ।
सरिसो होइ बालाणं तम्हा भिक्खू न संजले ॥ २४ ॥
सोच्चाणं फरुसा भासा दारुणा गामकण्टगा ।
तुसिणीओ उवेहेज्जा न ताओ मणसीकरे ॥ २५ ॥
- १३ हओ न संजले भिक्खू मणं पि न पओसए ।
तित्तिक्खं परमं नच्चा भिक्खू धम्मं समायरे ॥ २६ ॥

- समणं संजयं दन्तं हणेज्जा कोइ कत्थइ ।
 नात्थि जीवस्स नासु त्ति एवं पेहेज्ज संजए ॥ १७ ॥
- १४ दुक्करं खलु भो निच्चं अणगारस्स भिक्खुणो ।
 सत्त्वं से जाइयं होइ नात्थि किंचि अजाइयं ॥ १८ ॥
 गोयरगपविट्ठस्स पाणी नो सुप्पसारए ।
 सेओ अगारवासु त्ति इइ भिक्खु न चिन्तए ॥ १९ ॥
- १५ परेसु घासमेसेज्जा भोयणे परिणिट्ठिए ।
 लद्धे पिण्डे अलद्धे वा नाणुतप्पेज्ज पण्डिए ॥ २० ॥
 अज्जेवाहं न लब्भामि अवि लाभो सुए सिया ।
 जो एवं पडिसंचिक्खे अलामो तं न तज्जए ॥ २१ ॥
- १६ नच्चा उत्पइयं दुक्खं वेयणाए दुहट्ठिए ।
 अदीणो थावए पन्नं पुट्ठो तत्थहियासए ॥ २२ ॥
 तेइच्छं नाभिनन्देज्जा संचिक्खत्तगवेसए ।
 एवं खु तस्स सामणं जं न कुज्जा न कारवे ॥ २३ ॥
- १७ अचेलगस्स लूहस्स संजयस्स तवास्सिणो ।
 तणेसु सयमाणस्स हुज्जा गायविराहणा ॥ २४ ॥
 आयवस्स निवाएणं अउला हवइ वेयणा ।
 एवं नच्चा न सेवान्ति तन्नुजं तणताज्जिया ॥ २५ ॥
- १८ किलिन्नगाए मेहावी पंकेण व रएण वा ।
 धिसु वा परियावेण सायं नो परिदेवए ॥ २६ ॥
 वेएज्ज निज्जरापेही आरियं घम्मऽणुत्तरं ।
 जाव सरीरभेउ त्ति जलं काएण धारए ॥ २७ ॥
- १९ अभिवायणमब्भुट्ठाणं सामी कुज्जा निमन्तणं ।
 जे ताइं पडिसेवान्ति न तेसिं पीइए मुणी ॥ २८ ॥
 अणुक्कसाई अप्पिच्छे अन्नाएसी अलोलुए ।
 रसेसु नाणुगिज्जेज्जा नाणुतप्पेज्ज पन्नवं ॥ २९ ॥
- २० से नूणं मए पुट्ठं कम्माणाणफला कडा ।
 जेणाहं नाभिजाणामि पुट्ठो केणइ कणहुई ॥ ३० ॥
 अह पच्छा उइज्जन्ति कम्माणाणफला कडा ।
 एवमस्सासि अप्पाणं नच्चा कम्मविवागयं ॥ ३१ ॥

- ११ निरट्टगम्मि विरओ मेहृणाओ सुसंवुडो ।
 जो सक्खं नाभिजाणामि धम्मं कल्लणपावगं ॥ ४२ ॥
 तवावहाणमादाय पडिमं पडिवज्जओ ।
 एवं पि विहरओ मे छउमं न नियट्ठई ॥ ४३ ॥
- १२ नत्थि नूनं परे लोए इड्ढी वावि तवस्सिणो ।
 अदुवा वंचिओ मि त्ति इइ भिक्खू न चिन्तए ॥ ४४ ॥
 अभू जिणा अत्थि जिणा अदुवावि भविस्सई ।
 मुसं ते एवमाहंसु इइ भिक्खू न चिन्तए ॥ ४५ ॥
 एए परीसहा सव्वे कासवेण निवेइया ।
 जे भिक्खू न विहम्मज्जजा पुट्ठो केणइ कण्हुई ॥ ४६ ॥ त्ति बेमि ॥
 ॥ परीसहज्झयणं समत्तं ॥ २ ॥

॥ चाउरंगिज्जं तृतीयं अध्ययनम् ॥

- चत्तारि परमंगाणि इल्लहाणीह जन्तुणो ।
 माणुसत्तं सुई सद्धा संजमंमि य वीरियं ॥ १ ॥
 समावन्नाण संसारे नाणागोत्तासु जाइसु ।
 कम्मा नाणाविहा कट्टु पुट्ठो विस्संभिया पया ॥ २ ॥
 एगया देवलोएसु नरएसु वि एगया ।
 एगया आसुरं कायं आहाकम्मेहि गच्छई ॥ ३ ॥
 एगया खत्तिओ होइ तओ चण्डालवोक्कसो ।
 तओ कीडपयंगो य तओ कुन्थुपिर्वीलिया ॥ ४ ॥
 एवमावट्टजोणीसु पाणिणो कम्मकिट्ठिसा ।
 न निविज्जन्ति संसारे सव्वट्ठेसु व खत्तिया ॥ ५ ॥
 कम्मसंगेहिं सम्मूढा दुक्खिया बहुवेयणा ।
 अमाणुसासु जोणीसु विणिहम्मन्ति पाणिणो ॥ ६ ॥
 कम्माणं तु पहाणाए आणुपुव्वी कयाइ उ ।
 जीवा सोहिमणुप्पत्ता आययन्ति मणुस्सयं ॥ ७ ॥

माणुस्सं विग्गहं लद्धं सुई धम्मस्स इल्लहा ।
 जं सोच्चा पडिवज्जन्ति तवं खन्तिमहिंसयं ॥ ८ ॥
 आहच्च सवणं लद्धं सद्धा परमइल्लहा ।
 सोच्चा नेआउयं मगं वहवे परिभस्सई ॥ ९ ॥
 सुई च लद्धं सद्धं च वीरियं पुण इल्लहं ।
 वहवे रोयमाणा वि नो य णं पडिवज्जए ॥ १० ॥
 माणुसत्तंमि आयाओ जो धम्मं सोच्च सद्धेह ।
 तवस्सी वीरियं लद्धं संवुडे निद्धुणे रयं ॥ ११ ॥
 सोही उज्जुयभूयस्स धम्मो सुद्धस्स चिट्ठई ।
 निव्वाणं परमं जाइ धयसित्ति व्व पावए ॥ १२ ॥
 विगिंच कम्मुणो हेउं जसं संचिणु खन्तिए ।
 सरीरं पाटवं हिच्चा उद्धं पक्कमई दिसं ॥ १३ ॥
 विसालिसेहिं सीलोहिं जक्खा उत्तरउत्तरा ।
 महासुक्का व दिप्पन्ता मन्नन्ता अपुणच्चवं ॥ १४ ॥
 अप्पिया देवकामाणं कामरूवविउव्विणो ।
 उद्धं कप्पेसु चिट्ठन्ति पुव्वा वाससया बहू ॥ १५ ॥
 तत्थ ठिच्चा जहाठाणं जक्खा आउक्खए चुया ।
 उवेन्ति माणुसं जोणिं से दसंगेऽभिजायई ॥ १६ ॥
 खेत्तं वत्थुं हिरण्णं च पसवो दासपोरुसं ।
 चत्तारि कामखन्धाणि तत्थ से उववज्जई ॥ १७ ॥
 मित्तवं नायवं होइ उच्चागोए य वण्णवं ।
 अप्पायंके महापप्पे अभिजाए जसोबले ॥ १८ ॥
 भोच्चा माणुस्सए भोए अप्पडिरूवे अहाउयं ।
 पुर्वि विसुद्धसद्धम्मे केवलं बोहि बुज्झिया ॥ १९ ॥
 चउरंगं इल्लहं मत्ता संजमं पडिवज्जिया ।
 तवसा धुयकम्मंसे सिद्धे हवइ सात्तए ॥ २० ॥ त्ति वमि ॥

॥ चाउरंगिज्जं समत्तं ॥ ३ ॥

॥ असंख्यं चतुर्थं अध्ययनम् ॥

असंख्यं जीविय मा पमायए जरोवणीयस्स हु नात्थि ताणं ।
 एवं विजाणाहि जणे पमत्ते किण्णू विहिंसा अजया गहिन्ति ॥ १ ॥
 जे पावकम्मोहि धणं मणूसा समाययन्ती अमइं गहाय ।
 पहाय ते पासपयट्टिए नरे वेराणुबद्धा नरयं उवेन्ति ॥ २ ॥
 तेणे जहा सन्धिमुहे गहीए सकम्मुणा किञ्चइ पावकारी ।
 एवं पया पेच्च इहं च लोए कडाण कम्माण न मांक्खु आत्थि ॥ ३ ॥
 संसारमावन्न परस्स अट्ठा साहारणं जं च करेइ कम्मं ।
 कम्मस्स ते तस्स उ वेयकाले न बन्धवा बन्धवयं उवेन्ति ॥ ४ ॥
 वित्तेण ताणं न लभे पमत्ते इमंमि लोए अड्डवा परत्था ।
 दीवप्पणट्ठे व अणन्तमोहे नेयाउयं वट्ठुमवट्ठुमेव ॥ ५ ॥
 सुत्तेसु यावी पडिबुद्धजीवी न वीससे पण्डिए आसुपन्ने ।
 घोरा मुहुत्ता अबलं सरीरं भारुण्डपक्खी व चरप्पमत्ते ॥ ६ ॥
 चरे पयाइं परिसंकमाणो जं किंचि पासं इह मणमाणो ।
 लाभन्तरे जीविय बूहइत्ता पच्छा परिन्नाय मलावधंसी ॥ ७ ॥
 छन्दंनिरोहेण उवेइ मोक्खं आसे जहा सिक्खियवम्मधारी ।
 पुट्वाइं वासाइं चरप्पमत्ते तम्हा मुणी खिप्पमुवेइ मोक्खं ॥ ८ ॥
 स पुट्ठमेवं न लभेज्ज पच्छा एसोवमा सासयवाइयाणं ।
 विसीयई सिढिले आउयंमि कालोवणीए सरीरस्स भेए ॥ ९ ॥
 खिप्पं न सक्केइ विवेगमेउं तम्हा समुट्ठाय पहाय कामे ।
 समिच्च लोयं समया महेसी आयाणुरक्खी चरमप्पमत्ते ॥ १० ॥
 मुहुं मुहुं मोहगुणे जयन्तं अणेगरूवा समणं चरन्तं ।
 फासा फुसन्ती असमंजसं च न तेसु भिक्खू मणसा पउस्से ॥ ११ ॥
 मन्दा य फासा बहुलोहणिज्जा तहप्पगारेसु मणं न कुज्जा ।
 रक्खिज्ज कोहं विणएज्ज माणं मायं न सेवे पयहेज्ज लोहं ॥ १२ ॥
 जेऽसंखया तुच्छ परप्पवाई ते पिज्जदीसाणुगया परज्झा ।
 एए अहम्मे त्ति दुगुंणमाणो कंखे गुणे जाव सरीरभेओ ॥ १३ ॥
 त्ति वेमि ॥

॥ असंख्यं समत्तं ॥ ४ ॥

॥ अकाममरणिज्जं पञ्चमं अध्ययनम् ॥

अण्णवंसि महोघांसि एगे तिण्णे दुरुत्तरं ।
 तत्थ एगे महापक्के इमं पण्हमुदाहरे ॥ १ ॥
 सन्तिमे य इवे ठाणा अक्खाया मारणन्तिया ।
 अकाममरणं चेव सकाममरणं तहा ॥ २ ॥
 बालाणं अकामं तु मरणं असइं भवे ।
 पण्हियाणं सकामं तु उक्कोसेण सइं भवे ॥ ३ ॥
 तत्थिमं पदमं ठाणं महावीरेण वेसियं ।
 कामगिद्धे जहा बाले भिसं कूराइं कुव्वई ॥ ४ ॥
 जे गिद्धे कामभोगेसु पगे कूढाय गच्छई ।
 न मे विद्धे परे लोए चक्खुविट्ठा इमां रई ॥ ५ ॥
 हत्थागया इमे कामा कालिया जे अणागया ।
 को जाणइ परे लोए अत्थि वा नत्थि वा पुणो ॥ ६ ॥
 जणेण सिद्धिं होक्खामि इइ बाले पगब्भई ।
 कामभोगाणुरापणं कैसं संपडिवज्जई ॥ ७ ॥
 तओ से वण्ढं समारभई तसेसु थावरेसु य ।
 अट्ठाए य अणट्ठाए भूयग्गामं विहिंसई ॥ ८ ॥
 हिंसे बाले मुत्तावाई माइल्ले पिसुणे सढे ।
 भुंजमाणे सुरं मंसं सेयमेयं ति मच्चई ॥ ९ ॥
 कायसा वयसा मत्ते वित्ते गिद्धे य इत्थिसु ।
 दुहओ मलं संचिणइ सिस्सुणागु त्व मद्रियं ॥ १० ॥
 तओ पुट्ठो आयंकेणं गिलाणो परितप्पई ।
 पभीओ परलोगस्स कम्माणुप्पेहि अप्पणो ॥ ११ ॥
 सुया मे नरए ठाणा असीलाणं च जा गई ।
 बालाणं कूरकम्माणं पगाढा जत्थ वेयणा ॥ १२ ॥
 तत्थोववाइयं ठाणं जहा मेयमणुस्सुयं ।
 आहाकम्मोहिं गच्छन्तो सो पच्छा परितप्पई ॥ १३ ॥
 जहा सागडिओ जाणं समं हिच्चा महापहं ।
 विसमं मग्गमोइण्णो अक्खे भग्गमि सोयई ॥ १४ ॥

एवं धम्मं विउक्कम्म अहम्मं पडिवज्जिया ।
 बाले मच्चुमुहं पत्ते अक्खे भग्गे व सोयई ॥ १५ ॥
 तओ से मरणन्तंमि बाले सन्तस्सई भया ।
 अकाममरणं मरई धुत्ते व कलिना जिण ॥ १६ ॥
 एयं अकाममरणं बालाणं तु पवेइयं ।
 एत्तो सकाममरणं पण्डियाणं सुणेह मे ॥ १७ ॥
 मरणं पि सपुण्णाणं जहा मेयमणुस्सुयं ।
 विप्पसण्णमणाघायं संजयाण वुसीमओ ॥ १८ ॥
 न इमं सव्वेसु भिक्खूसु न इमं सव्वेसुगारिसु ।
 नाणासीला अगारत्था विसमसीला य भिक्खुणो ॥ १९ ॥
 सन्ति एगेहिं भिक्खूहिं गारत्था संजमुत्तरा ।
 गारत्थेहि य सव्वेहिं साहवो संजमुत्तरा ॥ २० ॥
 चीराजिणं नगिणिणं जडी संघाडिमुण्डिणं ।
 एयाणि वि न तायन्ति दुस्सीलं परियागयं ॥ २१ ॥
 पिण्डोलए व दुस्सीले नरगाओ न मुच्चई ।
 भिक्खाए वा गिहत्थे वा सुव्वए कम्मई दिवं ॥ २२ ॥
 अगारिसामाइयंगाणि सट्ठी काएण फासए ।
 पोसहं दुहओ पक्खं एगरायं न हावए ॥ २३ ॥
 एवं सिक्खासमावत्ते गिहिवासे वि सुव्वए ।
 मुच्चई छविपव्वाओ गच्छे जक्खसलोगयं ॥ २४ ॥
 अह जे संवुडे भिक्खू कोणहं अन्नयरे सिया ।
 सव्वदुक्खप्पहीणे वा देवे वाचि माहिड्डिए ॥ २५ ॥
 उत्तराई विमोहाई जुइमन्ताणुपुव्वसो ।
 समाइण्णाई जक्खेहिं आवासाई जसंसिणो ॥ २६ ॥
 वीहाउया इड्डिमन्ता समिद्धा कामरूविणो ।
 अहुणोववन्नसंकासा भुज्जो अन्नमलिप्पभा ॥ २७ ॥
 ताणि ठाणाणि गच्छन्ति सिक्खित्ता संजमं तवं ।
 भिक्खाए वा गिहत्थे वा जे सन्ति परिनिव्वुडा ॥ २८ ॥
 तेसिं सोच्चा सपुज्जाणं संजयाण वुसीमओ ।
 न संतसन्ति मरणन्ते सीलवन्ता बहुस्सुया ॥ २९ ॥

तुलिया विसेसमादाय दयाधम्मस्स खन्ति ए ।
 विप्पसीएज्ज मेहावी तहाभूएण अप्पणा ॥ ३० ॥
 तओ काले अभिप्पेए सट्ठी तालिसमन्ति ए ।
 विणएज्ज लोमहरिसं मेयं देहस्स कंखए ॥ ३१ ॥
 अह कालंमि संपत्ते आघायाय समुस्सयं ।
 सकाममरणं मरई तिण्हमन्नयरं मुणी ॥ ३२ ॥ त्ति बोमि ॥
 ॥ अकाममराणिज्जं समत्तं ॥ ५ ॥

॥ खुड्ढागनियण्ठिज्जं षष्ठं अध्ययनम् ॥

जावन्तऽविज्जापुरिसा सव्वे ते दुक्खसंभवा ।
 लुप्पन्ति बहुसो मूढा संसारंमि अणन्तए ॥ १ ॥
 समिक्ख पंडि ए तम्हा पासजाई पहे बहू ।
 अप्पणा सच्चमेसेज्जा मेत्ति भूएसु कप्पए ॥ २ ॥
 माया पिया ण्हुसा माया भज्जा पुत्ता य ओरसा ।
 नालं ते मम ताणाय लुप्पन्तस्स सकम्मुणा ॥ ३ ॥
 एयमट्ठं सपेहाए पासे समियदंसणे ।
 छिन्द गेद्धि सिणेहं च न कंखे पुव्वसंथुयं ॥ ४ ॥
 गवासं मणिकुंडलं पसवो दासपोरुसं ।
 सव्वमेयं चइत्ताणं कामरूवी भविस्ससि ॥ ५ ॥
 [थावरं जंगमं चेव धणं धणं उवक्खरं ।
 पच्चमाणस्स कम्मोहिं नालं दुक्खाउ मोयणे
 अज्झत्थं सव्वओ सव्वं दिस्स पाणे पियायए ।
 न हणे पाणिणो पाणे भयवेराओ उवरए ॥ ६ ॥
 आयाणं नरयं दिस्स नायएज्ज तणामवि ।
 दोगुंढी अप्पणो पाए दिक्कं भुंजेज्ज मोयणं ॥ ७ ॥
 इहमेगे उ मन्नन्ति अप्पच्चक्खाय पावगं ।
 आयारियं विदित्ताणं सव्वदुक्खाण मुच्चई ॥ ८ ॥
 भणन्ता अकरेन्ता य बन्धमोक्खपइणिणो ।
 वायाविरियमेत्तेण समासासेन्ति अप्पयं ॥ ९ ॥

न चित्ता तायए भासा कुओ विज्जाणुसासणं ।
 विसन्ना पावकम्मोहिं बाला पंडियमाणिणो ॥ १० ॥
 जे केइ सरीरे सत्ता वण्णे रुवे य सव्वसो ।
 मणसा कायवक्केणं सज्जे ते दुक्खिसंभवा ॥ ११ ॥
 आवन्ना दीहमद्धाणं संसारंमि अणंतए ।
 तम्हा सःवदिसं पस्सं अप्पमत्तो परिद्वए ॥ १२ ॥
 ब्रह्मिया उड्डुमादाय नावकंखे कयाइ वि ।
 पुव्वकम्मखयट्ठाए इमं देहं समुद्धरे ॥ १३ ॥
 विविच्च कम्मुणो हेउं कालकंखी परिद्वए ।
 मायं पिंडस्स पाणस्स कडं लद्धूण भक्खए ॥ १४ ॥
 सन्निहिं च न कुद्वेज्जा लेवमायाए संजए ।
 पक्खी पत्तं समादाय निरवेक्खो परिद्वए ॥ १५ ॥
 एसणासमिए लज्जु गामे अणियओ चरे ।
 अप्पमत्तो पमत्तेहिं पिंडवायं गवेसए ॥ १६ ॥
 एवं से उदाहु अणुत्तरनाणी अणुत्तरवंसी अणुत्तरनाणइंसणधरे
 अरहा नायपुत्ते भगवं वेसालिए विद्याहिए ॥ त्ति वेमि ॥

॥ सुद्धागनियंठिज्जं समत्तं ॥ ६ ॥

॥ एलयं सत्तमं अध्ययनम् ॥

जहाएसं समुद्धिस्स कोइ पोसेज्ज एलयं ।
 ओयणं जवसं देज्जा पोसेज्जा वि सयंगणे ॥ १ ॥
 तओ से पुट्टे परिवूढे जायमेए महोदरे ।
 पीणिण विउले देहे आएसं परिकंखए ॥ २ ॥
 जाव न एइ आएसे ताव जीवइ से दुही ।
 अह पत्तंमि अएसे सीसं छेत्तूण भुज्जई ॥ ३ ॥
 जहा खलु से उरदमे आएसाए समीहिए ।
 एवं बाले अहम्मिदु ईहई नरयाउयं ॥ ४ ॥

हिंसे बाले मुसावाई अद्धाणांसि विलोवए ।
 अन्नऽदत्तहरे तेणे माई कन्नुहरे सढे ॥ ५ ॥
 इत्थीविसयगिद्धे य महारंमपरिगहे ।
 भुंजमाणे सुरं मंसं परिवूढे परंदमे ॥ ६ ॥
 अयककरमोई य तुंडिले चियलोहिए ।
 आउयं नरए कंखे जहाएसं व एलए ॥ ७ ॥
 आसणं सयणं जाणं वित्तं कामे य भुंजिया ।
 दुस्साहडं धणं हिच्चा बडुं संचिणिया रयं ॥ ८ ॥
 तओ कम्मगुरू जन्तू पच्चुप्पन्नप्परायणे ।
 अए व्व आगयाएसे मरणन्तंमि सोयई ॥ ९ ॥
 तओ आउपरिक्खीणे चुया देहा विहिंसगा ।
 आसुरीयं दिसं बाला गच्छन्ति अवसा तमं ॥ १० ॥
 जहा कागिणिए हेउं सहस्सं हारए नरो ।
 अपच्छं अम्बगं भोच्चा राया रज्जं तु हारए ॥ ११ ॥
 एवं माणुस्सगा कामा देवकामाण अन्तिए ।
 सहस्सगुणिया भुज्जो आउं कामा य दिव्विया ॥ १२ ॥
 अणेगवासानउया आ सा पन्नवओ ठिई ।
 जाणि जीयन्ति दुम्मेहा ऊणे वाससयाउए ॥ १३ ॥
 जहा य तिन्नि वणिया मूलं घेत्तूण निग्गया ।
 एगो ऽत्थ लहई लाहं एगो मूलेण आगओ ॥ १४ ॥
 एगो मूलं पि हारित्ता आगओ तत्थ वाणिओ ।
 ववहारे उवमा एसा एवं धम्मे बियाणह ॥ १५ ॥
 माणुसत्तं भवे मूलं लाभो देवगई भवे ।
 मूलच्छेएण जीवाणं नरगतिरिक्खत्तणं धुवं ॥ १६ ॥
 दुहओ गई बालस्स आवई वहमूलिया ।
 देवत्तं माणुसत्तं च जं जिए लोलयासढे ॥ १७ ॥
 तओ जिए सई होइ दुविहं कोग्गई गए ।
 दुल्लहा तस्स उम्मुग्गा अद्धाए सुइरादवि ॥ १८ ॥
 एवं जियं सपेहाए तुलिया बालं च पंडियं ।
 मूलियं ते पवेसन्ति माणुसिं जोणिमेन्ति जे ॥ १९ ॥

वेमायाहिं सिक्खाहिं जे नरा गिहिसुव्वया ।
 उवेन्ति माणुसं जोणिं कम्मसच्चा तु पाणिणो ॥ २० ॥
 जेसिं तु विउला सिक्खा मूलियं ते अइच्छुया ।
 सीलवन्ता सवीसेसा अदीणा जन्ति वेवयं ॥ २१ ॥
 एवमद्दीणवं भिक्खुं अगारिं च विद्याणिया ।
 कहण्णु जिच्चमेलिक्खं जिच्चमाणे न संविदे ॥ २२ ॥
 जहा कुसग्गे उवगं समुद्वेण समं मिणे ।
 एवं माणुस्सगा कामा देवकामाण अन्तिए ॥ २३ ॥
 कुसग्गमेत्ता इमे कामा सन्निरुद्धंमि आउए ।
 कस्स हेउं पुराकाउं जोगक्खेमं न संविदे ॥ २४ ॥
 इह कामाणियद्वस्स अत्तट्टे अवरज्झई ।
 सोच्चा नेयाउयं मग्गं जं भुज्जो परिमस्सई ॥ २५ ॥
 इह कामाणियद्वस्स अत्तट्टे नावरज्झई ।
 पूइवेहनिरोहेणं भवे देवि त्ति मे सुयं ॥ २६ ॥
 इद्धी जुई असो वण्णो आउं सुहमणुत्तरं ।
 भुज्जो जत्थ मणुस्सेसु तत्थ से उववज्जई ॥ २७ ॥
 बालस्स पस्स बालत्तं अहम्मं पडिवाज्जिया ।
 चिच्चा धम्मं अहम्मिट्ठे नरए उववज्जई ॥ २८ ॥
 धीरस्स पस्स धीरत्तं सच्चधम्माणवत्तिणो ।
 चिच्चा अधम्मं धम्मिट्ठे देवेसु उववज्जई ॥ २९ ॥
 तुलियाण बालभावं अबालं चेव पण्डिए ।
 चइऊण बालभावं अबालं सेवए सुप्पि ॥ ३० ॥ त्ति बोमि ॥

॥ एल्लयज्झयणं समत्तं ॥ ७ ॥

॥ काविलीयं अष्टमं अध्ययनम् ॥

अधुवे असासयमी संसारंमि दुक्खपउराए ।
 किं नाम होज्ज तं कम्मयं जेणाहं दोग्गइं न गच्छेज्जा ॥ १ ॥
 विजहिच्च पुव्वसंजोयं न सिणेहं कहिच्चि कुव्वेज्जा ।
 असिणेह सिणेहकरोहिं दोसपओसोहिं मुच्चए भिक्खू ॥ २ ॥
 तो नाणदंसणसमग्गो हियनिस्सेसाय सव्वजीवाणं ।
 तेसिं विमोक्खणट्ठाए भासई मुणिवरो विगयमोहो ॥ ३ ॥
 सव्वं गन्थं कलहं च विप्पजहे तद्दाविहं भिक्खू ।
 सव्वेसु कामजाएसु पासमाणो न लिप्पई ताई ॥ ४ ॥
 भोगामिसदोसविसण्णे हियनिस्सेयसबुद्धिवोच्चत्थे ।
 बाले य मन्दिए मूढे बज्झई मच्छिन्ना व खेलंमि ॥ ५ ॥
 दुपरिच्चया इमे कामा नो सुजहा अधीरपुरिसेहिं ।
 अह सन्ति सुव्वया साहू जे तरन्ति अतरं वणिआ वा ॥ ६ ॥
 समणा मु एगे वयमाणा पाणवहं मिया अयाणन्ता ।
 मन्दा निरयं मच्छन्ति बाला पावियाहिं विट्ठीहिं ॥ ७ ॥
 न हु पाणवहं अणुजाणे मुच्चेज्ज कयाइ सव्वदुक्खाणं ।
 एवारिण्हिं अक्खायं जेहिं इमो साहुधम्मो पन्नत्तो ॥ ८ ॥
 पाणे य नाइवाएज्जा से समिए त्ति वुच्चई ताई ।
 तओ से पावयं कम्मं निज्जाइ उदगं व थलाओ ॥ ९ ॥
 जगनिस्सिण्हिं भूण्हिं तसनामेहिं थावरेहिं च ।
 नो तेसिमारमे दंडं मणसा वयस कायसा चेव ॥ १० ॥
 सुद्धेसणाओ नच्चानं तत्थ ठवेज्ज भिक्खू अप्पाणं ।
 जायाए घासमेसेज्जा रसगिद्धे न सिया भिक्खाए ॥ ११ ॥
 पन्ताणि चेव सेवेज्जा सीयपिडं पुराणकुम्मासं ।
 अदु वक्कसं पुलागं वा जवणट्ठाए निसेवए मंथुं ॥ १२ ॥
 जे लक्खणं च सुविणं च अंगाविज्जं च जे पउंजन्ति ।
 न हु ते समणा वुच्चन्ति एवं आयरिण्हिं अक्खायं ॥ १३ ॥
 इहजीवियं अणियमेत्ता पच्चट्ठा सममहिजोण्हिं ।
 ते कामभोगरसगिद्धा उववज्जन्ति आसुरे काए ॥ १४ ॥

तत्तो वि य उवट्टित्ता संसारं बहुं अणुपरियडन्ति ।
बहुकम्मलेवलित्ताणं बोही होइ सुदुलहा तेसिं ॥ १५ ॥

कसिणं पि जो इमं लोयं पडिपुणं दलेज्ज इक्कस्स ।
तेणावि से न संतुस्से इइ दुप्पूरण इमे आया ॥ १६ ॥

जहा लाहो तहा लोहो लाहा लोही पवड्ढई ।
दोमासकयं कज्जं कोडीए वि न निट्ठियं ॥ १७ ॥

नो रक्खसीसु गिज्जेज्जा गंडवच्छासुऽणेगचित्तासु ।
जाओ पुरिसं पलोभित्ता खल्लन्ति जहा व दासोहिं ॥ १८ ॥

नारीसु नोवगिज्जेज्जा इत्थी विप्पजहे अणगारे ।
धम्मं च पेसलं नच्चा तत्थ ठवेज्ज भिक्खू अप्पाणं ॥ १९ ॥

इइ एस धम्मे अक्खाए कविलेणं च विसुद्धपत्तेणं ।
तरिहन्ति जे उ काहन्ति तेहिं आराहिया दुवे लोग ॥ २० ॥ त्ति बोमि ॥

॥ काविलीयं समत्तं ॥ ८ ॥

॥ नमिपव्वज्जा नवमं अध्ययनम् ॥

चइऊण देवलोगाओ उववन्नो माणुसंमि लोगंमि ।
उवसन्तमोहाणिज्जो सरई पोराणियं जाई ॥ १ ॥

जाई सारित्तु भयवं सहसंबुद्धो अणुत्तरे धम्मे ।
पुत्तं ठवेत्तु रज्जे अभिणिक्खमई नमी राया ॥ २ ॥

से देवलोगसारिसे अन्तेउरवरगओ वरे भोए ।
भुंजित्तु नमी राया बुद्धो भोमे परिच्चयई ॥ ३ ॥

मिहिलं सपुरजणवयं बलमोरोहं च परियणं सव्वं ।
चिच्चा अभिनिक्खन्तो एगन्तमाहिट्ठिओ भयवं ॥ ४ ॥

कोलाहलगव्भूयं आसी मिहिलाए पव्वयन्तंमि ।
तइया रायारिसिमि नमिमि अभिणिक्खमन्तंमि ॥ ५ ॥

अव्भुट्ठियं रायारिसिं पव्वज्जाठाणमुत्तमं ॥
सक्को माहणरुवेण इमं वयणमव्ववी ॥ ६ ॥

किण्णु भो अज्ज मिहिला कोलाहलगसंकुला ।
 सुव्वन्ति वारुणा सद्दा पासापसु गिहेसु य ॥ ७ ॥
 एयमट्ठं निसामित्ता हेऊकारणचोइओ ।
 तओ नमी रायरिसी देविन्दं इणमव्ववी ॥ ८ ॥
 मिहिलाए चेइए वच्छे सीयच्छाए मणोरमे ।
 पत्तपुप्फफलोवेए बहूणं बहुगुणे सया ॥ ९ ॥
 वाएण हीरमाणंमि चेइयंमि मणोरमे ।
 दुहिया असरणा अत्ता एए कन्दन्ति भो खगा ॥ १० ॥
 एयमट्ठं निसामित्ता हेऊकारणचोइओ ।
 तओ नमि रायरिसिं देविन्दो इणमव्ववी ॥ ११ ॥
 एस अग्गी य वाऊ य एयं डज्झइ मन्दिरं ।
 भयवं अन्तेउरं तेणं कीस णं नावपेक्खह ॥ १२ ॥
 एयमट्ठं निसामित्ता हेऊकारणचोइओ ।
 तओ नमी रायरिसी देविन्दं इणमव्ववी ॥ १३ ॥
 सुहं वसामो जीवामो जेसिं भो नत्थि किंचण ।
 मिहिलाए डज्झमाणीए न मे डज्झइ किंचण ॥ १४ ॥
 अत्तपुत्तकलत्तस्स निव्वावारस्स भिक्खुणो ।
 पियं न विज्जई किंचि अप्पियं पि न विज्जई ॥ १५ ॥
 बहुं खु मुणिणो भइं अणगारस्स भिक्खुणो ।
 सव्वओ विप्पमुक्कस्स एगन्तमणुपस्सओ ॥ १६ ॥
 एयमट्ठं निसामित्ता हेऊकारणचोइओ ।
 तओ नमि रायरिसिं देविन्दो इणमव्ववी ॥ १७ ॥
 पागारं कारइत्ताणं गोपुरट्ठालगाणि च ।
 उत्सूलगसयग्धीओ तओ गच्छसि खत्तिया ॥ १८ ॥
 एयमट्ठं निसामित्ता हेऊकारणचोइओ ।
 तओ नमी रायरिसी देविन्दं इणमव्ववी ॥ १९ ॥
 सद्धं नगरं किच्चा तवसेवरममालं ।
 खन्ति निउणपागारं तिगुत्तं वुप्पधंसय्यं ॥ २० ॥
 धणुं परक्कमे किच्चा जीवं च हरियं सया ।
 धिइं च केयणं किच्चा सच्चेण पलिमन्थए ॥ २१ ॥

तवनारायजुत्तेण भेत्तूणं कम्मकंचुयं ।
 मुणी विगयसंगामो भवाओ परिमुच्चए ॥ २२ ॥
 एयमट्ठं निसामित्ता हेऊकारणचोइओ ।
 तओ नमिं रायरिसिं देविन्दो इणमव्ववी ॥ २३ ॥
 पासाए कारइत्ताणं वद्धमाणगिहाणि य ।
 बालग्गपोइयाओ य तओ गच्छसि खत्तिया ॥ २४ ॥
 एयमट्ठं निसामित्ता हेऊकारणचोइओ ।
 तओ नमी रायरिसीं देविन्दं इणमव्ववी ॥ २५ ॥
 संसयं खलु सो कुणई जो मग्गे कुणई घरं ।
 जत्थेव गन्तुमिच्छेज्जा तत्थ कुव्वेज्ज सासयं ॥ २६ ॥
 एयमट्ठं निसामित्ता हेऊकारणचोइओ ।
 तओ नमिं रायरिसिं देविन्दो इणमव्ववी ॥ २७ ॥
 आमोसे लोमहारे य गांठिमेए य तक्करे ।
 नगरस्स खेमं काऊणं तओ गच्छसि खत्तिया ॥ २८ ॥
 एयमट्ठं निसामित्ता हेऊकारणचोइओ ।
 तओ नमी रायरिसीं देविन्दं इणमव्ववी ॥ २९ ॥
 असई तु मणुस्सेहिं मिच्छा वण्डो पजुंजई ।
 अकारिणोऽत्थ वज्झन्ति मुच्चई कारओ जणो ॥ ३० ॥
 एयमट्ठं निसामित्ता हेऊकारणचोइओ ।
 तओ नमिं रायरिसिं देविन्दो इणमव्ववी ॥ ३१ ॥
 जे केइ पत्थिवा तुज्झं नानमन्ति नराहिवा ।
 वसे ते ठावइत्ताणं तओ गच्छसि खत्तिया ॥ ३२ ॥
 एयमट्ठं निसामित्ता हेऊकारणचोइओ ।
 तओ नमी रायरिसीं देविन्दं इणमव्ववी ॥ ३३ ॥
 जो सहस्सं सहस्साणं संगामे दुज्जए जिणे ।
 एगं जिणेज्ज अप्पाणं एस से परमो जओ ॥ ३४ ॥
 अप्पाणमेव जुज्झाहि किं ते जुज्जेण वज्झओ ।
 अप्पाणमेवमप्पाणं जइत्ता सुहमेहए ॥ ३५ ॥
 पांचिन्दियाणि कोहं माणं मायं तहेव लोहं च ।
 दुज्जयं चेव अप्पाणं सत्वं अप्पे जिए जियं ॥ ३६ ॥

एयमट्ठं निसामित्ता हेऊकारणचोइओ ।
 तओ नमिं रायरिसिं देविन्दो इणमव्ववी ॥ ३७ ॥
 जइत्ता विउले जत्ते भोइत्ता समणमाहणे ।
 दच्चा भोच्चा य जिट्ठा य तओ गच्छसि खत्तिया ॥ ३८ ॥
 एयमट्ठं निसामित्ता हेऊकारणचोइओ ।
 तओ नमी रायरिसी देविन्दं इणमव्ववी ॥ ३९ ॥
 जो सहस्सं सहस्साणं मासे मासे गवं दए ।
 तस्सावि संजमो सेओ अदिन्तस्स वि किंचण ॥ ४० ॥
 एयमट्ठं निसामित्ता हेऊकारणचोइओ ।
 तओ नमिं रायरिसिं देविन्दो इणमव्ववी ॥ ४१ ॥
 घोरासमं चइत्ताणं अन्नं पत्थेसि आसमं ।
 इहेव पोसहरओ भवाहि मणुयाहिवा ॥ ४२ ॥
 एयमट्ठं निसामित्ता हेऊकारणचोइओ ।
 तओ नमी रायरिसी देविन्दं इणमव्ववी ॥ ४३ ॥
 मासे मासे तु जौं बालो कुसग्गेण तु भुंजए ।
 न सो सुक्खायधम्मस्स कलं अग्घइ सोलसिं ॥ ४४ ॥
 एयमट्ठं निसामित्ता हेऊकारणचोइओ ।
 तओ नमिं रायरिसिं देविन्दो इणमव्ववी ॥ ४५ ॥
 हिरण्णं सुवण्णं मणिमुत्तं कंसं दूसं च वाहणं ।
 कोसं वट्ठावइत्ताणं तओ गच्छसि खत्तिया ॥ ४६ ॥
 एयमट्ठं निसामित्ता हेऊकारणचोइओ ।
 तओ नमी रायरिसी देविन्दं इणमव्ववी ॥ ४७ ॥

सुवण्णरुप्पस्स उ पव्वया भवे सिया हु केलाससमा असंखया ।
 नरस्स लुद्धस्स न तेहिं किंचि इच्छा उ आगाससमा अणन्तिया ॥ ४८ ॥

पुढवी साली जवा चेव हिरण्णं पसुभिस्सह ।
 पडिपुण्णं नालमेगस्स इइ विज्जा तवं चरे ॥ ४९ ॥

एयमट्ठं निसामित्ता हेऊकारणचोइओ ।
 तओ नमिं रायरिसिं देविन्दो इणमव्ववी ॥ ५० ॥

अच्छेरयमव्वुदए भोए चयसि पत्थिवा ।
 असन्ते कामे पत्थेसि संकप्पेण विहम्मसि ॥ ५१ ॥

एयमट्टं निसामित्ता हेऊकारणचोइओ ।
 तओ नमी रायरिसी देविन्दं इणमव्ववी ॥ ५२ ॥
 सल्लं कामा विसं कामा कामा आसीविसोवमा ।
 कामे य पत्थेमाणा अकामा जन्ति दोग्गइं ॥ ५३ ॥
 अहे वयन्ति कोहेणं माणेणं अहमा गई ।
 माया गईपडिग्घाओ लोमाओ दुहओ मयं ॥ ५४ ॥
 अवउज्झिऊण माहणरूवं विउत्विऊण इन्दत्तं ।
 वन्दइ अभित्थुणन्तो इमाहि महुराहिं वग्गूहिं ॥ ५५ ॥
 अहो ते निज्जिओ कोहो अहो माणो पराजिओ ।
 अहो निरक्किया माया अहो लोभो वसीकओ ॥ ५६ ॥
 अहो ते अज्जवं साहु अहो ते साहु मद्दवं ।
 अहो ते उत्तमा खन्ती अहो ते मुत्ति उत्तमा ॥ ५७ ॥
 इहं सि उत्तमो भन्ते पच्छा होहिसि उत्तमो ।
 लोशुत्तमुत्तमं ठाणं सिद्धिं गच्छसि नीरओ ॥ ५८ ॥
 एवं अभित्थुणन्तो रायरिसि उत्तमाए सद्धाप ।
 पयाहिणं करेन्तो पुणो पुणो वन्दइ सक्को ॥ ५९ ॥
 तो वन्दिऊण पाए चक्ककुसलक्खणे मुणिवरस्स ।
 आगासेणुप्पइओ ललियचलकुंडलतिरीढी ॥ ६० ॥
 नमी नमेइ अप्पाणं सक्खं सक्केण चोइओ ।
 चइऊण गेहं वइदेही सामण्णे पज्जुवट्ठिओ ॥ ६१ ॥
 एवं करेन्ति संबुद्धा पंडिया पवियक्खणा ।
 विणियट्ठन्ति भोगेसु जहा से नमी रायरिसि ॥ ६२ ॥ त्ति वेमि ॥

॥ नामिपव्वज्जा समत्ता ॥ ९ ॥

॥ दुमपत्तयं दशमं अध्ययनम् ॥

दुमपत्तए पण्डुयए जह्वा निवडइ राइगणाण अच्चए ।
एवं मणुयाण जीवियं समयं गोयम मा पमायए ॥ १ ॥

कुसुमगे जह्वा ओसविन्दुए थोवं चिट्ठइ लम्बमाणए ।
एवं मणुयाण जीवियं समयं गोयम मा पमायए ॥ २ ॥

इइ इत्तरियम्मि आउए जीवियए बहुपट्ठवायए ।
विहुणाहि रयं पुरे कडं समयं गोयम मा पमायए ॥ ३ ॥

डुलहे खलु माणुसे भवे चिरकालेण वि सत्त्वपाणिणं ।
गाढा य विवाग कम्मुणो समयं गोयम मा पमायए ॥ ४ ॥

पुढविक्कायमइगओ उक्कोसं जीवो उ संवसे ।
कालं संखाईयं समयं गोयम मा पमायए ॥ ५ ॥

आउक्कायमइगओ उक्कोसं जीवो उ संवसे ।
कालं संखाईयं समयं गोयम मा पमायए ॥ ६ ॥

तेउक्कायमइगओ उक्कोसं जीवो उ संवसे ।
कालं संखाईयं समयं गोयम मा पमायए ॥ ७ ॥

वाउक्कायमइगओ उक्कोसं जीवो उ संवसे ।
कालं संखाईयं समयं गोयम मा पमायए ॥ ८ ॥

वणस्सइकायमइगओ उक्कोसं जीवो उ संवसे ।
कालमणन्तदुरन्तयं समयं गोयम मा पमायए ॥ ९ ॥

बेइन्दिक्कायमइगओ उक्कोसं जीवो उ संवसे ।
कालं संखिज्जसन्नियं समयं गोयम मा पमायए ॥ १० ॥

तेइन्दिक्कायमइगओ उक्कोसं जीवो उ संवसे ।
कालं संखिज्जसन्नियं समयं गोयम मा पमायए ॥ ११ ॥

चउरिन्दिक्कायमइगओ उक्कोसं जीवो उ संवसे ।
कालं संखिज्जसन्नियं समयं गोयम मा पमायए ॥ १२ ॥

पंचिन्दिक्कायमइगओ उक्कोसं जीवो उ संवसे ॥
सत्तट्ठभवग्गहणे समयं गोयम मा पमायए ॥ १३ ॥

देवे नेरइए यमइगओ उक्कोसं जीवो उ संवसे ।
इक्केकभवग्गहणे समयं गोयम मा पमायए ॥ १४ ॥

एवं भवसंसारे संसरइ सुहासुहेहि कम्मेहिं ।

जीवां पमायबहुलो समयं गोयम मा पमायए ॥ १५ ॥

लद्धूण वि माणुसत्तणं आरिअत्तं पुणरावि इल्लहं ।

बहवे दसुया मिलक्खुया समयं गोयम मा पमायए ॥ १६ ॥

लद्धूण वि आरियत्तणं अहीणपंचिन्दियया हु इल्लहा ।

विगलिन्दियया हु दीसई समयं गोयम मा पमायए ॥ १७ ॥

अहीणपंचिन्दियत्तं पि से लहे उत्तमधम्मसुई हु इल्लहा ।

कुतित्थिनिसेवए जणे समयं गोयम मा पमायए ॥ १८ ॥

लद्धूण वि उत्तमं सुई सद्दहणा पुणरावि इल्लहा ।

मिच्छत्तनिसेवए जणे समयं गोयम मा पमायए ॥ १९ ॥

धम्मं पि हु सद्दहन्तया इल्लहया काएण फासया ।

इह कामगुणेहि मुच्छिया समयं गोयम मा पमायए ॥ २० ॥

परिजूरइ ते सरीरयं केसा पण्डुरया हवन्ति ते ।

से सोयबले य हायई समयं गोयम मा पमायए ॥ २१ ॥

परिजूरइ ते सरीरयं केसा पण्डुरया हवन्ति ते ।

से चक्खुबले य हायई समयं गोयम मा पमायए ॥ २२ ॥

परिजूरइ ते सरीरयं केसा पण्डुरया हवन्ति ते ।

से घाणबले य हायई समयं गोयम मा पमायए ॥ २३ ॥

परिजूरइ ते सरीरयं केसा पण्डुरया हवन्ति ते ।

से जिम्भबल य हायई समयं गोमय मा पमायए ॥ २४ ॥

परिजूरइ ते सरीरयं केसा पण्डुरया हवन्ति ते ।

से फासबले य हायई समयं गोमय मा पमायए ॥ २५ ॥

परिजूरइ ते सरीरयं केसा पण्डुरया हवन्ति ते ।

से सव्वबले य हायई समयं गोयम मा पमायए ॥ २६ ॥

अरई गण्डं विसूइया आयंका विविहा फुसन्ति ते ।

विहडइ विट्ठंसइ ते सरीरयं समयं गोयम मा पमायए ॥ २७ ॥

वोळिन्द सिणेहमप्पणो कुमुयं सारइयं व पाणिंयं ।

से सव्वसिणेहवज्जिए समयं गोयम मा पमायए ॥ २८ ॥

चिच्चाण धणं च भारियं पव्वइओ हि सि अणगारियं ।
 मा वन्तं पुणो वि आइए समयं गोयम मा पमायए ॥ १९ ॥
 अवउज्झिय मित्तबन्धवं विउलं चेव धणोहसंचयं ।
 मा तं बिइयं गवेसए समयं गोयम मा पमायए ॥ २० ॥
 न हु जिणे अज्ज दिस्सई बहुमए दिस्सई मग्गदेसिए ।
 संपइ नेयाउए पहे समयं गोयम मा पमायए ॥ २१ ॥
 अवसोहिय कण्टगापहं ओइण्णो सि पहं महालयं ।
 गच्छसि मग्गं विसोहिया समयं गोयम मा पमायए ॥ २२ ॥
 अबले जह भारवाहए मा मग्गे विसमे वगाहिया ।
 पच्छा पच्छाणुतावए समयं गोयम मा पमायए ॥ २३ ॥
 तिण्णो हु सि अण्णवं महं किं पुण चिट्ठसि तीरमागओ ।
 अभितुर पारं गमित्तए समयं गोयम मा पमायए ॥ २४ ॥
 अकलेवरसेणिमुस्सिया सिद्धिं गोयम लोय गच्छसि ।
 खेमं च सिवं अणुत्तरं समयं गोयम मा पमायए ॥ २५ ॥
 बुद्धे परिनिव्वुडे चरे गामगए नगरे व संजए ।
 सन्तीमग्गं च बूहए समयं गोयम मा पमायए ॥ २६ ॥
 बुद्धस्स निसम्म भासियं सुकहियमट्ठपओवसोहियं ।
 रागं दोसं च छिन्धिया सिद्धिगहं गए गोयमे ॥ २७ ॥ त्ति वेमि ॥

॥ इमपत्तयं समत्तं ॥ १० ॥

॥ बहुस्सुयपुज्जं एकादशं अध्ययनम् ॥

संजोगा विप्पमुक्कस्स अणगारस्स भिक्खुणो ।
 आयारं पाउकरिस्सामि आणुपुट्ठि सुणेह मे ॥ १ ॥
 जे यावि होइ निव्विज्जे थद्धे लद्धे अणिग्गहे ।
 अभिक्खणं उल्लवई अविणीए अबहुस्सुए ॥ २ ॥

अह पंचहिं ठाणेहिं जेहिं सिक्खां न लब्धई ।
 थम्भा कोहा पमाएणं रोगेणालस्सएण य ॥ ३ ॥
 अह अट्टहिं ठाणेहिं सिक्खासीलं त्ति वुच्चई ।
 अहस्सिरे सया दन्ते न य मम्ममुदाहरं ॥ ४ ॥
 नासीले न विसीले न सिथा अइलोलुए ।
 अकोहणे सच्चरणं सिक्खासीलं त्ति वुच्चई ॥ ५ ॥
 अह चोदसहिं ठाणेहिं वट्टमाणे उ संजए ।
 अविणीए वुच्चई सो उ निव्वाणं च न गच्छइ ॥ ६ ॥
 अभिक्खणं कोही हवइ पबन्धं च पकुवई ।
 मेत्तिज्जमाणो वमइ सुयं लद्धूण मज्जई ॥ ७ ॥
 आवि पावपरिक्खेवी अवि मित्तेसु कुप्पई ।
 सुप्पियस्सावि मित्तस्स रहे भासइ पावगं ॥ ८ ॥
 पइण्णवाई दुहिले थद्धे लुद्धे अणिग्गहे ।
 असंविभागी अचियत्ते अविणीए त्ति वुच्चई ॥ ९ ॥
 अह पन्नरसहिं ठाणेहिं सुविणीए त्ति वुच्चई ।
 नीयावत्ती अचवले अमाई अकुऊहले ॥ १० ॥
 अप्पं च अहिकिखवई पबन्धं च न कुद्वई ।
 मेत्तिज्जमाणो भयई सुयं लद्धुं न मज्जई ॥ ११ ॥
 न य पावपरिक्खेवी न य मित्तेसु कुप्पई ।
 अप्पियस्सावि मित्तस्स रहे कल्लाण भासई ॥ १२ ॥
 कलहडमरवाजिए वुद्धे अभिजाइए ।
 हिरिमं पडिसंलीणे सुविणीए त्ति वुच्चई ॥ १३ ॥
 वसे गुरुकुले निच्चं जागवं उवहाणवं ।
 पियंकरे पियंवाई से सिक्खं लद्धुमरिहई ॥ १४ ॥
 जहा संखम्मि पयं निहियं दुहंओ वि विरायइ ।
 एवं बहुस्सुए भिक्खू धम्मो किन्ती तहा सुयं ॥ १५ ॥
 जहा से कम्बोयाणं आइण्णे कन्थए सिया ।
 आसे जवेण पवरे एवं हवइ बहुस्सुए ॥ १६ ॥
 जहाइण्णसमारूढे सूरे दट्ठपरक्कमे ।
 उभओ नन्दिघोसेणं एवं हवइ बहुस्सुए ॥ १७ ॥

जहा करेणुपरिकिण्णे कुंजरे सट्ठिहायणे ।
 बलवन्ते अप्पडिहए एवं हवइ बहुस्सुए ॥ १८ ॥
 जहा से तिक्खसिंगे जायखन्धे विरायई ।
 वसहे जूहाहिवाई एवं हवइ बहुस्सुए ॥ १९ ॥
 जहा से तिक्खदाढे उदग्गे दुप्पहंसए ।
 सीहे मियाण पवरे एवं हवइ बहुस्सुए ॥ २० ॥
 जहा से वासुदेवे संखचक्कगयाधरे ।
 अप्पडिहयबले जोहे एवं हवइ बहुस्सुए ॥ २१ ॥
 जहा से चाउरन्ते चक्कवट्ठी महिहिण ।
 चोदसरयणाहिवाई एवं हवइ बहुस्सुए ॥ २२ ॥
 जहा से सहस्सक्खे वज्जपाणी पुरन्दरे ।
 सक्के देवाहिवाई एवं हवइ बहुस्सुए ॥ २३ ॥
 जहा से तिमिरविद्धंसे उच्चिदट्ठन्ते विवायरे ।
 जलन्ते इव तेएण एवं हवइ बहुस्सुए ॥ २४ ॥
 जहा से उडुवाई चन्वे नक्खत्तपरिवारिए ।
 पडिपुण्णे पुण्णमासीए एवं हवइ बहुस्सुए ॥ २५ ॥
 जहा से सामाइयाणं कोट्टागारे सुराक्खिए ।
 नाणाधक्कपडिपुण्णे एवं हवइ बहुस्सुए ॥ २६ ॥
 जहा सा इमाण पवरा जम्बू नाम सुदंसणा ।
 अणादियस्स देवस्स एवं हवइ बहुस्सुए ॥ २७ ॥
 जहा सा नईण पवरा सलिला सागरंगमा ।
 सीया नीलवन्तपवहा एवं हवइ बहुस्सुए ॥ २८ ॥
 जहा से नगाण पवरे सुमहं मन्थरे गिरी ।
 नाणोसहिपज्जलिए एवं हवइ बहुस्सुए ॥ २९ ॥
 जहा से सयंभूरमणे उदही अक्खओदए ।
 नाणारयणपडिपुण्णे एवं हवइ बहुस्सुए ॥ ३० ॥
 समुद्दगम्भीरसमा दुरासया
 अचक्किया केणइ दुप्पहंसया ।
 सुयस्स पुण्णा विउलस्स ताइणी
 खावन्तु कम्म गइसुत्तमं गया ॥ ३१ ॥

तग्हा सुयमहिट्टिज्जा उत्तमट्टगवेसए ।

जेणऽप्पाणं परं चव सिद्धिं संपाउणेज्जासि ॥ ३२ ॥ त्ति वेमि ॥

॥ बहुस्सुयपुज्जं समत्तं ॥ ११ ॥

॥ हरिणसिज्जं द्वादशं अध्ययनम् ॥

सोवागकुलसंभूओ गुणुत्तरधरो मुणी ।

हरिणसबलो नाम आसि भिक्खू जिह्निदो ॥ १ ॥

हरिणसणभासाए उच्चारसमिहंसु य ।

जओ आयाणनिक्खेवे संजओ सुसमाहिओ ॥ २ ॥

मणगुत्तो वयगुत्तो कायगुत्तो जिह्निदो ।

भिक्खट्ठा बम्भइज्जम्मि जच्चवाडं उवट्ठिओ ॥ ३ ॥

तं पासिऊणमेज्जन्तं तवेण परिसोसियं ।

पन्तोवाहिउवगरणं उवहसन्ति अणारिया ॥ ४ ॥

जाईमयपडिबद्धा हिंसगा अजिह्निदया ।

अवम्मचारिणो बाला इमं वयणमद्ववी ॥ ५ ॥

कयरे आगच्छइ दित्तरूवे काले विगराले फोक्कनासे ।

ओमचेलए पंसुपिसायभूए संकरदूसं परिवरिय कण्ठे ॥ ६ ॥

को रे तुवं इय अदंसणिज्जे काए व आसाइहमागओ सि ।

ओमचेलगा पंसुपिसायभूया गच्छ वखलाहि किमिहं ठिओ सि ॥ ७ ॥

जक्खे तर्हि तिन्दुरुक्खवासी अणुकम्पओ तस्स महामुणस्स ।

पच्छायइत्ता नियगं सरीरं इमाई वयणाइमुदाहारित्था ॥ ८ ॥

समणो अहं संजओ बम्भयारी विरओ धणपयणपरिग्गहाओ ।

परप्पवित्तस्स उ भिक्खकाले अन्नस्स अट्ठा इहमागओ मि ॥ ९ ॥

वियरिज्जइ खज्जइ भुज्जई य अन्नं पभूयं भवयाणमेयं ।

जाणेह मे जायणजीविणु त्ति सेसावसेसं लभऊ तवस्सी ॥ १० ॥

उवक्खडं भोयण माहणाणं अत्तट्ठियं सिद्धमिहेगपक्खं ।

न ऊ वयं एरिसमन्नपाणं दाहामु तुज्झं किमिहं ठिओ सि ॥ ११ ॥

थलेसु बीयाइं ववन्ति कासगा तहेव निन्नेसु य आससाए ।
 एयाह सद्धाए दलाह मज्झं आराहए पुण्णमिणं खु खेत्तं ॥ १२ ॥
 खेत्ताणि अम्हं विइयाणि लोए जहिं पकिण्णा विरुहन्ति पुण्णा ।
 जे माहणा जाइविज्जोववेया ताइं तु खेत्ताइं सुपेसलाइं ॥ १३ ॥
 कोहो य माणो य वहो य जेसिं मोसं अदत्तं च परिग्गहं च ।
 ते माहणा जाइविज्जाविहूणा ताइं तु खेत्ताइं सुपावयाइं ॥ १४ ॥
 तुब्भेत्थ भो भारधरा गिराणं अट्ठं न जाणेह अहिज्ज वेए ।
 उच्चावयाइं मुणिणो चरन्ति ताइं तु खेत्ताइं सुपेसलाइं ॥ १५ ॥
 अज्झावयाणं पडिकूलभासी पभाससे किं तु सगासि अम्हं ।
 अवि एयं विणस्सउ अन्नपाणं न य णं दाहासु तुमं नियण्ठा ॥ १६ ॥
 समिईहि मज्झं सुसमहि यस्स गुत्तीहि गुत्तस्स जिइन्दियस्स ।
 जइ मे न दाहित्थ अहेसणिज्जं किमज्ज जन्नाण लहित्थ लाहं ॥ १७ ॥
 के एत्थ खत्ता उवजोइया वा अज्झावया वा सह खण्डिएहिं ।
 एयं दण्डेण फलएण हन्ता कण्ठम्मि घेत्तूण खलेज्ज जो णं ॥ १८ ॥
 अज्झावयाणं वयणं सुणेत्ता उद्धाइया तत्थ बहू कुमारा ।
 षण्डेहि वित्तेहि कसेहि चेव समागया तं इसि तालयन्ति ॥ १९ ॥
 रज्जो तहिं कोसलियस्स धूया भद्द-त्ति नामेण अणिन्वियंगी ।
 तं पासिया संजय हम्ममाणं कुद्धे कुमारे परिनिव्ववेह ॥ २० ॥
 देवाभिओगेण निओइएणं दिन्ना सु रत्ता मणसा न ज्ञाया ।
 नरिन्ददेविन्दऽभिवन्दिणं जेणम्हि वन्ता इसिणा स एसो ॥ २१ ॥
 एसो हु सो उग्गतवो महप्पा जिइन्दिओ संजओ वम्भयारी ।
 जो मे तया नेच्छइ दिज्जमार्णि पिउणा सयं कोसलिएण रत्ता ॥ २२ ॥
 महाजसो एस महाणुभागो घोरद्वओ घोरपरक्कमो य ।
 मा एयं हीलह अहीलणिज्जं मा सव्वे तैएण भे निद्वहेज्जा ॥ २३ ॥
 एयाइं तीसे वयणाइं सोच्चा पत्तीइ भद्दाइ सुहासियाइं ।
 इसिस्स वेयावडियट्ठयाए जक्खा कुमारे विणिवारयन्ति ॥ २४ ॥
 ते घोररूवा ठिय अन्तलिक्खेऽसुरा तहिं तं जणं तालयन्ति ।
 ते भिन्नदेहे रुहिरं वमन्ते पासित्तु भद्दा इणमाहु भुज्जो ॥ २५ ॥
 गिरिं नहेहिं खणह अयं दन्तेहिं खायह ।
 जायतेयं पाणहि हणह जे भिक्खुं अवमन्नह ॥ २६ ॥

आसीविसो उगगतवो महेसी घोरव्वओ घोरपरक्कमो य ।
 अगणिं व पक्खन्द पयंगसेणा जे भिक्खुयं भत्तकाले वहेह ॥ २७ ॥
 सीसेण एयं सरणं उवेह समागया सम्बज्जेण तुम्भे ।
 जइ इच्छह जीवियं वा धणं वा लोगं पि एसो कुविओ डहेउजा ॥ २८ ॥
 अवहेडिय पिट्टिसउत्तमंगे पसारियाबाहुअकम्मचेट्टे ।
 निज्झेरियच्छे रुहिरं वमन्ते उट्ठंमुहे निग्गयजीहनेत्ते ॥ २९ ॥
 ते पासिया खण्डिय कट्ठभूए विमणो विसण्णो अह माहणो सो ।
 इसिं पसाएइ समारियाओ हीलं च निन्दं च खमाह भन्ते ॥ ३० ॥
 बालेहि मूढेहि अयाणएहिं जं हीलिया तस्स खमाह भन्ते ।
 महप्पसाया इसिणो हवन्ति न इ मुणी कोवपरा हवन्ति ॥ ३१ ॥
 पुर्विं च इण्हिं च अप्पगयं च मणप्पदोसो न मे अत्थि कोइ ।
 जक्खा हु वेयावडियं करेन्ति तम्हा हु एए निहया कुमारा ॥ ३२ ॥
 अत्थं च धम्मं च वियाणमाणा तुम्भे न वि कुप्पह भूइप्पत्ता ।
 तुम्भं तु पाए सरणं उवेमो समागया सम्बज्जेण अम्हे ॥ ३३ ॥
 अच्चेमु ते महाभाग न ते किंचि न अच्चिमो ।
 भुंजाहि सालिमं कूरं नाणावंजणसंजुयं ॥ ३४ ॥
 इमं च मे अत्थि पभूयमच्चं तं भुंजसू अम्ह अणुग्गहट्ठा ।
 बाढं ति पडिच्छइ भत्तपाणं मासस्स ऊ पारणए महप्पए ॥ ३५ ॥
 ताहियं गन्धोदयपुप्फवासं दिव्वा तहिं वसुहारा य बुट्ठा ।
 पइयाओ दुन्दुहीओ सुरोहिं आगासे अहो दाणं च घुट्ठं ॥ ३६ ॥
 सक्खं खु दीसइ तवोविसेसो न दीसई जाइविसेस कोई ।
 सोवागपुत्तं हरिएससाहुं जस्सेरिसा इट्ठि महाणुभागा ॥ ३७ ॥
 किं माहणा जोइसमारभन्ता उदण्ण सोहिं बहिया विमग्गह ।
 जं मग्गहा बाहिरियं विसोहिं न तं सुदिट्ठं कुसला वयन्ति ॥ ३८ ॥
 कुसं च जूवं तणकट्टमग्गिं सायं च पायं उदगं फुसन्ता ।
 पाणाइं भूयाइं विहेडयन्ता भुज्जो वि मन्दा पगरेह पावं ॥ ३९ ॥
 कहं चरे भिक्खु वयं जयामो पावाइं कम्माइं पणोल्लयामो ।
 अक्खाहि जे संजय जक्खपूइया कहं सुजट्ठं कुसला वयन्ति ॥ ४० ॥
 छज्जीवकाए असमारभन्ता मोसं अवत्तं च असेवमाणा ।
 परिग्गहं इत्थिओ माणमायं एयं परिक्काय चरन्ति वन्ता ॥ ४१ ॥

सुसंवुडा पंचहिं संवरेहिं इह जीवियं अणवकंसमाणा ।
 वोसट्टकाए सुइच्चत्तदेहा महाजयं जयई जल्लसिट्ठं ॥ ४१ ॥
 के ते जोई के व ते जोइठाणे का ते सुया किं व ते कारिसंगं ।
 एहा य ते कयरा सन्ति भिक्खू कयरेण होमेण हुणासि जोई ॥ ४२ ॥
 तवो जोई जीवो जोइठाणं जोगा सुया सरीरं कारिसंगं ।
 कम्मं एहा संजमजोगसन्ती होमं हुणामि इसिणं पसत्थं ॥ ४३ ॥
 के ते हरए के य ते सन्तितित्थे कहिं सिणाओ व रयं जहासि ।
 आइक्ख णे संजय जक्खपूइया इच्छामो नाउं भवओ सगासे ॥ ४४ ॥
 धम्मे हरए बम्मे सन्तितित्थे अणाविले अत्तपसन्नलेसे ।
 जहिं सिणाओ विमलो विसुद्धो सुसीइभूओ पजहामि दोसं ॥ ४५ ॥
 एयं सिणाणं कुसलेहिं विट्ठं महासिणाणं इसिणं पसत्थं ।
 जहिं सिणाया विमला विसुद्धा महारिसी उत्तमं ठाण पत्त ॥ ४६ ॥
 त्ति वेमि ॥

॥ हरिणसिज्जं समत्तं ॥ १२ ॥

॥ चित्तसम्भूज्जं त्रयोदशं अध्ययनम् ॥

जाईपराइओ खलु कासि नियाणं तु हात्थिणपुरास्मि ।
 बुलणीए बम्भदत्तो उववन्नो पउमगुम्माओ ॥ १ ॥
 कम्पिल्ले संभूओ चित्तो पुण जाओ पुरिमतालास्मि ।
 सेट्ठिकुलस्मि विसाले धम्मं सोऊण पव्वइओ ॥ २ ॥
 कम्पिल्लास्मि य नयरे समागया दो वि चित्तसम्भूया ।
 सुहइक्खफलाविवागं कहेन्ति ते एक्कमेक्कस्स ॥ ३ ॥
 चक्कवट्ठी महिद्धीओ बम्भदत्तो महायसो ।
 भायरं बहुमाणेणं इमं वयणमन्ववी ॥ ४ ॥
 आसिमो भायरो दो वि अन्नमन्नवसाणुगा ।
 अन्नमन्नमणूरत्ता अन्नमन्नहिणसिणो ॥ ५ ॥
 दासा दसण्णे आसी मिया कालिंजरे नगै ।
 हंसा मयंगतीरे सोवागा कासिभूमिए ॥ ६ ॥

देवा य देवलोगमि आसि अम्हे महिद्धिया ।

इमा नो छाट्टिया जाई अन्नमन्नेण जा विणा ॥ ७ ॥

कम्मा नियाणप्पगडा तुमे राय विचिन्तिया ।

तेसिं फलविवागेण विप्पओगमुवागया ॥ ८ ॥

सच्चसोयप्पगडा कम्मा मए पुरा कडा ।

ते अज्ज परिभुंजामो किं नु चित्ते वि से तहा ॥ ९ ॥

सत्त्वं सुचिण्णं सफलं नराणं कडाण कम्माण न मोक्ख अत्थि ।

अत्थेहि कामोहि य उत्तमेहिं आया ममं पुण्णफलोववेए ॥ १० ॥

जाणाहि संभूय महाणुभागं महिद्धियं पुण्णफलोववेयं ।

चित्तं पि जाणाहि तहेव रायं इद्धी जुई तस्स वि य प्पभूया ॥ ११ ॥

महत्थरूवा वयणप्पभूया गाहाणुगीया नरसंघमज्जे ।

जं भिक्खुणो सीलगुणोववेया इहं जयन्ते समणो मि जाओ ॥ १२ ॥

उच्चोयए महु कक्के य वम्मे पवेइया आवसहा य रम्मा ।

इमं गिहं चित्तधणप्पभूयं पसाहि पंचालगुणोववेयं ॥ १३ ॥

नट्टेहि गीपहि य वाइएहिं नारीजणाहिं परियारयन्तो ।

भुंजाहि भोगाई इमाई भिक्खू मम रोयई पव्वज्जा हु दुक्खं ॥ १४ ॥

तं पुट्ठनेहेण कयाणुरागं नराहिवं कामगुणेषु गिद्धं ।

धम्मस्सिओ तस्स हियाणुपेही चित्तो इमं वयणमुदाहरित्था ॥ १५ ॥

सत्त्वं विलवियं गीयं सत्त्वं नट्टं विडम्बियं ।

सत्त्वे आभरणा भारा सत्त्वे कामा दुहावहा ॥ १६ ॥

बालाभिरामेसु दुहावहेसु न तं सुहं कामगुणेषु रायं ।

विरत्तकामाण तवोहणाणं जं भिक्खुणं सीलगुणे रयाणं ॥ १७ ॥

नरिंद जाई अहमा नराणं सोवागजाई दुहओ गयाणं ।

जहिं वयं सव्वजणस्स वेस्सा वसीय सोवागनिवेसणेसु ॥ १८ ॥

तीसे य जाईउ उ पावियाए वुच्छामु सोवागनिवेसणेसु ।

सव्वस्स लोगस्स दुगंछाणेज्जा इहं तु कम्माई पुरे कडाई ॥ १९ ॥

सो दाणि सिं राय महाणुभागो महिद्धिओ पुण्णफलोववेओ ।

चइत्तु भोगाई असासयाई आयाणहेउं अभिणिक्खमाहि ॥ २० ॥

इह जीविए राय असासयमि धणियं तु पुण्णाई अकुव्वमाणो ।

से सोयई मच्चुमुहोवणीए धम्मं अकाऊण परंसि लोए ॥ २१ ॥

जहेह सीहो व मियं गहाय मच्चू नरं नेइ हु अन्तकाले ।
 न तस्स माया व पिया व भाया कालम्मि तम्मंसहरा भवन्ति ॥ ११ ॥
 न तस्स दुक्खं विभयन्ति नाइओ न मित्तवग्गा न सुया न बन्धवा ।
 एक्को सयं पच्चणुहोइ दुक्खं कत्तारमेव अणुजाइ कम्मं ॥ १२ ॥
 चेच्चा दुपयं च चउप्पयं च खेत्तं गिहं धणधन्नं च सत्त्वं ।
 सकम्मवीओ अवसो पयाइ परं भवं सुंदर पावगं वा ॥ १४ ॥
 तं इक्कगं तुच्छसरीरगं से चिईगयं डज्झिय पावगेणं ।
 भज्जा य पुत्ता वि य नायओ य दायारमच्चं अणुसंकमन्ति ॥ १५ ॥
 उवणिज्जइ जीवियमप्पमायं वण्णं जरा हरइ नरस्स राख ।
 पंचालराया वयणं सुणाहि मा कासि कम्माइं महालयाइं ॥ १६ ॥
 अहं पि जाणामि जहेह साह् जं मे तुमं साहसि वक्कमेयं ।
 भोगा इमं संगकरा हवन्ति जे दुज्जथा अज्जो अम्हारिसेहिं ॥ १७ ॥
 हत्थिणपुरम्मि चित्ता दट्ठुणं नरवइं महिद्धियं ।
 कामभोगेसु गिद्धेणं नियाणमसुहं कडं ॥ १८ ॥
 तस्स मे अपडिकन्तस्स इमं एयारिसं फलं ।
 जाणमाणो वि जं धम्मं कामभोगेसु मुच्छिओ ॥ १९ ॥
 नागो जहा पंकजलावसन्नो वट्ठुं थलं नाभिसमेइ तीरं ।
 एवं वयं कामगुणेसु गिद्धा न भिक्खुणो मग्गमणुव्वयामो ॥ २० ॥
 अच्चेइ कालो तूरन्ति राइओ न यावि भोगा पुरिसाण निच्चा ।
 उविच्च भोगा पुरिसं चवन्ति इमं जहा खीणफलं व पक्खी ॥ २१ ॥
 जइ तं सि भोगे चइउं असत्तो अज्जाइं कम्माइं करेहि रायं ।
 धम्मे ठिओ सव्वपयाणुकम्पी तो होहिसि देवो इओ विउव्वी ॥ २२ ॥
 न तुज्झ भोगे चइऊण बुद्धी गिद्धो सि आरम्भपरिग्गहेसु ।
 मोहं कओ एत्तिउ विप्पलावो गच्छामि रायं आमन्तिओ सि ॥ २३ ॥
 पंचालराया वि य बम्भदत्तो साहुस्स तस्स वयणं अकाउं ।
 अणुत्तरं भुजिय कामभोगे अणुत्तरं सो नरए पविट्ठो ॥ २४ ॥
 चित्ता वि कामेहि विरत्तकामो उदग्गचारित्ततवो महेसी ।
 अणुत्तरं संजम पालइत्ता अणुत्तरं सिद्धिगइं गओ ॥ २५ ॥ ति वेमि ॥
 ॥ चित्तसंभूज्जं समत्तं ॥ १३ ॥

॥ उसुयारिजं चतुर्दशं अध्ययनम् ॥

देवा भवित्ताण पुरे भवम्मी केई चुया एगविमाणवासी ।
पुरे पुराणे उसुयारनामं खाए समिद्धे सुरलोगरम्मे ॥ १ ॥

सकम्मसेसेण पुराकएणं कुलेसुदग्गेसु य ते पस्या ।
निव्विण्णसंसारभया जहाय जिणिन्दमगं सरणं पवन्ना ॥ २ ॥

पुमत्तमागम्म कुमार दो बी पुरोहिओ तस्स जसा य पत्ती ।
विस्सालकित्ती य तहोसुयारो रायत्थ देवी कमलावई य ॥ ३ ॥

जाईजरामच्चुभयाभिभूया बहिंविहाराभिनिविट्ठचित्ता ।
संसारचक्रस्स विमोक्खणट्ठा दट्ठूण ते कामगुणे विरत्ता ॥ ४ ॥

पियपुत्तगा दोन्नि वि माहणस्स सकम्मसीलस्स पुरोहियस्स ।
सरित्तु पोरानिय तत्थ जाई तहा सुचिण्णं तवसंजमं च ॥ ५ ॥

ते कामभोगेसु असज्जमाणा माणुस्सएसुं जे यावि दिव्वा ।
मोक्खाभिकंखी अभिजायसट्ठा ताथं उवागम्म इमं उदाहु ॥ ६ ॥

असासयं दट्ठ इमं विहारं बहुअन्तरायं न य वीहमाउं ।
तम्हा गिहंसि न रइं लहामो आमन्तयामो चरिस्सामु मोणं ॥ ७ ॥

अह तायगो तत्थ मुणीण तेसिं तवस्स वाधायकरं वयासी ।
इमं वयं वेयविओ वयन्ति जहा न होई असुयाण लोगो ॥ ८ ॥

अहिज्ज वेए परिविस्स विप्पे पुत्ते परिट्ठप्प गिहंसि जाया ।
भोच्चाण भोए सह इत्थियाहिं आरण्णगा होह मुणी पसत्था ॥ ९ ॥

सोयगिणा आबग्गुणिन्धणेणं मोहाणिला पज्जलणाहिणं ।
संतत्तभावं परित्ठप्पमाणं लालप्पमाणं बहुहा बहुं च ॥ १० ॥

पुरोहियं तं कमसोऽणुणन्तं निमंतयन्तं च सुए धणेणं ।
जहक्कमं कामगुणेहि चैव कुमारगा ते पसमिक्ख वक्कं ॥ ११ ॥

वेया अहीया न भवन्ति ताणं भुत्ता दिया निन्ति तमं तमेणं ।
जाया य पुत्ता न हवन्ति ताणं को णाम ते अणुमञ्जेज्ज एयं ॥ १२ ॥

खणमत्तसोक्खा बहुकालदुक्खा पगामदुक्खा अणिगामसोक्खा ।
संसारमोक्खस्स विपक्खभूया खाणी अणत्थाण उ कामभोगा ॥ १३ ॥

परित्वयन्ते अणियत्तकामे अहो य राओ परितप्पमाणे ।
 अन्नप्पमत्ते धणमेसमाणे पप्पोति मच्चुं पुरिसे जरं च ॥ १४ ॥
 इमं च मे अत्थि इमं च नत्थि इमं च मे किच्च इमं अकिच्चं ।
 तं एवमेवं लालप्पमाणं हरा हरंति त्ति कहं पमाए ॥ १५ ॥
 धणं पभूयं सह इत्थियाहिं सयणा तथा कामगुणा पगामा ।
 तवं कए तप्पइ जस्स लोगो तं सव्व साहीणमिहेव तुढं ॥ १६ ॥
 धणेण किं धम्मधुराहिगारे सयणेण वा कामगुणेहि चेव ।
 समणा भविस्सामु गुणोहधारी बहिंविहारा अभिगम्म भिक्खं ॥ १७ ॥
 जहा य अग्गी अरणी असन्तो खीरे घयं तेल्लमहा तिलेसु ।
 एमेव ताया सरीरंसि सत्ता संमुच्छई नासइ नावचिट्ठे ॥ १८ ॥
 नो इन्दियग्गेज्झ अमुत्तभावा अमुत्तभावा वि य होइ निच्चो ।
 अज्झत्थहेउं निययस्स बन्धो संसारहेउं च वयन्ति बन्धं ॥ १९ ॥
 जहा वयं धम्ममजाणमाणा पावं पुरा कम्ममकासि मोहा ।
 ओरुज्झमाणा परिरक्खियन्ता तं नेव भुज्जो वि समायरामो ॥ २० ॥
 अब्भाहयंमि लोगंमि सव्वओ परिवारिए ।
 अमोहाहिं पडन्तीहिं गिहंसि न रइं लभे ॥ २१ ॥
 केण अब्भाहओ लोगो केण वा परिवारिओ ।
 का वा अमोहा वुत्ता जाया चिंतावरो हुमि ॥ २२ ॥
 मच्चुणाऽब्भाहओ लोगो जराए परिवारिओ ।
 अमोहा रयणी वुत्ता एवं ताय वियाणह ॥ २३ ॥
 जा जा वच्चइ रयणी न सा पडिनियत्तई ।
 अहम्मं कुणमाणस्स अफला जन्ति राइओ ॥ २४ ॥
 जा जा वच्चइ रयणी न सा पडिनियत्तई ।
 धम्मं च कुणमाणस्स सफला जन्ति राइओ ॥ २५ ॥
 एगओ संवसित्ताणं दुहओ सम्मत्तसंजुथा ।
 पच्छा जाया गमिस्सामो भिक्खमाणा कुले कुले ॥ २६ ॥
 जस्सत्थि मच्चुणा सक्खं जस्स चऽत्थि पलायणं ।
 जो जाणे न मरिस्सामि सो हु कंखे सुए सिया ॥ २७ ॥
 अज्जेव धम्मं पडिवज्जयामो जहिं पवन्ता न पुण्णवामो ।
 अणागयं नेव य अत्थि किंचि सद्धाखमं णे विणइत्तु रागं ॥ २८ ॥

पहीणपुत्तस्स हु वत्थि वासो वासिट्ठि भिक्खायरियाइ कालो ।
 साहाहि रुक्खो लहए समहिं छिन्नाहि साहाहि तमेव खाणुं ॥ २९ ॥
 पंखाविहूणो द्व जहेव पक्खी भिच्चविहूणो द्व रणे नरिन्दो ।
 विवन्नसारो वणिओ द्व पोए पहीणपुत्तो मि तहा अहं पि ॥ ३० ॥
 सुसंभिया कामगुणा इमे ते संपिण्डिया अगगरसप्पभूया ।
 भुंजामु ता कामगुणे पगामं पच्छा गमिस्सामु पहाणमगं ॥ ३१ ॥
 भुत्ता रसा भोइ जहाइ णे वओ न जीवियट्ठा पजहामि भोए ।
 लाभं अलामं च सुहं च दुक्खं संचिक्खमाणो चरिस्सामि मोणं ॥ ३२ ॥
 मा हू तुमं सोयरियाण सम्भरे जुण्णो व हंसो पडिसोत्तगामी ।
 भुंजाहि भोगाई मए समाणं दुक्खं खु भिक्खायरियाविहारो ॥ ३३ ॥
 जहा य भोई तणुयं भुयंगो निम्मोयणिं हिच्च पलेइ सुत्तो ।
 एमेए जाया पयहन्ति भोए ते हं कहं नाणुगमिस्समेक्को ॥ ३४ ॥
 छिन्दित्तु जालं अबलं व रोहिया मच्छा जहा कामगुणे पहाय ।
 धोरियसीला तवसा उदारा धीरा हु भिक्खायरियं चरन्ति ॥ ३५ ॥
 नहेव कुंचा समइक्कमन्ता तयाणि जालाणि दलित्तु हंसा ।
 पलेन्ति पुत्ता य पई य मज्झं ते हं कहं नाणुगमिस्समेक्का ॥ ३६ ॥
 पुरोहियं तं ससुयं सदारं सोत्तवाऽभिनिक्खम्म पहाय भोए ।
 कुडुम्बसारं विउलुत्तमं च रायं अभिक्खं समुवाय देवी ॥ ३७ ॥
 वन्तासी पुरिसो रायं न सो होइ पसंसिओ ।
 माहणेण परिच्चत्तं धणं आदाउमिच्छसि ॥ ३८ ॥
 सत्वं जगं जइ तुहं सत्वं वावि धणं भवे ।
 सत्वं पि ते अपज्जत्तं नेव ताणाय तं तव ॥ ३९ ॥
 मरिहिसि रायं जया तया वा मणोरमे कामगुणे विहाय ।
 एक्को हु धम्मो नरदेव ताणं न विज्झई अन्नमिहेह किंचि ॥ ४० ॥
 नाहं रमे पक्खिणि पंजरे वा संताणछिन्ना चरिस्सामि मोणं ।
 अर्किचणा उज्जुकढा निरामिसा परिग्गहारग्गभनियत्तदोस! ॥ ४१ ॥
 दवगिणा जहा रणे डज्झमाणेसु जन्तुसु ।
 अन्ने सत्ता पमोयन्ति रागद्वोसवसं गया ॥ ४२ ॥
 एवमेव वयं मूढा कामभोगेसु मुच्छिय्या ।
 डज्झमाणं न बुज्झामो रागद्वोसगिणा जगं ॥ ४३ ॥

भोगे भोच्चा वमित्ता य लहुभूयविहारिणो ।
 आमोयमाणा गच्छन्ति दिया कामकमा इव ॥ ४४ ॥
 इमे य बद्धा फन्दन्ति मम हत्थऽज्जमागया ।
 वयं च सत्ता कामेसु भविस्सामो जहा इमे ॥ ४५ ॥
 सामिसं कुललं दिस्स बज्जमाणं निरामिसं ।
 आमिसं सव्वमुज्झित्ता विहारिस्सामो निरामिसा ॥ ४६ ॥
 गिद्धोवमा उ नञ्चाणं कामे संसारवट्टणे ।
 उरगो सुवण्णपासे व्व संकमाणो तणुं चरे ॥ ४७ ॥
 नामो व्व बन्धणं छित्ता अप्पणो वसहिं व्वए ।
 पयं पच्छं महारायं उसुयारि ति मे सुव्वं ॥ ४८ ॥
 चइत्ता विउलं रज्जं कामभोगे च इच्छए ।
 निब्बिसया निरामिसा निज्जेहा निप्परिग्गहा ॥ ४९ ॥
 सम्मं धम्मं वियाणित्ता चेच्चा कामगुणे वरे ।
 तवं पगिज्जऽहक्खायं घोरं घोरपरक्कम्मा ॥ ५० ॥
 एवं ते कमसो बुद्धा सव्वे धम्मपरायणा ।
 जम्ममच्चुभउव्विग्गा इक्खस्सन्तगवेसिणो ॥ ५१ ॥
 सासणे विगयमोहाणं पुर्व्वं भावणभाविया ।
 अचिरेणेव कालेण इक्खस्सन्तमुवागया ॥ ५२ ॥
 राया सह देवीए माहणो य पुरोहिओ ।
 माहणी दारगा चेव सव्वे ते परिनिव्वुड ॥ ५३ ॥ ति वेमि ॥

॥ उसुयारिज्जं समत्तं ॥ १४ ॥

॥ समिक्खु पञ्चदशं अध्ययनम् ॥

मोणं चरिस्सामि समिक्ख धम्मं सहिए उज्जुकडे नियणाछिजे ।
 संथवं जहिज्ज अकामकामे अन्नायएसी परिव्वए स भिक्खु ॥ १ ॥
 राओवरयं चरेज्ज लाढे विरए वेयवियाऽऽवरक्खिए ।
 पत्ते अभिभूय सव्वर्दसी जे कम्मि चि न मुच्छिए स भिक्खु ॥ २ ॥

अक्रोसवहं विइत्तु धीरे मुणी चरे लाढे निच्चमायगुत्ते ।
 अव्वगमणे असंपहिट्ठे जे कसिणं अहियासए स भिक्खू ॥ ३ ॥
 पन्तं सयणासणं भइत्ता सीउण्हं विविहं च दंसमसमं ।
 अव्वगमणे असंपहिट्ठे जे कसिणं अहियासए स भिक्खू ॥ ४ ॥
 नो सक्कईमिच्छई न पूयं नो वि य वन्दणं कुओ पसंसं ।
 से संजए सुव्वए तवस्सी सहिए आयगवेसए स भिक्खू ॥ ५ ॥
 जेण पुण जहाइ जीवियं मोहं वा कसिणं नियच्छई ।
 नरनारिं पजहे सया तवस्सी न य कोऊहलं उवेइ स भिक्खू ॥ ६ ॥
 छिन्नं सरं भोमं अन्तलिकखं सुमिणं लक्खणदण्डवत्थुविज्जं ।
 अंगवियारं सरस्स विजयं जे विज्जाहिं न जीवइ स भिक्खू ॥ ७ ॥
 मन्तं मूलं विविहं बेज्जचिन्तं वमणविरेयणधूमणेत्तसिसाणं ।
 आउरे सरणं तिगिच्छियं च तं परिक्काय परिव्वए स भिक्खू ॥ ८ ॥
 खत्तियगणउग्गरायपुत्ता माहणभोइय विविहा य सिप्पिणो ।
 नो तेसिं वयइ सिलोगपूयं तं परिक्काय परिव्वए स भिक्खू ॥ ९ ॥
 गिहिणो जे पव्वइएण विट्ठा अप्पवइएण व संथुया हविज्जा ।
 तेसिं इहलोइयफलट्ठा जो संथवं न करेइ स भिक्खू ॥ १० ॥
 सयणासणपाणभोयणं विविहं खाइमसाइमं परेसिं ।
 अदए पडिसेहिए नियण्ठे जे तत्थ न पउस्सई स भिक्खू ॥ ११ ॥
 जं किं चि आहारपाणजायं विविहं खाइमसाइमं परेसिं लद्धं ।
 जो तं तिविहेण नाणुकम्पे मणवयकायसुसंवुडे स भिक्खू ॥ १२ ॥
 आयामगं चेव जवोदणं च सीयं सोवीरजवोदणं च ।
 नो हीलए पिण्डं नीरसं तु पन्तकुलाइं परिव्वए स भिक्खू ॥ १३ ॥
 सट्ठा विविहा भवन्ति लोए दिव्वा माणुस्सगा तिरिच्छा ।
 भीमा भयभेरेवा उराला जो सोच्चा न विहिज्जई स भिक्खू ॥ १४ ॥
 वादं विविहं समिच्च लोए सहिए खेयाणुगए य कोवियप्पा ।
 पत्ते अभिभूय सव्वदंसी उवसन्ते अविहेडए स भिक्खू ॥ १५ ॥
 असिप्पजीवी अगिहे अमित्ते जिइन्दिए सव्वओ विप्पमुक्के ।
 अणुक्कसाई लहुअप्पभक्कती चेच्चा गिहं एगचरे स भिक्खू ॥ १६ ॥
 त्ति वेमि ॥

५ सभिक्खुयं नाम समत्तं ॥ १५ ॥

॥ बम्भचेरसमाहिठाणा षोडशं अध्ययनम् ॥

सुयं मे आउसं तेणं भगवया एवमकखायं । इह खलु थेरेहिं भगवन्तेहिं दस बम्भचेरसमाहिठाणा पन्नत्ता जे भिक्खू सोच्चा निसम्म संजमबहुले संवरबहुले समाहिबहुले गुत्ते गुत्तिन्दिए गुत्तबम्भयारी सया अप्पमत्ते विहरेज्जा । कयरे खलु ते थेरेहिं भगवन्तेहिं दस बम्भचेरसमाहिठाणा पन्नत्ता जे भिक्खू सोच्चा निसम्म संजमबहुले संवरबहुले समाहिबहुले गुत्ते गुत्तिन्दिए गुत्तबम्भयारी सया अप्पमत्ते विहरेज्जा ॥ इमे खलु ते थेरेहिं भगवन्तेहिं दस बम्भचेरसमाहिठाणा पन्नत्ता जे भिक्खू सोच्चा निसम्म संजमबहुले संवरबहुले समाहिबहुले गुत्ते गुत्तिन्दिए गुत्तबम्भयारी सया अप्पमत्ते विहरेज्जा । तं जहा । विवित्ताइं सयणासणाइं सेवित्ता हवइ से निगगन्थे । नो इत्थीपसुपण्डगसंसत्ताइं सयणासणाइं सेवित्ता हवइ से निगगन्थे । तं कहमिति चे । आयरियाह । निगगन्थस्स खलु इत्थीपसुपण्डगसंसत्ताइं सयणासणाइं सेवमाणस्स बम्भयारिस्स बम्भचेरे संका वा कंखा वा विइगिच्छा वा समुप्पज्जिज्जा भेदं वा लभेज्जा उम्मायं वा पाउणिज्जा दीहकालियं वा रोगायकं हवेज्जा केवलपन्नत्ताओ धम्माओ भंसेज्जा । तम्हा नो इत्थीपसुपण्डगसंसत्ताइं सयणासयाइं सेवित्ता हवइ से निगगन्थे ॥ १ ॥

नो इत्थीणं कहं कहित्ता हवइ से निगगन्थे । ते कहमिति चे । आयरियाह । निगगन्थस्स खलु इत्थीणं कहं कहेमाणस्स बम्भयारिस्स बम्भचेरे संका वा कंखा वा विइगिच्छा वा समुप्पज्जिज्जा भेदं वा लभेज्जा उम्मायं वा पाउणिज्जा दीहकालियं वा रोगायकं हवेज्जा केवलपन्नत्ताओ धम्माओ भंसेज्जा । तम्हा नो इत्थीणं कहं कहेज्जा ॥ २ ॥

नो इत्थीणं सद्धिं सन्निसेज्जागए विहरित्ता हवइ से निगगन्थे । ते कहमिति चे । आयरियाह । निगगन्थस्स खलु इत्थीहिं सद्धिं सन्निसेज्जागयस्स बम्भयारिस्स बम्भचेरे संका वा कंखा वा विइगिच्छा वा समुप्पज्जिज्जा भेदं वा लभेज्जा उम्मायं वा पाउणिज्जा दीहकालियं वा रोगायकं हवेज्जा केवलपन्नत्ताओ धम्माओ भंसेज्जा । तम्हा खलु नो निगगन्थे इत्थीहिं सद्धिं सन्निसेज्जागए विहरेज्जा ॥ ३ ॥

नो इत्थीणं इन्दियाइं मणोहराइं मणोरमाइं आलोइत्ता निज्झाइत्ता हवइ से निगगन्थे । तं कहमिति चे । आयरियाह । निगगन्थस्स खलु इत्थीणं इन्दियाइं मणोहराइं मणोरमाइं आलोपमाणस्स निज्झायमाणस्स

बम्भयारिस्स बम्भचेरे संका वा कंखा वा विइगिच्छा वा समुप्पज्जिज्जा भेदं वा लभेज्जा उम्मायं वा पाउणिज्जा दीहकालियं वा रोगायकं हवेज्जा केवल्लिपन्नत्ताओ धम्माओ भंसेज्जा । तम्हा खलु नो निगगन्थे इत्थीणं इन्दियाइं मणोहराइं मणोरमाइं आलोएज्जा निज्जाएज्जा ॥ ४ ॥

नो इत्थीणं कुडुन्तरंसि वा दूसन्तरंसि वा भित्तन्तरंसि वा कूइयसइं वा रुइयसइं वा गीयसइं वा हसियसइं वा थणियसइं वा कन्दियसइं वा विलवियसइं वा सुणेत्ता हवइ से निगगन्थे । तं कहमिति चे । आयरियाह । निगगन्थस्स खलु इत्थीणं कुडुन्तरंसि वा दूसन्तरंसि वा भित्तन्तरंसि वा कूइयसइं वा रुइयसइं वा गीयसइं वा हसियसइं वा थणियसइं वा कन्दियसइं वा विलवियसइं वा सुणेमाणस्स बम्भयारिस्स बम्भचेरे संका वा कंखा वा विइगिच्छा वा समुप्पज्जिज्जा भेदं वा लभेज्जा उम्मायं वा पाउणिज्जा दीहकालियं वा रोगायकं हवेज्जा केवल्लिपन्नत्ताओ धम्माओ भंसेज्जा । तम्हा खलु नो निगगन्थे इत्थीणं कुडुन्तरंसि वा दूसन्तरंसि वा भित्तन्तरंसि वा कूइयसइं वा रुइयसइं वा गीयसइं वा हसियसइं वा थणियसइं वा कन्दियसइं वा विलवियसइं वा सुणेमाणे विहरेज्जा ॥ ५ ॥

नो निगगन्थे पुव्वरयं पुव्वकीलियं अणुसरित्ता हवइ से निगगन्थे । तं कहमिति चे । आयरियाह । निगगन्थस्स खलु पुव्वरयं पुव्वकीलियं अणुसरमाणस्स बम्भयारिस्स बम्भचेरे संका वा कंखा वा विइगिच्छा वा समुप्पज्जिज्जा भेदं वा लभेज्जा उम्मायं वा पाउणिज्जा दीहकालियं वा रोगायकं हवेज्जा केवल्लिपन्नत्ताओ धम्माओ भंसेज्जा । तम्हा खलु नो निगगन्थे पुव्वरयं पुव्वकीलियं अणुसरेज्जा ॥ ६ ॥

नो पणीयं आहारं आहरित्ता हवइ से निगगन्थे । तं कहमिति चे । आयरियाह । निगगन्थस्स खलु पणीयं आहारं आहारेमाणस्स बम्भयारिस्स बम्भचेरे संका वा कंखा वा विइगिच्छा वा समुप्पज्जिज्जा भेदं वा लभेज्जा उम्मायं वा पाउणिज्जा दीहकालियं वा रोगायकं हवेज्जा केवल्लिपन्नत्ताओ धम्माओ भंसेज्जा । तम्हा खलु नो निगगन्थे पणीयं आहारं आहरेज्जा ॥ ७ ॥

नो अइमायाए पाणभोयणं आहारेत्ता हवइ से निगगन्थे । तं कहमिति चे । आयरियाह । निगगन्थस्स खलु अइमायाए पाणभोयणं आहारेमाणस्स बम्भयारिस्स बम्भचेरे संका वा कंखा वा विइगिच्छा वा समुप्पज्जिज्जा भेदं वा लभेज्जा उम्मायं वा पाउणिज्जा दीहकालियं वा रोगायकं हवेज्जा केवल्लिपन्नत्ताओ धम्माओ भंसेज्जा । तम्हा खलु नो निगगन्थे अइमायाए पाणभोयणं आहारेज्जा ॥ ८ ॥

नो विभूसाणुवाई हवइ से निगगन्थे । तं कहमिति चे । आयरियाह । विभूसावत्तिण विभूसियसरीरे इत्थिजणस्स अभिलसणिज्जे हवइ । तओ णं इत्थिजणेणं अभिलसिज्जमाणस्स बम्भचेरे संका वा कंखा वा वा विइगिच्छा वा समुप्पज्जिज्जा भेदं वा लभेज्जा उम्मायं वा पाउणिज्जा वीहकालियं वा रोगायकं हवेज्जा केवलपन्नत्ताओ धम्माओ भंसेज्जा । तम्हा खलु नो निगगन्थे विभूसाणुवाई हविज्जा ॥ ९ ॥

नो सद्धरुवरसगन्धफासाणुवाई हवइ से निगगन्थे । तं कहमिति चे । आयरियाह । निगगन्थस्स खलु सद्धरुवरसगन्धफासाणुवाईयस्स बम्भयारिस्स बम्भचेरे संका वा कंखा वा विइगिच्छा वा समुप्पज्जिज्जा भेदं वा लभेज्जा उम्मायं वा पाउणिज्जा वीहकालियं वा रोगायकं हवेज्जा केवलपन्नत्ताओ धम्माओ भंसेज्जा । तम्हा खलु नो सद्धरुवरसगन्धफासाणुवाई भवेज्जा से निगगन्थे । दसमे बम्भचेरसमाहिठाणे हवइ ॥ १० ॥

॥ भवन्ति इत्थ सिलोगा ॥ तं जहा ॥

जं विवित्तमणाइणं रहियं इत्थिजणेण य ।
 बम्भचेरस्स रक्खट्ठा आलयं तु निसेवण ॥ १ ॥
 मणपल्हायजणणिं कामरागविवट्ठणिं ।
 बम्भचेररओ भिक्खू थीकहं तु विवज्जण ॥ २ ॥
 समं च संथवं थीहिं संकहं च अभिक्खणं ।
 बम्भचेररओ भिक्खू निच्चसो परिवज्जण ॥ ३ ॥
 अंगपच्चंगसंठाणं चारुल्लवियपेहिबं ।
 बम्भचेररओ थीणं चक्खुगिज्झं विवज्जण ॥ ४ ॥
 कूइयं रुइयं गीयं हसियं थणियकन्दियं ।
 बम्भचेररओ थीणं सोयगेज्झं विवज्जण ॥ ५ ॥
 हासं किट्ठं रइं वप्पं सहसाविस्तासियाणि य ।
 बम्भचेररओ थीणं नाणुचिन्ते कयाइ वि ॥ ६ ॥
 पणीयं भत्तपाणं तु खिप्पं मयविवट्ठणं ।
 बम्भचेररओ भिक्खू निच्चसो परिवज्जण ॥ ७ ॥
 धम्मल्लद्धं मियं काले जत्तत्थं पणिहाणवं ।
 नाइमत्तं तु भुंजेज्जा बम्भचेररओ सया ॥ ८ ॥

विभूसं परिवज्जेज्जा सररीपरिमण्डणं ।
 बम्भचेररओ भिक्खू सिंगारत्थं न धारए ॥ ९ ॥
 सद्धे रूवे य गन्धे य रसे फासे तहेव य ।
 पंचविहे कामगुणे निच्चसो परिवज्जए ॥ १० ॥
 आलओ थीजणाइण्णो थीकहा य मणोरमा ।
 संथवो चेव नारीणं तासि इन्दियवरिसणं ॥ ११ ॥
 कूइयं रुइयं गीयं हासभुत्तासियाणि य ।
 पणीयं भत्तपाणं च अइमायं पाणभोयणं ॥ १२ ॥
 गत्तभूसणमिट्ठं च कामभोगा य दुज्जया ।
 नरस्सऽत्तगवेसिस्स विसं तालउळं जहा ॥ १३ ॥
 दुज्जए कामभोगे य निच्चसो परिवज्जए ।
 संकाठाणाणि सत्त्वाणि वज्जेज्जा पाणिहाणवं ॥ १४ ॥
 धम्मारामे चरे भिक्खू धिइमं धम्मसारही ।
 धम्मारामरए वन्ते बम्भचेरसमाहिए ॥ १५ ॥
 देवदाणवगन्धवा जक्खरक्खसक्किन्नरा ।
 बम्भयारिं नमंसन्ति दुक्करं जे करान्ति तं ॥ १६ ॥
 एस धम्मे धुवे निच्चे सासए जिणवेसिए ।
 सिद्धा सिज्झन्ति चाणेण सिज्झिस्सन्ति तहावरे ॥ १७ ॥
 त्ति बेमि ॥

॥ बम्भचेरसमाहिठाणा समत्ता ॥ १६ ॥

॥ पावसमणिज्जं सप्तदशं अध्ययनम् ॥

जे केइ उ पव्वइए नियण्ठे धम्मं सुणित्ता विणओववन्ने ।
 सुदुलहं लाहिउं बोहिलाभं विहरेज्ज पच्छा य जहासुहं तु ॥ १ ॥
 सेज्जा वढा पाउरणं मि अत्थि उप्पज्जई भोत्तु तहेव पाउं ।
 जाणामि जं वट्ठइ आउसु त्ति किं नाम काहामि सुएण भन्ते ॥ २ ॥
 जे केइ पव्वईए निद्धासीले पगामसो भोच्चा ।
 पेच्चा सुहं सुवइ पावसमणि त्ति वुच्चई ॥ ३ ॥

आयरियउवज्झाएहिं सुयं विणयं च गाहिण ।
 ते चेव खिसई बाले पावसमणि त्ति वुच्चई ॥ ४ ॥
 आयरियउवज्झायाणं सम्मं नो पडितप्पइ ।
 अप्पडिपूयए थद्धे पावसमणि त्ति वुच्चई ॥ ५ ॥
 सम्मद्दमाणो पाणाणि बीयाणि हरियाणि य ।
 असंजए संजयमन्नमाणे पावसमणि त्ति वुच्चई ॥ ६ ॥
 संथारं फलगं पीढं निसेज्जं पायकम्बलं ।
 अप्पमज्जियमारुहइ पावसमणि त्ति वुच्चई ॥ ७ ॥
 दवदवस्स चरई पमत्ते य अभिक्खणं ।
 उल्लंघणे य चण्डे य पावसमणि त्ति वुच्चई ॥ ८ ॥
 पडिलेहेइ पमत्ते अवउज्झइ पायकम्बलं ।
 पडिलेहाअणाउत्ते पावसमणि त्ति वुच्चई ॥ ९ ॥
 पाडिलेहेइ पमत्ते से किंचि हु निसामिया ।
 गुरुपारिभावए निज्जं पावसमणि त्ति वुच्चई ॥ १० ॥
 बहुमाई पमुहरी थद्धे लुद्धे अणिग्गहे ।
 असंविभागी अचियत्ते पावसमणि त्ति वुच्चई ॥ ११ ॥
 विवाढं च उदीरेइ अहम्मे अत्तपन्नहा ।
 वुग्गहे कलहे रत्ते पावसमणि त्ति वुच्चई ॥ १२ ॥
 अथिरासणे कुक्कुईए जत्थ तत्थ निसीयई ।
 आसणम्मि अणाउत्ते पावसमणि त्ति वुच्चई ॥ १३ ॥
 ससरक्खपाए सुवई सेज्जं न पडिलेहइ ।
 संथारए अणाउत्ते पावसमणि त्ति वुच्चई ॥ १४ ॥
 दुद्धदहीविगईओ आहारेइ अभिक्खणं ।
 अरण य तवोकम्मे पावसमणि त्ति वुच्चई ॥ १५ ॥
 अत्थन्तम्मि य सूराम्मि आहारेइ अभिक्खणं ।
 चोइओ पडिचोएइ पावसमणि त्ति वुच्चई ॥ १६ ॥
 आयरियपरिच्चाई परपासण्डसेवए ।
 गाणंगणिए दुब्भूए पावसमणि त्ति वुच्चई ॥ १७ ॥
 सयं गेहं परिचज्ज परगेहंसि वावडे ।
 निमित्तेण य ववहरई पावसमणि त्ति वुच्चई ॥ १८ ॥

सन्नाइपिण्डं जेमेइ नेच्छई सामुदाणियं ।

गिहिनिसेज्जं च वाहेइ पावसमणिं त्ति वुच्चई ॥ १९ ॥

एयारिसे पंचकुसीलसंबुडे ख्वंधरे मुणिपवराण हेट्ठिमे ।

अयंसि लोए विसमेव गरहिए न से इहं नेव परत्थ लोए ॥ २० ॥

जे वज्जए एए सया उ दोसे से सुव्वए होइ मुणीण मज्जे ।

अयंसि लोए अमयं व पूइए आराहए लोगमिणं तहा परं ॥ २१ ॥

त्ति वेमि ॥

॥ पावसमणिज्जं समत्तं ॥ १७ ॥

॥ संजइज्जं अष्टादशं अध्ययनम् ॥

कम्पिल्ले नयरे राया उदिण्णबलवाहणे ।

नामेणं संजए नामं मियत्वं उवाणिग्गए ॥ १ ॥

हयाणीए गयाणीए रहाणीए तहेव य ।

पावत्ताणीए महया सव्वओ परिवारिए ॥ २ ॥

मिए छुहिता हयगओ कम्पिल्लुज्जाणकेसरे ।

भीए सन्ते मिए तत्थ वहेइ रसमुच्छिए ॥ ३ ॥

अह केसरम्मि उज्जाणे अणगारे तवोधणे ।

सज्झायज्जाणसंजुत्ते भम्मज्झाणं झियायई ॥ ४ ॥

अप्फोवमण्डवम्मि झायई खवियासवे ।

तस्सागए मिगे पासं वहेई से नराहिवे ॥ ५ ॥

अह आसगओ राया खिप्पमागम्म सो तर्हि ।

हए मिगे उ पासित्तां अणगारं तत्थ पासई ॥ ६ ॥

अह राया तत्थ संभन्तो अणगारो मणाऽऽहओ ।

मए उ मन्दपुण्णेणं रसगिद्धेण वत्तुणा ॥ ७ ॥

आसं विसज्जइत्ताणं अणगारस्स सो निवो ।

विणएण वन्दए पाए भगवं एत्थ मे खमे ॥ ८ ॥

अह मोणेण सो भगवं अणगारे ज्ञाणमस्सिए ।

रायाणं न पडिमन्तेइ तओ राया भयद्दुओ ॥ ९ ॥

संजओ अहमम्मीति भगवं वाहराहि मे ।

कुद्धे तेएण अणगारे डहेज्ज नरकोडिओ ॥ १० ॥

अभयं पत्थिवा तुब्भं अभयदाया भवाहि य ।

अणिच्चे जीवलोगम्मि किं हिंसाए पसज्जासि ॥ ११ ॥

जया सत्त्वं परिच्चज्ज गन्तव्वमवसस्स ते ।

अणिच्चे जीवलोगम्मि किं रज्जम्मि पसज्जासि ॥ १२ ॥

जीवियं चेव रूवं च विज्जुसंपायचंचलं ।

जत्थ तं मुज्झसी रायं पेच्चत्थं नावबुज्झसे ॥ १३ ॥

दाराणि य सुया चेव भित्ता य तह बन्धवा ।

जीवन्तमणुजीवन्ति मयं नाणुव्वयन्ति य ॥ १४ ॥

नीहरन्ति मयं पुत्ता पियरं परमदुक्खिया ।

पियरो वि तहा पुत्ते बन्धू रायं तवं चरे ॥ १५ ॥

तओ तेणऽज्जिए दव्वे दारे य परिरक्खिए ।

कीलन्तऽत्ते नरा रायं हट्ठुत्तुमलंकिथा ॥ १६ ॥

तेणावि जं कयं कम्मं सुहं वा जइ वा दुहं ।

कम्मुणा तेण संजुत्तो गच्छई उ परं भवं ॥ १७ ॥

सोऊण तस्स सो धम्मं अणगारस्स अन्तिए ।

महया संवेगनिव्वेगं समावच्चो नराहिवो ॥ १८ ॥

संजओ चइउं रज्जं निक्खन्तो जिणसासणे ।

गह्मभालिस्स भगवओ अणगारस्स अन्तिए ॥ १९ ॥

चिच्चा रट्ठं पव्वइए खत्तिए परिभासइ ।

जहा ते दीसई रूवं पसच्चं ते तहा मणो ॥ २० ॥

किंनामे किंगोत्ते कस्सट्ठाए व माहणे ।

कहं पडियरसी बुद्धे कहं विणीए ज्ति वुच्चासि ॥ २१ ॥

संजओ नाम नामेणं तहा गोत्तेण गोयमे ।

गइभाली ममायरिया विज्जाचरणपारगा ॥ २२ ॥

किरियं अकिरियं विणयं अस्साणं च महामुणी ।

एणहिं चउहिं ठाणेहिं मेयत्ते किं पभासई ॥ २३ ॥

इइ पाउकरे बुद्धे नायए परिनिव्वुडे ।

विज्जाचरणसंपत्ते सच्चे सच्चपरक्कमे ॥ २४ ॥

पडन्ति नरए घोरे जे नरा पावकारिणो ।
 दिव्वं च गइं गच्छन्ति चरित्ता धम्ममारियं ॥ १५ ॥
 मायाबुड्यमेयं तु मुसाभासा निरत्थिया ।
 संजममाणो वि अहं वसामि इरियामि य ॥ १६ ॥
 सव्वे ते विइया मज्झं मिच्छादिट्ठी अणारिया ।
 विज्जमाणे परे लोए सम्मं जाणामि अप्पगं ॥ १७ ॥
 अहमासी महापाणे जुइमं वरिससओवमं ।
 जा सा पाली महापाली दिव्वा वरिससओवमा ॥ १८ ॥
 से चुए बम्भलोगाओ माणुसं भवमागए ।
 अप्पणो य परेसिं च आउं जाणे जहा तहा ॥ १९ ॥
 नाणारुइं च छन्दं च परिवज्जेज्ज संजए ।
 अणट्ठा जे य सव्वत्था इइ विज्जामणुसंचरे ॥ २० ॥
 पडिक्कमामि पसिणाणं परमन्तेहिं वा पुणो ।
 अहो उट्ठिए अहोरायं इइ विज्जा तवं चरे ॥ २१ ॥
 जं च मे पुच्छसी काले सम्मं सुद्धेण चेतसा ।
 ताइं पाउकरे बुद्धे तं नाणं जिणसासणे ॥ २२ ॥
 किरियं च रोयए धीरे अकिरियं परिवज्जए ।
 दिट्ठीए दिट्ठिसंपत्ते धम्मं चर सुदुच्चरं ॥ २३ ॥
 एयं पुण्णपयं सोच्चा अत्थधम्मोवसोहियं ।
 भरहो वि भारहं वासं चंचा कामाइं पट्ठए ॥ २४ ॥
 सगरो वि सागरन्तं भरहवासं नराहिवो ।
 इस्सरियं केवलं हिच्चा दयाए परिनिवुडे ॥ २५ ॥
 चइत्ता भारहं वासं चक्कवट्ठी महिड्ढिओ ।
 पट्ठज्जमब्भुवगओ मघवं नाम महाजसो ॥ २६ ॥
 सणंकुमारो मणुस्सिन्दो चक्कवट्ठी महिड्ढिओ ।
 पुत्तं रज्जं ठवेऊणं सो वि राया तवं चरे ॥ २७ ॥
 चइत्ता भारहं वासं चक्कवट्ठी महिड्ढिओ ।
 सन्ती सन्तिकरे लोए पत्तो गइमणुत्तरं ॥ २८ ॥
 इक्खवागरायवसमो कुन्थू नाम नरीसरो ।
 विक्खवायकित्ती भगवं पत्तो गइमणुत्तरं ॥ २९ ॥

सागरन्तं चइत्ताणं भरहं नरवरीसरो ।
 अरो य अरयं पत्तो पत्तो गइमणुत्तरं ॥ ४० ॥
 चइत्ता मारहं वासं चइत्ता बलवाहणं ।
 चइत्ता उत्तमे भोए महापउमे तवं चरे ॥ ४१ ॥
 एगच्छत्तं पसाहिता मर्हि माणनिसूरणो ।
 हरिसेणो मणुस्सिन्दो पत्तो गइमणुत्तरं ॥ ४२ ॥
 अक्किओ रायसहस्सेहिं सुपरिच्चाई दमं चरे ।
 जयनामो जिणक्खायं पत्तो गइमणुत्तरं ॥ ४३ ॥
 दसण्णरज्जं मुइयं चइत्ताणं मुणी चरे ।
 दसण्णभद्दो निक्खन्तो सक्खं सक्केण चोइओ ॥ ४४ ॥
 नमी नमेइ अप्पाणं सक्खं सक्केण चोइओ ।
 चइऊण गेहं वइदेही सामण्णे पज्जुवट्ठिओ ॥ ४५ ॥
 करकण्डू कलिं गेसु पंचालेसु य इम्मुहो ।
 नमी राया विदेहेसु गन्धारेसु य नग्गई ॥ ४६ ॥
 एए नरिन्दवसभा निक्खन्ता जिणसासणे ।
 पुत्ते रज्जे ठवेऊणं सामण्णे पज्जुवट्ठिया ॥ ४७ ॥
 सोवीररायवसभो चइत्ताण मुणी चरे ।
 उदायणो पव्वइओ पत्तो गइमणुत्तरं ॥ ४८ ॥
 तहेव कासीराया सेओसच्चपरक्कमे ।
 कामभोगे परिच्चज्ज पहणे कम्ममहावणं ॥ ४९ ॥
 तहेव विजओ राया अणट्ठाकित्ति पव्वए ।
 रज्जं तु गुणसमिद्धं पयहिच्चु महाजसो ॥ ५० ॥
 तहेवुगं तवं किच्चा अम्वाक्खित्तेण चेयसा ।
 महाबलो रायरिसी आदाय सिरसा सिरिं ॥ ५१ ॥
 कहं धीरो अहेऊहिं उम्मत्तो व मर्हि चरे ।
 एए विसंसमादाय सूरु दढपरक्कमा ॥ ५२ ॥
 अच्चन्तनियानखमा सच्चा मे भासिया वई ।
 अतरिंसु तरन्तेगे तरिस्सन्ति अणागया ॥ ५३ ॥

कहं धीरे अहेऊहिं अत्ताणं परिखावसे ।
सन्वसंगविनिग्मुक्के सिद्धे हवइ नीरण ॥ ५४ ॥ त्ति बेमि ॥

॥ संजइज्जं समत्तं ॥ १८ ॥

॥ मियापुत्तीयं एकोनविंशतितमं अध्ययनम् ॥

सुग्गीवे नयरे रम्मे काणणुज्जाणसोहिण ।
राया बलभद्दो त्ति मिया तस्सगमाहिस्सी ॥ १ ॥
तेसिं पुत्ते बलसिरी मियापुत्ते त्ति विस्सुण ।
अम्मापिऊण दइण जुवराया दमीसरे ॥ २ ॥
नन्दणे सो उ पासाण कीलण सह इत्थिहिं ।
देवे दोगुन्दगे चेव निच्चं मुइयमाणसो ॥ ३ ॥
मणिरयणकोट्टिमतले पासायालोयणट्ठिओ ।
आलोणइ नगरस्स चउक्कतियचच्चरे ॥ ४ ॥
अह तत्थ अइच्छन्तं पासई समणसंजयं ।
तवनियमसंजमधरं सीलहुं गुणआगरं ॥ ५ ॥
तं देहई मियापुत्ते दिट्ठीए अणिमिसाए उ ।
कहिं मत्तेरिसं रूवं दिट्ठपुव्वं मए पुरा ॥ ६ ॥
साहुस्स दरिसणे तस्स अज्झवसाणम्मि सोहणे ।
मोहंगयस्स सन्तस्स जाईसरणं समुप्पन्नं ॥ ७ ॥
जाईसरणे समुप्पन्ने मियापुत्ते महिट्ठिण ।
सरई पोरणिणं जाई सामण्णं च पुरा कयं ॥ ८ ॥
विसणहि अरज्जन्तो रज्जन्तो संजमम्मि य ।
अम्मापियरं उवागम्म इमं वयणमट्ठवी ॥ ९ ॥

सुयाणि मे पंच महव्वयाणि नरणसु दुक्खं च तिरिक्खजोणिसु ।
निद्विण्णकामो मि महण्णवाओ अणुजाणह पव्वइस्सामि अम्मो ॥ १० ॥

अम्मतय मए भोगा भुत्ता विसफलोप्पमा ।
पच्छा कडुयविवागा अणुबन्धदुहावहा ॥ ११ ॥

इमं सरीरं अणिञ्चं असुइं असुइस्संभवं ।
 असासयावासमिणं दुक्खकेसाण भायणं ॥ १२ ॥
 असासए सरीरम्मि रइं नोवलभामहं ।
 पच्छा पुरा व चइयत्वे फेणबुब्बुयसच्चिमे ॥ १३ ॥
 माणुसत्ते असारम्मि वाहीरोगाण आलए ।
 जरामरणघत्थम्मि खणं पि न रमामऽहं ॥ १४ ॥
 जम्मं दुक्खं जरा दुक्खं रोगाणि मरणाणि य ।
 अहो दुक्खो हु संसारो जत्थ कीसन्ति जन्तवो ॥ १५ ॥
 खेत्तं वत्थुं हिरण्णं च पुत्तदारं च बन्धवा ।
 चइत्ताणं इमं देहं गन्तव्वमवसस्स मे ॥ १६ ॥
 जहा किम्पागफलाणं परिणामो न सुन्दरो ।
 एवं भुत्ताण भोगाणं परिणामो न सुन्दरो ॥ १७ ॥
 अद्धाणं जो महन्तं तु अपाहेओ पवज्जई ।
 गच्छन्ते से इही होइ छुहातण्हाए पीडिण ॥ १८ ॥
 एवं धम्मं अकाऊणं जो गच्छइ परं भवं ।
 गच्छन्तो सो इही होइ वाहीरोगेहिं पीडिओ ॥ १९ ॥
 अद्धाणं जो महन्तं तु सपाहेओ पवज्जई ।
 गच्छन्तो सो सुही होइ छुहातण्हाविवाज्जिओ ॥ २० ॥
 एवं धम्मं पि काऊणं जो गच्छइ परं भवं ।
 गच्छन्तो सो सुही होइ अण्णकम्मे अवेयणे ॥ २१ ॥
 जहा गेहे पलित्तम्मि तस्स मेहस्स जो पहू ।
 सारभण्डाणि नीणेइ असारं अवउज्झइ ॥ २२ ॥
 एवं लोए पलित्तम्मि जराए मरणेण य ।
 अण्णं तारइस्सामि तुव्वेहिं अणुमच्चिओ ॥ २३ ॥
 तं विन्ति अम्मापियरो सामण्णं पुत्त दुच्चरं ।
 गुणाणं तु सहस्साइं धारेयत्वाइं भिक्खुणा ॥ २४ ॥
 समया सव्वभूएसु सत्तुमित्तेसु वा जगे ।
 पाणाइवायविरई जावज्जीवाए दुक्करं ॥ २५ ॥
 निच्चकालऽप्यमत्तेणं मुसावायविवज्जणं ।
 भासियव्वं हियं सच्चं निच्चाउत्तेण दुक्करं ॥ २६ ॥

दन्तसोहणमाइस्स अक्त्तस्स विवज्जणं ।
 अणवज्जेसणिज्जस्स गेण्हणा अवि दुक्करं ॥ २७ ॥
 विरई अबम्भचेरस्स कामभोगरसन्नुणा ।
 उगं महव्वयं बम्भं धारयव्वं सुदुक्करं ॥ २८ ॥
 धणधत्तपेसवग्गेसु परिग्गहाविवज्जणं ।
 सव्वारम्भपरिच्चाओ निम्भमत्तं सुदुक्करं ॥ २९ ॥
 चउव्विहे वि आहारे राईभोयणवज्जणा ।
 सन्निहीसंचओ चेव वज्जेयव्वो सुदुक्करं ॥ ३० ॥
 छुहा तण्हा य सीउण्हं वंसमसगवेयणा ।
 अक्कोसा दुक्खसेज्जा य तण्फासा जल्लमेव य ॥ ३१ ॥
 तालणा तज्जणा चेव वहवन्धपरीसहा ।
 दुक्खं भिक्खायरिया जायणा य अलामया ॥ ३२ ॥
 कावोया जा इमा वित्ती केसलोओ य दारुणो ।
 दुक्खं बम्भवयं धोरं धारेउं य महप्पणो ॥ ३३ ॥
 सुहोइओ तुमं पुत्ता सुकुमालो सुमाज्जिओ ।
 न हु सी पमू तुमं पुत्ता सामण्णमणुपालिया ॥ ३४ ॥
 जावज्जीवमविस्सामो गुणाणं तु महम्मरो ।
 गुरू उ लोहमारो व्व जो पुत्ता होइ दुव्वहो ॥ ३५ ॥
 आगासे गंगसोओ व्व पडिसोओ व्व दुत्तरो ।
 बाहाहिं सागरो चेव तरियव्वो गुणोयही ॥ ३६ ॥
 वालुयाकवलो चेव निरस्साए उ संजमे ।
 असिधारागमणं चेव दुक्करं चरिउं तवो ॥ ३७ ॥
 अहीवेगन्तदिट्ठीए चरित्ते पुत्तं दुच्चरे ।
 जवा लोहमया चेव चावेयव्वा सुदुक्करं ॥ ३८ ॥
 जहा अग्गिसिहा दित्ता पाउं होइ सुदुक्करा ।
 तहा दुक्करं करेउं जे तारुणे समणत्तणं ॥ ३९ ॥
 जहा दुक्खं भरेउं जे होइ वायस्स कोत्थलो ।
 तहा दुक्खं करेउं जे कीवेणं समणत्तणं ॥ ४० ॥
 जहा तुलाए तोलेउं दुक्करो मन्दरो गिरी ।
 तहा निडुय नीसंकं दुक्करं समणत्तणं ॥ ४१ ॥

जहा भुयाहिं तरिउं दुक्करं रयणागरो ।
 तहा अणुवसन्तेणं दुत्तरं दमसागरो ॥ ४२ ॥
 भुंज माणुस्सए भोगे पंचलक्खणए तुमं ।
 भुत्तभोगी तओ जाया पच्छा धम्मं चरिस्ससि ॥ ४३ ॥
 सो वेइ अम्मापियरो एवमेयं जहा फुडं ।
 इह लोए निप्पिवासस्स नत्थि किंचि वि दुक्करं ॥ ४४ ॥
 सारीरमाणसा चेव वेयणाओ अणन्तसो ।
 मए सोढाओ भीमाओ असइं दुक्खभयाणि य ॥ ४५ ॥
 जरामरणकन्तारे चाउरन्ते भयागरे ।
 मए सोढाणि भीमाणि जम्माणि मरणाणि य ॥ ४६ ॥
 जहा इहं अगणी उण्हो एत्तोऽणन्तगुणे तहिं ।
 नरएसु वेयणा उण्हा अस्साया वेइया मए ॥ ४७ ॥
 जहा इमं इहं सीयं एत्तोऽणन्तगुणं तहिं ।
 नरएसु वेयणा सीया अस्साया वेइया मए ॥ ४८ ॥
 कन्दन्तो कंदुकुम्भीसु उट्ठपाओ अहोसिरो ।
 हुयासणे जलन्ताम्मि पक्कपुव्वो अणन्तसो ॥ ४९ ॥
 महादवगिसंकासे मरुम्मि वइरवालुए ।
 कलम्बवालुयाए य दट्ठपुव्वो अणन्तसो ॥ ५० ॥
 रसन्तो कन्दुकुम्भीसु उट्ठं बट्ठो अबन्धवो ।
 करवत्तकरकयाईहिं छिन्नपुव्वो अणन्तसो ॥ ५१ ॥
 अइतिक्खकण्टगाइण्णे तुंगे सिम्बलिपायवे ।
 खेवियं पासबद्धेणं कट्ठोकट्ठाहिं दुक्करं ॥ ५२ ॥
 महाजन्तेसु उच्छू वा आरसन्तो सुमेरवं ।
 पीलिओ मि सकम्मेहिं पावकम्मो अणन्तसो ॥ ५३ ॥
 कूवन्तो कोलसुण्णहिं सामेहिं सबलेहि य ।
 पालिओ फालिओ छिन्नो विप्फुरन्तो अणेगसो ॥ ५४ ॥
 असीहिं अयसिवण्णाहिं मल्लीहिं पट्टिसेहि य ।
 छिन्नो भिन्नो विभिन्नो य ओइण्णो पावकम्मुणा ॥ ५५ ॥
 अवसो लोहरहे जुत्तो जलन्ते समिलाजुए ।
 चोइओ तोत्तजुत्तहिं रोज्झो वा जह पाडिओ ॥ ५६ ॥

दुयासणे जलन्तस्मि चियासु महिसो विव ।
 दड्डो पक्को य अवसो पावकम्मेहि पाविओ ॥ ५७ ॥
 बला संडासतुण्डेहिं लोहतुण्डेहि पक्खिहिं ।
 विलुत्तो विलवन्तो हं ढंकिग्गेहिंऽणन्तसो ॥ ५८ ॥
 तण्हाकिलन्तो धावन्तो पत्तो वेयरणिं नदिं ।
 जलं पाहिं ति चिन्तन्तो खुरधारहिं विवाइओ ॥ ५९ ॥
 उण्हाभितत्तो संपत्तो असिपत्तं महावणं ।
 असिपत्तेहिं पडन्तेहिं छिन्नपुण्वो अणेगसो ॥ ६० ॥
 मुग्गेहिं मुसंढीहिं सुलोहिं मुसलोहि य ।
 गयासं भग्गत्तेहिं पत्तं दुक्खं अणन्तसो ॥ ६१ ॥
 खुरोहिं तिक्खधारेहिं छुरियाहिं कप्पणीहि य ।
 कप्पिओ फालिओ छिन्नो उक्कित्तो य अणेगसो ॥ ६२ ॥
 पासेहिं कूडजालेहिं मिओ वा अवसो अहं ।
 वाहिओ बद्धरुद्धो वा बद्ध चेव विवाइओ ॥ ६३ ॥
 गलेहिं मगरजालेहिं मच्छो वा अवसो अहं ।
 उल्लिओ फालिओ गहिओ मारिओ य अणन्तसो ॥ ६४ ॥
 वीदंसणहि जालेहिं लेप्पाहिं सउणो विव ।
 गहिओ लग्गो बद्धो य मारिओ य अणन्तसो ॥ ६५ ॥
 कुहाडफरसुमाईहिं वड्ढीहिं दुमो विव ।
 कुट्ठिओ फालिओ छिन्नो तच्छिओ य अणन्तसो ॥ ६६ ॥
 चवडेमुट्ठिमाईहिं कुमारेहिं अयं पिव ।
 ताडिओ कुट्ठिओ मित्तो चुण्णिओ य अणन्तसो ॥ ६७ ॥
 तत्ताइं तम्बलोहाइं तउयाइं सीसयाणि य ।
 पाइओ कलकलन्ताइं आरसन्तो सुमेरवं ॥ ६८ ॥
 तुहं पियाइं मंसाइं खण्डाइं सोल्लगाणि य ।
 खाविओ मि समंसाइं अग्गिवण्णाइं जेगसो ॥ ६९ ॥
 तुहं पिया सुरा सीह्म मेरओ य मद्दाणि य ।
 पाइओ मि जलन्तीओ वसाओ रुहिराणि य ॥ ७० ॥
 निच्चं भीएण तन्थेण दुहिएण वहिएण य ।
 परमा दुहसंबद्धा वेयणा वेइया मए ॥ ७१ ॥

तिव्वचण्डप्पगाढाओ घोराओ अइदुस्सहा ।
 महब्बयाओ भीमाओ नरएस्सु वेइया मए ॥ ७९ ॥
 जारिसा माणुसे लोए ताया वीसन्ति वेयणा ।
 एत्तो अणन्तगुणिया नरएस्सुं दुक्खवेयणा ॥ ७३ ॥
 सव्वमवेस्सु अस्साया वेयणा वेइया मए ।
 निमेसन्तरमित्तं पि जं साया नत्थि वेयणा ॥ ७४ ॥
 तं विन्तअम्मापियरो छन्देणं पुत्त पव्वया ।
 नवरं पुण सामण्णे दुक्खं निप्पडिकम्मया ॥ ७५ ॥
 सो वेइ अम्मापियरो एवमेयं जहाफुडं ।
 पडिकम्मं को कुणई अरण्णे मियपक्खिणं ॥ ७६ ॥
 एगभूए अरण्णे व जहा उ चरई मिगे ।
 एवं धम्मं चरिस्सामि संजमेण तवेण य ॥ ७७ ॥
 जया मिगस्स आयंको महारण्णमि जायई ।
 अच्चन्तं रुक्खमूलम्मि को णं ताहे तिगिच्छई ॥ ७८ ॥
 को वा से ओसहं वेई को वा से पुच्छई सुहं ।
 को से भत्तं व पाणं वा आहरित्तु पणामए ॥ ७९ ॥
 जया य से सुही होइ तथा गच्छइ गोयरं ।
 भत्तपाणस्स अट्ठाए वल्लराणि सराणि य ॥ ८० ॥
 स्वाइत्ता पाणियं पाउं वल्लरेहिं सरोहि य ।
 मिगचारियं चरित्ताणं गच्छई मिगचारियं ॥ ८१ ॥
 एवं समुट्ठिओ मिक्खू एवमेव अणेगए ।
 मिगचारियं चरित्ताणं उट्ठं पक्कमई विसं ॥ ८२ ॥
 जहा मिगे एग अणेगचारी अणेगवासे धुवगोत्यरे य ।
 एवं मुणी गोयरियं पविट्ठे नो हीलए नो वि य खिसपज्जा ॥ ८३ ॥
 मिगचारियं चरिस्सामि एवं पुत्ता जहासुहं ।
 अम्मापिईहिअणुत्ताओ जहाइ उवहिं तओ ॥ ८४ ॥
 मियचारियं चरिस्सामि सव्वदुक्खविमोक्खणिं ।
 तुव्वमेहिं अम्माअणुत्ताओ गच्छ पुत्त जहासुहं ॥ ८५ ॥
 एवं सो अम्मापियरो अणुमाणित्ताण बहुविहं ।
 ममत्तं छिन्दई ताहे महानागो व्व कंचुयं ॥ ८६ ॥

इद्धी वित्तं च मित्ते य पुत्तस्सं च नायओ ।
रेणुयं व पडे लग्गं निद्धाणित्ताण निग्गओ ॥ ८७ ॥

पंचमहव्वयजुत्तो पंचहिं समिओ तिगुत्तिगुत्तो य ।
सब्भिन्तरबाहिरओ तवोकम्मंसि उज्जुत्तो ॥ ८८ ॥

निम्ममो निरहंकारो निस्संगो चत्तगारवो ।
समो य सव्वभूएसु तसेसु थावरेसु य ॥ ८९ ॥

लाभालाभे सुहे दुक्खे जीविण मरणे तथा ।
समो निन्दापसंसासु तथा माणावमाणओ ॥ ९० ॥

गारवेसुं कसाएसुं दण्डसल्लभएसु य ।
नियत्तो हाससोगाओ अनियाणो अवन्धणो ॥ ९१ ॥

अणिस्सिओ इहं लोए परलोए अणिस्सिओ ।
वासीचन्दणकप्पो य असणे अणसणे तथा ॥ ९२ ॥

अप्पसत्थेहिं दारेहिं सव्वओ पिहियासवे ।
अज्झप्पज्झाणजेगेहिं पसत्थदमसासणे ॥ ९३ ॥

एवं नाणेण चरणेण दंसणेण तवेण य ।
भावणाहि य सुद्धाहिं सम्मं भावेत्तु अप्पयं ॥ ९४ ॥

बहुयाणि उ वासाणि सामणमणुपालिया ।
मासिएण उ भत्तेण सिद्धिं पत्तो अणुत्तरं ॥ ९५ ॥

एवं करन्ति संबुद्धा पण्डिया पवियक्खणा ।
विणियट्ठन्ति भोगेसु मियापुत्ते जहामिसी ॥ ९६ ॥

महापभावस्स महाजसस्स मियाइ पुत्तस्स निस्सम्म भासियं ।
तवप्पहाणं चरियं च उत्तमं गइप्पहाणं च तिलोगविस्सुयं ॥ ९७ ॥
वियाणिया दुक्खविवद्धणं धणं ममत्तवधं च महाभयावहं ।
सुहावहं धम्मधुरं अणुत्तरं धारेज्ज निव्वाणगुणावहं महं ॥ ९८ ॥ त्ति वेमि ॥

॥ मियापुत्तीयं समत्तं ॥ ९९ ॥

॥ महानियण्ठज्जं विंशतितमं अध्ययनम् ॥

सिद्धाण नमो किञ्चा संजयाणं च भावओ ।

अत्थधम्मगई तच्च अणुसट्ठिं सुणेह मे ॥ १ ॥

पभूयरयणो राया सेणिओ मगहाहिवो ।

विहारजत्तं निज्जाओ माण्डकुर्च्छिसि चेइए ॥ २ ॥

नाणाइमलयाइण्णं नाणापक्खिनिसेवियं ।

नाणाकुसुमसंउत्तं उज्जाणं नन्दणोवमं ॥ ३ ॥

तत्थ सो पासई साहुं संजयं सुसमाहियं ।

निसण्णं रुक्खमूलम्मि सुकुमालं सुहोइयं ॥ ४ ॥

तस्स रूवं तु पासित्ता राइणो तम्मि संजए ।

अच्चन्तपरमो आसी अउलो रुवविम्हओ ॥ ५ ॥

अहो वण्णो अहो रूवं अहो अज्जस्य सोमया ।

अहो खन्ती अहो मुत्ती अहो भोगे असंगया ॥ ६ ॥

तस्स पाए उ वन्दिता काऊण य पयाहिणं ।

नाइइरमणासक्के पंजली पडिपुच्छई ॥ ७ ॥

तरुणो सि अज्जो पव्वइओ भोगकालम्मि संजया ।

उवट्ठिओ सि सामण्णे एयमट्ठं सुणेमि ता ॥ ८ ॥

अणाहो मि महाराय नाहो मज्झ न विज्जई ।

अणुकम्पगं सुहिं वावि कंचि नाभिसमेमइहं ॥ ९ ॥

तओ सो पहसिओ राया सेणिओ मगहाहिवो ।

एवं ते इड्ढिमन्तस्स कहं नाहो न विज्जई ॥ १० ॥

होमि नाहो भयन्ताणं भोगे भुंजाहि संजया ।

मित्तनाईपरिवुडो माणुस्सं खु सुइल्लहं ॥ ११ ॥

अप्पणा वि अणाहो सि सेणिया मगहाहिवा ।

अप्पणा अणाहो सन्तो कस्स नाहो भविस्ससि ॥ १२ ॥

एवं वुत्तो नरिन्दो सो सुसंभन्तो सुविम्हिओ ।

वयणं अस्सुयपुट्ठं साहुणा विम्हयान्निओ ॥ १३ ॥

अस्सा हत्थी मणुस्सा मे पुरं अन्तेउरं च मे ।

भुंजामि माणुसे भोगे आणाइस्सरियं च मे ॥ १४ ॥

एरिसे सम्पयग्गमि सव्वकामसमप्पिण ।
 कहं अणाहो भवइ मा हु भन्ते मुसं वण ॥ १५ ॥
 न तुमं जाणे अणाहस्स अत्थं पोत्थं च पत्थिवा ।
 जहा अणाहो भवई सणाहो वा नराहिवा ॥ १६ ॥
 सुणेह मे महाराय अव्वक्खिस्सेण चेयसा ।
 जहा अणाहो भवई जहा मे य पवत्तिर्यं ॥ १७ ॥
 कोसम्बी नाम नयरी पुराणपुरभेयणी ।
 तत्थ आसी पिआ मज्झ पभूयषणमंचओ ॥ १८ ॥
 पढमे वण महाराय अउला मे अच्छिवेयणा ।
 अहोत्था विउलो ङाहो सव्वंगेसु य पत्थिवा ॥ १९ ॥
 सत्थं जहा परमतिक्खं सरीरविघरन्तरे ।
 आवीलिज्ज अरी कुद्धो एवं मे अच्छिवेयणा ॥ २० ॥
 तियं मे अन्तरिच्छं च उत्तमंगं च पीडई ।
 इन्दासाणिसमा घोरा वेयणा परमदारुणा ॥ २१ ॥
 उवट्टिया मे आयरिया विज्जामन्ततिगिच्छया ।
 अधीयां सत्थकुसला मन्तमूलविसारया ॥ २२ ॥
 ते मे तिगिच्छं कुव्वन्ति चाउप्पायं जहाहियं ।
 न य दुक्खा विमोयन्ति एसा मज्झ अणाहया ॥ २३ ॥
 पिआ मे सव्वसारं पि दिज्जा हि मम कारणा ।
 न य दुक्खा विमोणइ एसा मज्झ अणाहया ॥ २४ ॥
 माया य मे महाराय पुत्तसोणदुहट्टिया ।
 न य दुक्खा विमोणइ एसा मज्झ अणाहया ॥ २५ ॥
 भायरो मे महाराय सगा जेट्टकणिट्टगा ।
 न य दुक्खा विमोयन्ति एसा मज्झ अणाहया ॥ २६ ॥
 मइणीओ मे महाराय सगा जेट्टकणिट्टगा ।
 न य दुक्खा विमोयन्ति एसा मज्झ अणाहया ॥ २७ ॥
 भारिया मे महाराय अणुरत्ता अणुव्वया ।
 अंसुपुण्णेहि नयणेहि उरं मे परिंसिचई ॥ २८ ॥
 अच्चं पाणं च ण्हाणं च गन्धमल्लविलेवणं ।
 मए नायमणायं वा सा बाला नेव भुजई ॥ २९ ॥

खणं पि मे महाराय पासाओ वि न फिट्ठई ।
न य दुक्खा विमोएइ एसा मज्झ अणाहया ॥ ३० ॥

तओ हं एवमाहंसु दुक्खमा हु पुणो पुणो ।
वेयणा अणुभविउं जे संसारम्मि अणन्तए ॥ ३१ ॥

सई च जइ सुद्धेज्जा वेयणा विउला इओ ।
खन्तो दन्तो निरारम्भो पव्वए अणगारियं ॥ ३२ ॥

एवं च चिन्तइत्ताणं पसुत्तो मि नराहिवा ।
परियत्तन्तीए राईए वेयणा मे खयं गया ॥ ३३ ॥

तओ कल्ले पभायम्मि आपुच्छित्ताण बन्धवे ।
खन्तो दन्तो निरारम्भो पव्वइओऽणगारियं ॥ ३४ ॥

तो हं नाहो जाओ अप्पणो य परस्स य ।
सव्वेसिं चेव भूयाणं तत्ताण थावराण य ॥ ३५ ॥

अप्पा नई वेयरणी अप्पा मे कूडसामली ।
अप्पा कामदुहा धेणू अप्पा मे नन्दणं वणं ॥ ३६ ॥

अप्पा कत्ता विकत्ता य दुक्खाण य सुहाण य ।
अप्पा मित्तममित्तं च दुप्पट्टियसुपाट्टिओ ॥ ३७ ॥

इमा हु अस्मा वि अणाहया निवा तमेगचित्तो निहुओ सुणोहि ।
नियण्ठधम्मं लहियाण वी जहा सीयन्ति एगे बहुकायरा नरा ॥ ३८ ॥

जो पव्वइत्ताण महव्वयाइं सम्मं च नो फासयई पमाया ।
अनिग्गहप्पा य रसेसु गिद्धे न मूलओ छिन्दइ बन्धणं से ॥ ३९ ॥

आउत्तया जस्स न अत्थि काइ इरियाए भासाए तहेसणाए ।
आयाणनिक्खेवदुगुंछणाए न धीरजायं अणुजाइ मग्गं ॥ ४० ॥

चिरं पि से मुण्डरुई भवित्ता अथिरव्वए तवनियमेहि भट्टे ।
चिरं पि अप्पाण किलेसइत्ता न पारए होइ हु संपराए ॥ ४१ ॥

पोल्ले व मुट्ठी जह से असारं अयन्तिए कूडकहावणे वा ।
राढामणी वेरुलियप्पगासे अमहग्घए होइ य जाणएसु ॥ ४२ ॥

कुसीललिंगं इह धारइत्ता इसिज्झयं जीविय वूहइत्ता ।
असंजए संजयलप्पमाणे विणिग्घायमागच्छइ से चिरं पि ॥ ४३ ॥

विसं तु पीथं जह कालकूडं हणाइ सत्थं जह कुग्गहीयं ।
एसो वि धम्मो विसओववन्नो हणाइ वेयाल इवाविवन्नो ॥ ४४ ॥

जे लक्खणं सुविण पउजमाणे निमित्तकोऊहलसंपगादे ।
 कुहेडविज्जासवदारजीवी न गच्छई सरणं तम्मि काले ॥ ४५ ॥
 तमंतमेणेव उ से असीले सया दुही विप्परियासुवेइ ।
 संधावई नरगतिरिक्खजोणि मोणं विराहेत्तु असाहुरूवे ॥ ४६ ॥
 उदेसियं कीयगडं नियागं न मुंचई किंचि अणेसाणिज्जं ।
 अग्गी विवा सव्वमक्खी भवित्ता इत्तो चुए गच्छइ कट्टु पावं ॥ ४७ ॥
 न तं अरी कण्टछेत्ता करेइ जं से करे अप्पणिया दुरप्पया ।
 से नाहिई मच्चुमुहं तु पत्ते पच्छाणुतावेण दयाविहूणां ॥ ४८ ॥
 निराट्टिया नगगरुई उ तस्स जे उत्तिमट्टे विवज्जासमेई ।
 इमे वि से नात्थि परे वि लाए दुहओ वि से झिज्जइ तत्थि लोए ॥ ४९ ॥
 एमेवहाछन्दकुसीलरूवे मगं विराहेत्तु जिणुत्तमाणं ।
 कुररी विवा भोगरसाणुगिद्धा निरट्टसोया परियावमेइ ॥ ५० ॥
 सोच्चाण मेहावि सुमासियं इमं अणुसासणं नाणगुणाववेयं ।
 मगं कुसीलाण जहाय सव्वं महानियण्टाण वए पहेणं ॥ ५१ ॥
 चरित्तमायारगुणन्निए तओ अणुत्तरं संजम पालियाणं ।
 निरासवे संखवियाण कम्मं उवेइ ठाणं विउलुत्तमं धुवं ॥ ५२ ॥
 एवुग्गदन्ते वि महातवोधने महामुणी महापहन्ने महायसे ।
 महानियण्टिज्जामिणं महासुयं से काहई महया वित्थरेणं ॥ ५३ ॥
 तुट्ठो य सेणिओ राया इणमुदाहु कयंजली ।
 अणाहत्तं जहाभूयं सुट्ठु मे उववंसियं ॥ ५४ ॥
 तुज्झं सुलद्धं खु मणुस्सजम्मं लाभा सुलद्धा य तुमे महेसी ।
 तुव्वं सणाहा य सव्वन्धवा य जं मे ठिया मग्गे जिणुत्तमाण ॥ ५५ ॥
 तं सि नाहो अणाहाणं सव्वभूयाण संजया ।
 खामेमि ते महाभाग इच्छामि अणुसासित्तं ॥ ५६ ॥
 पुच्छिऊण मए तुव्वं ज्ञाणविग्घो उ जो कओ ।
 निमन्तिथा य भोगेहिं तं सव्वं मरिसेहि मे ॥ ५७ ॥
 एवं थुणित्ताण स रायसीहो अणगारसीहं परमाइ भत्तिए ।
 सओरोहो सपरियणो सव्वन्धवो धम्माणुरत्तो विमलेण चेयसा ॥ ५८ ॥
 ऊत्तसियरोमकूवो काऊण य पयाहिणं ।
 अभिवन्दिऊण सिरसा अइयाओ नराहिवो ॥ ५९ ॥

इयरो वि गुणसमिद्धो तिगुत्तिगुत्तो तिदण्डविरओ य ।
विहग इव विप्पमुक्को विहरइ वसुहं विगयमोहो ॥ ६० ॥

॥ त्ति वेमि ॥

॥ महानियण्ठिज्जं समत्तं ॥ १० ॥

॥ समुद्रपालीयं एकविंशं अध्ययनम् ॥

चम्पाए पालिए नाम सावए आसि वाणिए ।
महावीरस्स भगवओ सीसे सो उ महप्पणो ॥ १ ॥
निग्गन्थे पावयणे सावए से वि कोविए ।
पोएण ववहरन्ते पिहुण्डं नगरमागए ॥ २ ॥
पिहुण्डे ववहरन्तस्स वाणिओ देइ धूरं ।
तं ससत्तं पइगिज्झ सवेसमह पत्थिओ ॥ ३ ॥
अह पालियस्स थरणी समुद्धंमि पसवई ।
अह बालए तहिं जाए समुद्रपालि त्ति नामए ॥ ४ ॥
खेमेण आगए चम्पं सावए वाणिए घरं ।
संवड्ढई घरे तस्स दारए से सुहोइए ॥ ५ ॥
वावत्तरिं कलाओ य सिकखई नीइकोविए ।
जोव्वणेण य संपत्ते सुरूवे पियदंसणे ॥ ६ ॥
तस्स रूववइं भज्जं पिया आणेइ रूविणिं ।
पासाए कीलए रम्मे देवो दोगुन्दओ जहा ॥ ७ ॥
अह अन्नया कयाई पासायालोयणे ठिओ ।
वज्झमण्डणसोभागं वज्झं पासइ वज्झगं ॥ ८ ॥
तं पासिऊण संविग्गो समुद्रपालो इणमब्बवी ।
अहोऽसुभाण कम्माणं निज्जाणं पावगं इमं ॥ ९ ॥
संबुद्धो सो तहिं भगवं परमसंवेगमागओ ।
आपुच्छऽम्मापियरो पव्वए अणगारियं ॥ १० ॥

जहित्तुऽसगन्थमहाकिलेसं महन्तमोहं कसिणं भयावहं ।
परियायधम्मं चऽभिरोयएज्जा वयाणि सीलाणि परीसहे य ॥ ११ ॥

अहिंस सञ्चं च अतेणमं च तन्तो य दम्मं अपरिग्गहं च ।
 पडिवज्जिया पंच महव्वयाणि चरिज्ज धम्मं जिणवेसियं विवू ॥ १२ ॥
 सव्वेहिं भूएहिं दयाणुकम्पी खन्तिक्खमे संजयवम्भयारी ।
 सावज्जजोगं परिवज्जयन्तो चरिज्ज भिक्खू सुसमाहिइन्दिण ॥ १३ ॥
 कालेण कालं विहरेज्ज रट्ठे बलाबलं जाणिय अप्पणो य ।
 सीहो व सद्देण न संतसेज्जा वयजोग सुच्चा न असव्वममाहु ॥ १४ ॥
 उवेहमाणो उ परिवव्वएज्जा पियमप्पियं सव्व तितिकखएज्जा ।
 न सव्व सव्वत्थऽभिरोयएज्जा न यावि पूयं गरहं च संजए ॥ १५ ॥
 अणेगल्लन्दामिह माणवेहिं जे भावओ संपगरेइ भिक्खू ।
 भयभेरवा तत्थ उइन्ति भीमा दिव्वा मणुत्ता अदुवा तिरिच्छा ॥ १६ ॥
 परीसहा दुव्विसहा अणेगे सीयन्ति जत्था बहुकायरा नरा ।
 से तत्थ पत्ते न वहिज्ज भिक्खू संगामसीसे इव नागराया ॥ १७ ॥
 सीओसिणा वंसमसा य फासा आयंका विविहा फुसान्ति देहं ।
 अकुक्कुओ तत्थऽहियासएज्जा रयाइं खेवेज्ज पुरेकडाइं ॥ १८ ॥
 पहाय रागं च तहेव दोसं मोहं च भिक्खू सयथं वियक्खणो ।
 मेरु व्व वाएण अकम्पमाणो परीसहे आयगुत्ते सहेज्जा ॥ १९ ॥
 अणुक्कए नावणए महेसी न यावि पूयं गरहं च संजए ।
 स उज्जुभावं पडिवज्ज संजए निव्वाणमग्गं विरए उवेइ ॥ २० ॥
 अरइरइसहे पहीणसंश्वे विरए आयाहिण पहाणवं ।
 परमट्ठपण्णहिं चिट्ठई छिन्नसोए अममे अकिंचणे ॥ २१ ॥
 विवित्तलयणाइं भएज्ज ताई निरोवलेवाइं असंथडाइं ।
 इसीहि चिण्णाइं महायसेहिं काएण फासेज्ज परीसहाइं ॥ २२ ॥
 स नाणनाणोवगए महेसी अणुत्तरं चरिउं धम्मसंचयं ।
 अणुत्तरे नाणधरे जसंसी ओभासई सूरिण वन्तलिकखे ॥ २३ ॥
 इविहं खवेऊण य पुण्णपावं निरंगणे सव्वओ विप्पमुक्के ।
 तरित्ता समुद्दं व महाभवोयं समुद्दपाले अपुणागमं गए ॥ २४ ॥
 ॥ त्ति वेमि ॥

॥ समुद्दपालीयं समत्तं ॥ २१ ॥

॥ रहनेमिज्जं द्वाविंशं अध्ययनम् ॥

सोरियपुरंमि नयरे आसी राया महिद्धिए ।
 वसुदेवे त्ति नामेणं रायलक्खणसंजुए ॥ १ ॥
 तस्स भज्जा इवे आसी रोहिणी देवई तहा ।
 तासिं देण्हं इवे पुत्ता इट्ठा रामकेसवा ॥ २ ॥
 सोरियपुरंमि नयरे आसी राया महिद्धिए ।
 समुद्दविजए नामं रायलक्खणसंजुए ॥ ३ ॥
 तस्स भज्जा सिवा नाम तीसे पुत्तो महायसो ।
 भगवं अरिट्टनेमि त्ति लोगनाहे दमीसरे ॥ ४ ॥
 सोऽरिट्टनेमिनामो इ लक्खणस्सरसंजुओ ।
 अट्टसहस्सलक्खणघरो गोयमो कालगच्छवी ॥ ५ ॥
 वज्जरिसहसंघयणो समचउरंसो झसोयरो ।
 तस्स राईमई कक्कं भज्जं जायइ केसवो ॥ ६ ॥
 अह सा रायवरकक्का सुसीला चारुपेहिणी ।
 सव्वदलक्खणसंपक्का विज्जुसोयामणिप्पभा ॥ ७ ॥
 अहाह जणओ तीसे वासुदेवं महिद्धियं ।
 इहागच्छऊ कुमारो जा से कक्कं दलामि हं ॥ ८ ॥
 सव्वोसहीहि ण्हविओ कयकोउयमंगलो ।
 दिव्वजुयलपरिहिओ आभरणेहिं विभूसिओ ॥ ९ ॥
 मत्तं च गन्धहत्थिं वासुदेवस्स जेट्ठगं ।
 आरूढो सोहए अहियं सिरे चूडामणी जहा ॥ १० ॥
 अह ऊसिएण छत्तेण चामराहि य सोहिए ।
 दसारचक्रेण य सो सव्वओ परिवारिओ ॥ ११ ॥
 चउरंगिणीए सेनाए रइयाए जहक्कमं ।
 तुरियाण सन्निपाएण दिव्वेण गगणं फुसे ॥ १२ ॥
 एयारिसाए इट्ठीए जुईए उत्तिमाए य ।
 नियगाओ भवणाओ निज्जाओ वणिहपुंगवो ॥ १३ ॥
 अह सो तत्थ निज्जन्तो दिस्स पाणे भयहुए ।
 वाढेहिं पंजरेहिं च सन्निरुद्धे सुदुक्खिए ॥ १४ ॥

जीवियन्तं तु संपत्ते मंसट्टा भक्खियव्वए ।
 पासेत्ता से महापत्ते सारहिं इणमब्बवी ॥ १५ ॥
 कस्स अट्टा इमे पाणा एए सव्वे सुहेसिणो ।
 वाडेहिं पंजरेहिं च सन्निरुद्धा य अच्छहिं ॥ १६ ॥
 अह सारही तओ भणइ एए भट्टा उ पाणिणो ।
 तुज्झं विवाहकज्जंमि भोगावेउं बहुं जणं ॥ १७ ॥
 सोऊण तस्स वयणं बहुपाणिविणासणं ।
 चिन्तेइ से महापत्ते साणुक्कोसे जिणहि उ ॥ १८ ॥
 जइ मज्झ कारणा एए हम्मन्ति सुबहू जिया ।
 न मे एयं तु निस्सेसं परलोगे भविस्सई ॥ १९ ॥
 सो कुण्डलाण जुयलं सुत्तगं च महायसो ।
 आभरणाणि य सव्वाणि सारहिस्स पणामए ॥ २० ॥
 मणपरिणामे य कए देवा य जहोइयं समोइण्णा ।
 सत्विट्ठीए सपरिसा निक्खमणं तस्स काउं जे ॥ २१ ॥
 वेवमणुस्सपरिवुडो सीयारयणं तओ समारूढो ।
 निक्खामिय बारगाओ रेवययंमि ट्टिओ भगवं ॥ २२ ॥
 उज्जाणं संपत्तो ओइण्णो उत्तिमाओ सीयाओ ।
 साहस्सीए परिवुडो अह निक्खमई उ चित्ताहिं ॥ २३ ॥
 अह से सुगन्धगन्धिए तुरियं मउकुंचिए ।
 सयमेव लुंचई केसे पंचमुट्ठीहिं समाहिओ ॥ २४ ॥
 वासुदेवो य णं भणइ लुत्तकेसं जिहन्दिंयं ।
 इच्छियमणोरहे तुरियं पावसू तं दमीसरा ॥ २५ ॥
 नाणेणं दंसणेणं च चरित्तेण तवेण य ।
 खन्तीए मुत्तीए बड्डमाणो भवाहि य ॥ २६ ॥
 एवं ते रामकेसवा दसारा य बहू जणा ।
 अरिट्टणेमि वन्दिता अभिगया बारगापुरिं ॥ २७ ॥
 सोऊण रायकत्ता पव्वज्जं सा जिणस्स उ ।
 नीहासा य निराणन्दा सोगेण उ समुत्थिया ॥ २८ ॥
 राईमई विचिन्तेइ धिरत्थु मम जीवियं ।
 जा हं तेण परिच्चत्ता सेयं पव्वइउं मम ॥ २९ ॥

अह सा भमरसन्निभे कुच्चफणगसाहिए ।
 सयमेव लुंचई केसे धिइमन्ता ववस्सिया ॥ ३० ॥
 वासुदेवो य णं भणइ लुत्तकेसं जिइन्दिअं ।
 संसारसागरं घोरं तर कञ्जे लहुं लहुं ॥ ३१ ॥
 सा पव्वइया सन्ती पव्वावेसी ताहिं बहुं ।
 सयणं परियणं चेव सीलवन्ता बहुस्सुया ॥ ३२ ॥
 गिरिं रेवययं जन्ती वासेणुल्ला उ अन्तरा ।
 वासन्ते अन्धयारंमि अन्तो लयणस्स सा ठिया ॥ ३३ ॥
 चीवराइं विसारन्ती जहाजाय त्ति पासिया ।
 रहनेमी भग्गचित्तो पच्छा दिट्ठो य तीइ वि ॥ ३४ ॥
 भीया य सा ताहिं वट्ठुं एगन्ते संजयं तयं ।
 बाहार्हिं काउं संगोप्फं वेवमाणी निसीयई ॥ ३५ ॥
 अह सो वि रायपुत्तो समुद्विजयंगओ ।
 भीयं पवेवियं वट्ठुं इमं वक्कं उदाहरे ॥ ३६ ॥
 रहनेमी अहं भइं सुक्खे चारुभासिणि ।
 ममं भयाहि सुयणू न ते पीळा भविस्सई ॥ ३७ ॥
 एहि ता भुंजिमो भोए माणुस्सं खु सुदुल्लहं ।
 भुत्तभोगी पुणो पच्छा जिणमग्गं चरिस्सिमो ॥ ३८ ॥
 वट्ठूण रहनेमिं तं भग्गुज्जोयपराइयं ।
 राईमई असम्भन्ता अप्पाणं संवरे ताहिं ॥ ३९ ॥
 अह सा रायवरकच्चा सुट्ठिया नियमव्वए ।
 जाई कुलं च सीलं च रक्खमाणी तयं वए ॥ ४० ॥
 जइ सि रुवेण वेसमणो लल्लिएण नलकूबरो ।
 तहा वि ते न इच्छामि जइ सि सक्खं पुरन्दरो ॥ ४१ ॥
 धिरत्थु ते जसोकामी जो तं जीवियकारणा ।
 वन्तं इच्छसि आवाउं सेयं ते मरणं भवे ॥ ४२ ॥
 अहं च भोगरायस्स तं च सि अन्धगवण्हणो ।
 मा कुले गन्धणा होमो संजमं निहुओ चर ॥ ४३ ॥
 जइ तं काहिसि भावं जा जा वच्छसि नारिओ ।
 बायाविट्ठो व्व हट्ठो अट्ठिअप्पा भविस्सासि ॥ ४४ ॥

गोवालो भण्डवालो वा जहा तद्व्वऽणिस्सरो ।
 एवं अणिस्सरो तं पि सामणस्स भविस्ससि ॥ ४५ ॥
 तीसे सो वयणं सोच्चा संजयाए सुभासियं ।
 अंकुसेण जहा नागो धम्मे संपडिवाइओ ॥ ४६ ॥
 मणगुत्तो वयगुत्तो कायगुत्तो जिइन्दिओ ।
 सामणं निच्चलं फासे जावज्जीवं दद्व्वओ ॥ ४७ ॥
 उगं तवं चरित्ताणं जाया द्दोणिण वि केवली ।
 सव्वं कम्मं खवित्ताणं सिद्धिं पत्ता अणुत्तरं ॥ ४८ ॥
 एवं करेन्ति संबुद्धा पण्डया पवियक्खणा ।
 विणिग्यट्ठन्ति भोगेसु जहा सो पुरिसोत्तमो ॥ ४९ ॥ त्ति वेमि ॥

॥ रहनेमिज्जं समत्तं ॥ २२ ॥

॥ केसिगोयमिज्जं त्रयोविंशं अध्ययनम् ॥

जिणे पासे त्ति नामेण अरहा लोगपूइओ ।
 संबुद्धप्पा य सव्वञ्चू धम्मतिथ्यरे जिणे ॥ १ ॥
 तस्स लोगपईवस्स आसि सीसे महायसे ।
 केसीकुमारसमणे विज्जाचरणपारगे ॥ २ ॥
 ओहिनाणसुए बुद्धे सीससंघसमाउले ।
 गामाणुगामं रीयन्ते सावत्थि पुरमागए ॥ ३ ॥
 तिन्दुयं नाम उज्जाणं तम्मी नगरमण्डले ।
 फासुए सिज्जसंथारे तत्थ वासमुवागए ॥ ४ ॥
 अह तेणेव कालेणं धम्मतिथ्यरे जिणे ।
 भगवं वद्धमाणो त्ति सव्वलोगम्मि विस्सुए ॥ ५ ॥
 तस्स लोगपईवस्स आसि सीसे महायसे ।
 भगवं गोयमे नामं विज्जाचरणपारगे ॥ ६ ॥
 बारसंगविऊ बुद्धे सीससंघसमाउले ।
 गामाणुगामं रीयन्ते से वि सावत्थिमागए ॥ ७ ॥

कोट्टुगं नाम उज्जाणं तम्मी नयरमण्डले ।
 फासुए सिज्जसंथारे तत्थ वासमुवागए ॥ ८ ॥
 केसीकुमारसमणे गोयमे य महायसे ।
 उभओ वि तत्थ विहरिंसु अल्लीणा सुसमाहिया ॥ ९ ॥
 उभओ सीससंघाणं संजयाणं तवस्सिणं ।
 तत्थ चिन्ता समुप्पन्ना गुणवन्ताण ताइणं ॥ १० ॥
 केरिसो वा इमो धम्मो इमो धम्मो व केरिसो ।
 आयारधम्मपणिही इमा वा सा व केरिसी ॥ ११ ॥
 चाउज्जामो य जो धम्मो जो इमो पंचसिक्खिओ ।
 देसिओ वट्ठमाणेण पासेण य महामुणी ॥ १२ ॥
 अचेलगो य जो धम्मो जो इमो सन्तरुत्तरो ।
 एगकज्जपवन्नाणं विसेसे किं नु कारणं ॥ १३ ॥
 अह ते तत्थ सीसाणं विन्नाय पवितक्खियं ।
 समागमे कयमई उभओ केसिगोयमा ॥ १४ ॥
 गोयमे पडिरूवच्चू सीससंघसमाउले ।
 जेट्ठं कुलमवेक्खन्तो तिन्दुयं वणमागओ ॥ १५ ॥
 केसीकुमारसमणे गोयमं दिस्समागयं ।
 पडिरूवं पडिवर्त्तिं सम्मं संपडिवज्जई ॥ १६ ॥
 पलालं फासुयं तत्थ पंचमं कुसतणाणि य ।
 गोयमस्स निसेज्जाए खिप्पं संपणामए ॥ १७ ॥
 केसीकुमारसमणे गोयमे य महायसे ।
 उभओ निसण्णा साहन्ति चन्दसूरसमप्पभा ॥ १८ ॥
 समागया बहू तत्थ पासण्डा कोउगा मिगा ।
 गिहत्थाणं चऽणेगाओ साहस्सीओ समागया ॥ १९ ॥
 देवदाणवगन्धवा जक्खरक्खसकिज्जरा ।
 अदिस्साणं च भूयाणं आसी तत्थ समागमो ॥ २० ॥
 पुच्छामि ते महाभाग केसी गोयममव्ववी ।
 तओ केसिं वुवन्तं तु गोयमो इणमव्ववी ॥ २१ ॥
 पुच्छ भन्ते जहिच्छं ते केसिं गोयममव्ववी ।
 तओ केसी अणुज्जाए गोयमं इणमव्ववी ॥ २२ ॥

चाउज्जामो य जो धम्मो जो इमो पंचसिक्खिओ ।

देसिओ वद्धमाणेण पासेण य महामुणी ॥ २३ ॥

एगकज्जपवक्काणं विसेसे किं नु कारणं ।

धम्मं दुविहे मेहावि कहं विप्पच्चओ न ते ॥ २४ ॥

तओ केसिं बुवन्तं तु गोयमो इणमव्ववी ।

पक्खा समिक्खए धम्मतत्तं तत्तविणिच्छियं ॥ २५ ॥

पुरिमा उज्जुजडा उ वंकजडा य पच्छिमा ।

मज्झिमा उज्जुपक्खा उ तेण धम्मे दुहा कए ॥ २६ ॥

पुरिमाणं इव्विसोज्झो उ चरिमाणं दुरणुपालओ ।

कप्पो मज्झिमगाणं तु सुविसोज्झो सुपालओ ॥ २७ ॥

साहु गोयम पक्खा ते छिन्नो मे संसओ इमो ।

अन्नो वि संसओ मज्झं तं मे कहसु गोयमा ॥ २८ ॥

अचेलगो य जो धम्मो जो इमो सन्तरुत्तरो ।

देसिओ वद्धमाणेण पासेण य महामुणी ॥ २९ ॥

एगकज्जपवक्काणं विसेसे किं नु कारणं ।

लिंगे दुविहे मेहावी कहं विप्पच्चओ न ते ॥ ३० ॥

केसिमेवं बुवाणं तु गोयमो इणमव्ववी ।

विक्खाणेण समागम्म धम्मसाहणमिच्छियं ॥ ३१ ॥

पच्चयत्थं च लोगस्स नाणाविहविगप्पणं ।

जत्तत्थं गहणत्थं च लोगे लिंगपओयणं ॥ ३२ ॥

अह भवे पइक्खा उ मोक्खसब्भूयसाहणा ।

नाणं च दंसणं चैव चरित्तं चैव निच्छए ॥ ३३ ॥

साहु गोयम पक्खा ते छिन्नो मे संसओ इमो ।

अन्नो वि संसओ मज्झं तं मे कहसु गोयमा ॥ ३४ ॥

अणेगाणं सहस्साणं मज्झं चिट्ठसि गोयमा ।

ते य ते अहिगच्छन्ति कहं ते निज्जिया तुमे ॥ ३५ ॥

एगे जिए जिया पंच पंच जिए जिया दस ।

दसहा उं जिणित्ताणं सव्वसच्चू जिणामहं ॥ ३६ ॥

सन्नू य इह के वुत्ते केसी गोयममव्ववी ।

तओ केसिं बुवंतं तु गोयमो इणमव्ववी ॥ ३७ ॥

पगप्पा अजिए सत्तू कसाया इन्दियाणि य ।
 ते जिणिच्च जहानायं विहरामि अहं मुणी ॥ ३८ ॥
 साहु गोयम पप्पा ते छिन्नो मे संसओ इमो ।
 अन्नो वि संसओ मज्झं तं मे कहसु गोयमा ॥ ३९ ॥
 दीसन्ति बहवे लोए पासबद्धा सरीरिणो ।
 मुक्कपासो लहुब्भूओ कहं विहरसी मुणी ॥ ४० ॥
 ते पासे सव्वसो छित्ता निहन्तुण उवायओ ।
 मुक्कपासो लहुब्भूओ विहरामि अहं मुणी ॥ ४१ ॥
 पासा य इइ के वुत्ता केसी गोयममव्ववी ।
 केसिमेवं बुवंतं तु गोयमो इणमव्ववी ॥ ४२ ॥
 रागद्वोसादओ तिच्चा नेहपासा भयंकरा ।
 ते छिन्दित्ता जहानायं विहरामि जहक्कमं ॥ ४३ ॥
 साहु गोयम पप्पा ते छिन्नो मे संसओ इमो ।
 अन्नो वि संसओ मज्झं तं मे कहसु गोयमा ॥ ४४ ॥
 अन्तोहिययसंभूया लया चिट्ठइ गोयमा ।
 फलेइ विसमक्खीणि सा उ उद्धरिया कहं ॥ ४५ ॥
 तं लयं सव्वसो छित्ता उद्धरित्ता समूलियं ।
 विहरामि जहानायं मुक्को मि विसमक्खणा ॥ ४६ ॥
 लया य इइ का वुत्ता केसी गोयममव्ववी ।
 केसिमेवं बुवन्तं तु गोयमो इणमव्ववी ॥ ४७ ॥
 भवतण्हा लया वुत्ता भीमा भीमफलोदया ।
 तमुच्छिच्च जहानायं विहरामि जहासुहं ॥ ४८ ॥
 साहु गोयम पप्पा ते छिन्नो मे संसओ इमो ।
 अन्नो वि संसओ मज्झं तं मे कहसु गोयमा ॥ ४९ ॥
 संपज्जालिया घोरा अग्गी चिट्ठइ गोयमा ।
 जे डहन्ति सरीरत्था कहं विज्झाविया तुमे ॥ ५० ॥
 महामेहप्पसूयाओ गिज्झ वारि जलुत्तमं ।
 सिंचामि सययं देहं सित्ता नो व डहन्ति मे ॥ ५१ ॥
 अग्गी य इइ के वुत्ता केसी गोयममव्ववी ।
 केसिमेवं बुवंतं तु गोयमो इणमव्ववी ॥ ५२ ॥

कसाया अगिणो वुत्ता सुयसीलतवो जलं ।
 सुयधाराभिहया सन्ता भिन्ना हु न डहन्ति मे ॥ ५३ ॥
 साहु गोयम पक्षा ते छिन्नो मे संसओ इमो ।
 अन्नो वि संसओ मज्झं तं मे कहसु गोयमा ॥ ५४ ॥
 अयं साहसिओ भीमो दुट्ठस्सो परिधावई ।
 जंसि गोयम आरूढो कहं तेण न हीरसि ॥ ५५ ॥
 पधावन्तं निगिण्हामि सुयरस्सीसमाहियं ।
 न मे गच्छइ उम्मगं मगं च पडिवज्जई ॥ ५६ ॥
 आसे य इइ के वुत्ते केसी गोयममव्ववी ।
 केसिमेवं बुवंतं तु गोयमो इणमव्ववी ॥ ५७ ॥
 मणो साहसिओ भीमो दुट्ठस्सो परिधावई ।
 तं सम्मं तु निगिण्हामि धम्मसिक्खाए कन्थगं ॥ ५८ ॥
 साहु गोयम पक्षा ते छिन्नो मे संसओ इमो ।
 अन्नो वि संसओ मज्झं तं मे कहसु गोयमा ॥ ५९ ॥
 कुप्पहा बहवो लोए जेहिं नासन्ति जन्तुणो ।
 अद्धाणे कह वट्टन्ते तं न नाससि गोयमा ॥ ६० ॥
 जे य मग्गेण गच्छन्ति जे य उम्मगपट्टिया ।
 ते सव्वे विइया मज्झं तो न नस्सामहं मुणी ॥ ६१ ॥
 मग्गे य इइ के वुत्ते केसी गोयममव्ववी ।
 केसिमेवं बुवंतं तु गोयमो इणमव्ववी ॥ ६२ ॥
 कुप्पवयणपासण्डी सव्वे उम्मगपट्टिया ।
 सम्मगं तु जिणक्खायं एस मग्गे हि उत्तमे ॥ ६३ ॥
 साहु गोयम पक्षा ते छिन्नो मे संसओ इमो ।
 अन्नो वि संसओ मज्झं तं मे कहसु गोयमा ॥ ६४ ॥
 महाउदगवेगेण वुज्झमाणाण पाणिणं ।
 सरणं गई पइट्ठा य दीवं कं मज्झसी मुणी ॥ ६५ ॥
 अत्थि एगो महादीवो वारिमज्झे महालओ ।
 महाउदगवेगस्स गई तत्थ न विज्जई ॥ ६६ ॥
 दीवे य इइ के वुत्ते केसी गोयममव्ववी ।
 केसिमेवं बुवंतं तु गोयमो इणमव्ववी ॥ ६७ ॥

जरामरणवेगेणं बुज्झमाणाण पाणिणं ।
 धम्मो दीवो पइट्ठा य गई सरणमुत्तमं ॥ ६८ ॥
 साहु गोयम पन्ना ते छिन्नो मे संसओ इमो ।
 अन्नो वि संसओ मज्झं तं मे कहसु गोयमा ॥ ६९ ॥
 अण्णवंसि महोहंसि नावा विपरिधावई ।
 जंसि गोयममारूढो कहं पारं गमिस्ससि ॥ ७० ॥
 जा उ अस्साविणी नावा न सा पारस्स गामिणी ।
 जा निरस्साविणी नावा सा उ पारस्स गामिणी ॥ ७१ ॥
 नावा य इइ का वुत्ता केसी गोयममव्ववी ।
 केसिमेवं बुवंतं तु गोयमो इणमव्ववी ॥ ७२ ॥
 सरीरमाहु नाव त्ति जीवो वुच्चइ नाविओ ।
 संसारो अण्णवो वुत्तो जं तरन्ति महोसिणो ॥ ७३ ॥
 साहु गोयम पन्ना ते छिन्नो मे संसओ इमो ।
 अन्नो वि संसओ मज्झं तं मे कहसु गोयमा ॥ ७४ ॥
 अन्धयारे तमे घोरे चिट्ठन्ति पाणिणो बहू ।
 को करिस्सइ उज्जोयं सव्वलोगंमि पाणिणं ॥ ७५ ॥
 उगओ विमलो भाणू सव्वलोगप्पभं करो ।
 सो करिस्सइ उज्जोयं सव्वलोगंमि पाणिणं ॥ ७६ ॥
 भाणू य इइ के वुत्ते केसी गोयममव्ववी ।
 केसिमेवं बुवन्तं तु गोयमो इणमव्ववी ॥ ७७ ॥
 उगओ खीणसंसारो सव्वन्नू जिणभवत्थरो ।
 सो करिस्सइ उज्जोयं सव्वलोयांमि पाणिणं ॥ ७८ ॥
 साहु गोयम पन्ना ते छिन्नो मे संसओ इमो ।
 अन्नो वि संसओ मज्झं तं मे कहसु गोयमा ॥ ७९ ॥
 सारीरमाणसे दुक्खे बज्झमाणाण पाणिणं ।
 खेमं सिवमणाबाहं ठाणं किं मच्चसी मुणी ॥ ८० ॥
 अत्थि एगं धुवं ठाणं लोगगंमि दुरारुहं ।
 जत्थ नत्थि जरा मच्चू वाहिणो वेयणा तहा ॥ ८१ ॥
 ठाणे य इइ के वुत्ते केसी गोयममव्ववी ।
 केसिमेवं बुवंतं तु गोयमो इणमव्ववी ॥ ८२ ॥

निव्वाणं ति अब्बाहं ति सिद्धी लोगगमेव य ।
 खेमं सिवं अणाबाहं जं चरन्ति महेसिणो ॥ ८३ ॥
 तं ठाणं सासथं वासं लोगगंमि दुराकहं ।
 जं संपत्ता न सोयन्ति भवोहन्तकरा मुणी ॥ ८४ ॥
 साहु गोयम पन्ना ते छिन्नो मे संसओ इमो ।
 नमो ते संसयाईय सव्वसुत्तमहोयही ॥ ८५ ॥
 एवं तु संसए छिन्ने केसी घोरपरक्कमे ।
 अभिवन्दिता सिरसां गोयमं तु महायसं ॥ ८६ ॥
 पंचमहव्वयधम्मं पडिवज्जइ भावओ ।
 पुरिमस्स पच्छिममी मग्गे तत्थ सुहावहे ॥ ८७ ॥
 केसीगोयमओ निच्चं तम्मि आसि समागमे ।
 सुयसीलसमुक्कंसो महत्थज्जथविणिच्छओ ॥ ८८ ॥
 तोसिया परिस्सा सव्वा सम्मगं समुवट्ठिया ।
 संथुया ते पसीयन्तु भयवं केसिगोयमे ॥ ८९ ॥ ति बेमि ॥

॥ केसिगोयमिज्जं समत्तं ॥ ९३ ॥

॥ समिईओ चतुर्विंशं अध्ययनम् ॥

अट्ठ पवयणमायाओ समिई गुत्ती तहेव य ।
 पंचेव य समिईओ तओ गुत्तीओ आहिया ॥ १ ॥
 इरियाभासेसणादाणे उच्चारे समिई इय ॥
 मणगुत्ती वयगुत्ती कायगुत्ती य अट्ठमा ॥ २ ॥
 एयाओ अट्ठ समिईओ समासेण वियाहिया ।
 दुवालसंगं जिणक्खायं मायं जत्थ उ पवयणं ॥ ३ ॥
 आलम्बणेण कालेण मग्गेण जयणाइ य ।
 चउकारणपरिसुद्धं संजए इरियं रिए ॥ ४ ॥
 तत्थ आलंबणं नाणं दंसणं चरणं तहा ।
 काले य दिवसे वुत्ते मग्गे उपपहवज्जिए ॥ ५ ॥

दव्वओ खेत्तओ चेव कालओ भावओ तहा ।
 जायणा चउट्ठिहा वुत्ता तं मे कित्तयओ सुण ॥ ६ ॥
 दव्वओ चक्खुसा पेहे जुगमित्तं च खेत्तओ ।
 कालओ जाव रीएज्जा उवउत्ते य भावओ ॥ ७ ॥
 इन्दियत्थे विवज्जित्ता सज्झायं चेव पंचहा ।
 तम्मूत्ती तप्पुरक्कारे उवउत्ते रियं रिण ॥ ८ ॥
 कोहे माणे य मायाए लोभे य उवउत्तया ।
 हासे भए मोहरिण विगहासु तहेव च ॥ ९ ॥
 एयाई अट्ठ ठाणाई परिवज्जित्तु संजए ।
 असावज्जं मियं काले भासं भासेज्ज पन्नवं ॥ १० ॥
 गवेसणाए गहणे य परिभोगेसणाय जा ।
 आहारोवहिसेज्जाए एए तिन्नि विसोहए ॥ ११ ॥
 उग्गमुप्पायणं पढमे बीए सोहेज्ज एसणं ।
 परिभेयांमि चउक्कं विसोहेज्ज जयं जई ॥ १२ ॥
 ओहोवहोवग्गहियं भण्डगं इविहं मुणी ।
 गिण्हन्तो निक्खिवन्तो वा पउंजेज्ज इमं विहिं ॥ १३ ॥
 चक्खुसा पडिलेहित्ता पमज्जेज्ज जयं जई ।
 आइए निक्खिवेज्जा वा दुहओ वि समिए सया ॥ १४ ॥
 उच्चारं पासवणं खेलं सिंघाणजल्लियं ।
 आहारं उवहिं देहं अन्नं वावि तहाविहं ॥ १५ ॥
 अणावायमसंलोप अणावाए चेव होइ संलोप ।
 आवायमसंलोप आवाए चेय संलोप ॥ १६ ॥
 अणावायमसंलोप परस्सऽणुवघाइए ।
 समे अज्झुसिरे यावि अचिरकालकर्यमि य ॥ १७ ॥
 वित्थिण्णे दूरमोगाढे नासन्ने विलवज्जिए ।
 तसपाणबीयरहिण उच्चाराईणि वोसिरे ॥ १८ ॥
 एयाओ पंच समिईओ समासेण वियाहिया ।
 एत्तो य तओ गुत्तीओ वोच्छामि अणुपुव्वसो ॥ १९ ॥
 सच्चा तहेव मोसा य सच्चमोसा तहेव य ।
 चउत्थी असच्चमोसा य मणगुत्तीओ चउट्ठिहा ॥ २० ॥

संरम्भसमारम्भे आरम्भे य तहेव य ।
 मणं पवत्तमाणं तु नियत्तेज्ज जयं जई ॥ २१ ॥
 सच्चा तहेव मोसा य सच्चमोसा तहेव य ।
 चउत्थी असच्चमोसा य वइगुत्ती चउत्विहा ॥ २२ ॥
 संरम्भसमारम्भे आरम्भे य तहेव य ।
 वयं पवत्तमाणं तु नियत्तेज्ज जयं जई ॥ २३ ॥
 ठाणे निसीयणे चेव तहेव य तुयट्टणे ।
 उल्लंघणपल्लंघणे इन्दियाण य जुंजणे ॥ २४ ॥
 संरम्भसमारम्भे आरम्भे य तहेव य ।
 कायं पवत्तमाणं तु नियत्तेज्ज जयं जई ॥ २५ ॥
 एयाओ पंच समिईओ चरणस्स य पवत्तणे ।
 गुत्ती निग्रत्तणे वुत्ता असुभत्थेसु सव्वसो ॥ २६ ॥
 एसा पवयणमाया जे सम्मं आयरे मुणी ।
 से खिप्पं सव्वसंसारो विप्पमुच्चइ पण्डिण ॥ २७ ॥ त्ति वेमि ॥

॥ समिईओ समत्ताओ ॥ २४ ॥

॥ जन्नइज्जं पंचविंशं अध्ययनम् ॥

माहणकुलसंभूओ आसि विप्पो महायसो ।
 जायाई जमजन्मि जयघोसे त्ति नामओ ॥ १ ॥
 इन्दियग्गामनिग्गाही मग्गगामी महामुणी ।
 गामाणुगामं रीयन्ते पत्ते वाणारसिं पुरिं ॥ २ ॥
 वाणारसीए बहिया उज्जाणंमि मणोरमे ।
 फासुए सेज्जसंथारे तत्थ वासमुवागए ॥ ३ ॥
 अह तेणेव कालेणं पुरीए तत्थ माहणे ।
 विजयघोसे त्ति नामेण जन्मं जयइ वेयवी ॥ ४ ॥
 अह से तत्थ अणगारे मासक्खमणपारणे ।
 विजयघोसस्स जन्मंमि भिक्खमट्ठा उवाट्टिण ॥ ५ ॥

समुवट्ठियं तहिं सन्तं जायगो पडिसेहए ।
 न हु दाहामि ते भिक्खं भिक्खू जायाहि अन्नओ ॥ ६ ॥
 जे य वेयविऊ विप्पा जन्नट्टा य जे दिया ।
 जोइसंगविऊ जे य जे य धम्माण पारगा ॥ ७ ॥
 जे समत्था समुद्धत्तुं परमप्पाणमेव य ।
 तेसिं अन्नमिणं देयं भो भिक्खू सव्वकामियं ॥ ८ ॥
 सो तत्थ एव पडिसिद्धो जायगेण महामुणी ।
 न वि रुट्ठो न वि तुट्ठो उत्तिमट्ठगवेसओ ॥ ९ ॥
 नऽन्नट्ठं पाणहेउं वा न वि निव्वाहणाय वा ।
 तेसिं विमोक्खणट्ठाए इणं वयणमन्नवी ॥ १० ॥
 नवि जाणासि वेयमुहं नवि जन्नाण जं मुहं ।
 नक्खत्ताण मुहं जं च जं च धम्माण वा मुहं ॥ ११ ॥
 जे समत्था समुद्धत्तुं परमप्पाणमेव य ।
 न ते तुमं वियाणासि अह जाणासि तो भण ॥ १२ ॥
 तस्सऽक्खेवपमोक्खं तु अवयन्तो तहिं दिओ ।
 सपरिसो पंजली होउं पुच्छई तं महामुणिं ॥ १३ ॥
 वेयाणं चं मुहं बूहि बूहि जन्नाण जं मुहं ।
 नक्खत्ताण मुहं बूहि बूहि धम्माण वा मुहं ॥ १४ ॥
 जे समत्था समुद्धत्तुं परमप्पाणमेव य ।
 एयं मे संसयं सव्वं साहू कहसु पुच्छिओ ॥ १५ ॥
 अग्गिहुत्तमुहा वेया जन्नट्ठी वेयसां मुहं ।
 नक्खत्ताण मुहं चन्दी धम्माणं कासवो मुहं ॥ १६ ॥
 जहा चन्दं गहाईया चिट्ठन्ती पंजलीउडा ।
 वन्दमाणा नमंसन्ता उत्तमं मणहारिणो ॥ १७ ॥
 अजाणगा जन्नवाई विज्जामाहणसंपया ।
 गूढा सज्झायतवसा भासच्छन्ना इवऽग्गिणो ॥ १८ ॥
 जो लोए बम्भणो वुत्तो अग्गीव महिओ जहा ।
 सया कुसलसंदिट्ठं तं वयं बूम माहणं ॥ १९ ॥
 जो न सज्जइ आगन्तुं पव्वयन्तो न सोयई ।
 रमए अज्जवयणंमि तं वयं बूम माहणं ॥ २० ॥

જાયરૂવં જહામટું નિદ્ધન્તમલપાવગં ।
 રાગદોસભયાર્થં તં વયં બૂમ માહણં ॥ ૨૧ ॥
 તવસ્સિયં કિસં દન્તં અવચિયમંસસોણિયં ।
 સુઘયં પત્તનિત્તવાણં તં વયં બૂમ માહણં ॥ ૨૨ ॥
 તસપાણે વિયાણેત્તા સંગહેણ ય થાવરે ।
 જો ન હિંસઇ તિવિહેણં તં વયં બૂમ માહણં ॥ ૨૩ ॥
 કોહા વા જહ વા હાસા લોહા વા જહ વા ભયા ।
 મુસં ન વયઈ જો ઉ તં વયં બૂમ માહણં ॥ ૨૪ ॥
 ચિત્તમન્તમચિત્તં વા અપ્પં વા જહ વા વહું ।
 ન ગિણહાઇ અદત્તં જો તં વયં બૂમ માહણં ॥ ૨૫ ॥
 દિવ્વમાણુસતેરિચ્છં જો ન સેવઇ મેહુણં ।
 મણસા કાયવક્કેણં તં વયં બૂમ માહણં ॥ ૨૬ ॥
 જહા પોમં જલે જાયં નોવલિપ્પઇ વારિણા ।
 એવં અલિત્તં કામેહિં તં વયં બૂમ માહણં ॥ ૨૭ ॥
 અલોલુયં મુહાજીવિં અણગારં અર્કિચ્ચણં ।
 અસંસત્તં ગિહટ્થેસુ તં વયં બૂમ માહણં ॥ ૨૮ ॥
 જહિત્તા પુલ્લસંજોગં જાહસંગે ય બન્ધવે ।
 જો ન સજ્જઇ એણહિં તં વયં બૂમ માહણં ॥ ૨૯ ॥
 પસુબન્ધા સવ્વવેયા જટું ચ પાવકમ્મુણા ।
 ન તં તાયન્તિ દુસ્સીલં કમ્માણિ બલવન્તિ હિ ॥ ૩૦ ॥
 ન વિ મુણિહણ સમણો ન ઔંકારેણ વમ્મણો ।
 ન મુળી રણવાસેણં કુસર્ચરેણ તાવસાં ॥ ૩૧ ॥
 સમયાપ સમણો હોઇ વમ્મચ્ચેરેણ વમ્મણો ।
 નાણેણ ય મુળી હોઇ તવેણં હોઇ તાવસાં ॥ ૩૨ ॥
 કમ્મુણા વમ્મણો હોઇ કમ્મુણા હોઇ સ્વત્તિઓ ।
 વહસ્સો કમ્મુણા હોઇ સુહો હવઇ કમ્મુણા ॥ ૩૩ ॥
 એપ પાઝકરે બુદ્ધે જેહિં હોઇ સિણાયઓ ।
 સવ્વકમ્મવિનિમ્મુક્કં તં વયં બૂમ માહણં ॥ ૩૪ ॥
 એવં ગુણસમાઝ્ઞા જે ભવન્તિ દિઝ્ઞામા ।
 તે સમત્થા ઉ ઉદ્ધત્તું પરમપ્પાણમેવ ય ॥ ૩૫ ॥

एवं तु संसए छिन्ने विजयघोसे य माहणे ।
 समुदाय तओ तं तु जयघोसें महामुणिं ॥ ३६ ॥
 तुट्टे य विजयघोसे इणमुदाहु कयंजली ।
 माहणत्तं जहाभूयं सुटु मे उवंदसियं ॥ ३७ ॥

तुम्मे जइया जन्नाणं तुम्मे वेयविऊ विऊ ।
 जोइसंगविऊ तुम्मे तुम्मे धम्माण पारगा ॥ ३८ ॥

तुम्मे समत्था उद्धत्तुं परमप्पाणमेव य ।
 तमणुग्गहं करेहऽम्हं भिक्खेणं भिक्खुउत्तमा ॥ ३९ ॥

न कज्जं मज्झ भिक्खेण खिप्पं निक्खमस्सु विया ।
 मा भमिहिसि भयावट्टे धोरे संसारसागरे ॥ ४० ॥

उवलेवो होइ भोगेसु अभोगी नोवलिप्पई ।
 भोगी भमइ संसारे अभोगी विप्पमुच्चई ॥ ४१ ॥

उल्लो सुक्को य दो छुटा गोलया मट्ठियामया ।
 दो वि आवडिया कुड्डे जो उल्लो सोऽत्थ लग्गई ॥ ४२ ॥

एवं लग्गन्ति इम्मेहा जे नरा कामलालसा ।
 विरत्ता उ न लग्गन्ति जहा से सुक्कगोलए ॥ ४३ ॥

एवं से विजयघोसे जयघोसस्स अन्तिए ।
 अणगारस्स निक्खन्तो धम्मं सोच्चा अणुत्तरं ॥ ४४ ॥

खवित्ता पुव्वकम्माई संजमेण तवेण य ।
 जयघोसविजयघोसा सिद्धिं पत्ता अणुत्तरं ॥ ४५ ॥ ॥ त्ति वेमि ॥

॥ जल्लइज्जं समत्तं ॥ २५ ॥

॥ सामायारी षड्विंशतितमं अध्ययनम् ॥

सामायारिं पवक्खामि सव्वदुक्खविमोक्खणिं ।
 जं चरित्ताण निग्गन्था तिण्णा संसारसागरं ॥ १ ॥

पट्टमा आवस्सिया नाम बिइया य निसीहिया ।
 आपुच्छणा य तइया चउत्थी पडिपुच्छणा ॥ २ ॥

पंचमी छन्दणा नाम इच्छाकारो य छट्ठो ।
 सप्तमी मिच्छाकारो य तहक्कारो य अट्ठो ॥ ३ ॥
 अब्भुट्ठाणं च नवमं दसमी उवसंपदा ।
 एसा दसंगा साहूणं सामायारी पवेइया ॥ ४ ॥
 गमणे आवस्सियं कुज्जा ठाणे कुज्जा निसीहियं ।
 आपुच्छणं सयंकरणे परकरणे पडिपुच्छणा ॥ ५ ॥
 छन्दणा दव्वजाएणं इच्छाकारो य सारणे ।
 मिच्छाकारो य निन्दाए तहक्कारो पडिस्सुए ॥ ६ ॥
 अब्भुट्ठाणं गुरुपूया अच्छणे उवसंपदा ।
 एवं दुपंचसेजुत्ता सामायारी पवेइया ॥ ७ ॥
 पुट्ठिल्लंमि चउढमाए आइच्चंमि समुट्ठिए ।
 भण्डयं पडिलेहिता वन्दिता य तओ गुरुं ॥ ८ ॥
 पुच्छिज्ज पंजलिउडो किं कायव्वं मए इहं ।
 इच्छं निओइउं भन्ते वेयावच्चे व सज्झाए ॥ ९ ॥
 वेयावच्चे निउत्तेणं कायव्वं अगिलायओ ।
 सज्झाए वा निउत्तेण सव्वदुक्खविमोक्खणे ॥ १० ॥
 दिवस्स चउरो भागे भिक्खू कुज्जा वियक्खणो ।
 तओ उत्तरगुणे कुज्जा दिणभागेसु चउसु वि ॥ ११ ॥
 पढमं पोरिसिं सज्झायं बीयं ज्ञाणं ज्ञियायई ।
 तइयाए भिक्खाधरियं पुणो चउत्थीए सज्झायं ॥ १२ ॥
 आसाढे मासे दुपया पोसे मार्से चउप्पया ।
 चित्तासोएसु मासेसु तिपया हवइ पोरिसी ॥ १३ ॥
 अंगुलं सत्तरत्तेणं पक्खेणं च दुरंगुलं ।
 वट्ठए हायए बावी मासेणं चउरंगुलं ॥ १४ ॥
 आसाढबहुलपक्खे भट्ठए कत्तिए य पोसे य ।
 फग्गुणवइसाहेसु य बोद्धव्वा ओमरत्ताओ ॥ १५ ॥
 जेट्ठामूले आसाढसावणे छहिं अंगुलेहिं पडिलेहा ।
 अट्ठहिं बीयतइयंमि तइए दस अट्ठहिं चउत्थे ॥ १६ ॥
 रत्तिं पि चउरो भागे भिक्खू कुज्जा वियक्खणो ।
 तओ उत्तरगुणे कुज्जा राइभाएसु चउसु वि ॥ १७ ॥

पढमं पोरिसिं सज्झायं बीयं ज्ञाणं झियायई ।
 तइयाए निद्धमोक्खं तु चउत्थी भुज्जो वि सज्झायं ॥ १८ ॥
 जं नेइ जया रत्तिं नक्खत्तं तंमि नहचउब्भाए ।
 संपत्ते विरमेज्जः सज्झायं पओसकालम्मि ॥ १९ ॥
 तम्मेव य नक्खत्ते गयणचउब्भागसावसेसंमि ।
 वेरत्तियं पि कालं पडिलेहिता मुणी कुज्जा ॥ २० ॥
 पुब्बिल्लंमि चउब्भाए पडिलेहिताण भण्डयं ।
 गुरुं वन्दित्तु सज्झायं कुज्जा दुक्खविमोक्खणं ॥ २१ ॥
 पोरिसीए चउब्भाए वन्दित्ताण तओ गुरुं ।
 अपडिक्कमित्ता कालस्स भायणं पडिलेहए ॥ २२ ॥
 मुहपोत्तिं पडिलेहिता पडिलेहिज्ज गोच्छगं ।
 गोच्छगलइयंगुलिओ वत्थाइं पडिलेहए ॥ २३ ॥
 उट्ठं थिरं अतुरियं पुब्बं ता वत्थमेव पडिलेहे ।
 तो विइयं पप्फोडे तइयं च पुणो पमज्जिज्जा ॥ २४ ॥
 अणच्चावियं अवलियं अणाणुबन्धिं अमोसलिं चेव ।
 छप्पुरिमा नव खोडा पाणीपाणिविस्तोहणं ॥ २५ ॥
 आरभडा सम्मद्दा वज्जेयव्वा य मोसली तइया ।
 पप्फोडणा चउत्थी विक्खित्ता वेइया छट्ठी ॥ २६ ॥
 पसिदिलपलम्बलोला एगा मोसा अणेगरूवधुणा ।
 कुणइ पमाणिपमार्यं संकियगणणोवगं कुज्जा ॥ २७ ॥
 अणूणाइरित्तपडिलेहा अविवच्चासा तहेव य ।
 पढमं पयं पसत्थं सेसाणि य अप्पसत्थाइं ॥ २८ ॥
 पडिलेहणं कुणन्तो मिहोकहं कुणइ जणवयकहं वा ।
 वेइ व पच्चक्खणं वाणइ सयं पडिच्छइ वा ॥ २९ ॥
 पुट्ठवी-आउक्काए तेऊ-वाऊ-वणस्सइ-तसाणं ।
 पडिलेहणापमत्तो छण्हं पि विराहओ होइ ॥ ३० ॥
 पुट्ठवी-आउक्काए तेऊ-वाऊ-वणस्सइ-तसाणं ।
 पडिलेहणाआउत्तो छण्हं संरक्खओ होइ ॥ ३१ ॥
 तइयाए पोरिसीए भत्तं पाणं गवेसए ।
 छण्हं अन्नयरागम्मि कारणंमि ससुट्ठिए ॥ ३२ ॥

वेयण-वेयावच्चे हरियट्ठाए य संजमट्ठाए ।
 तह पाणवत्तियाए छट्ठं पुण धम्मचिन्ताए ॥ ३३ ॥
 निग्गन्थो धिइमन्तो निग्गन्थी वि न करेज्ज छहिं चेव ।
 ठाणेहिं उ इमेहिं अणइक्रमणा य से होइ ॥ ३४ ॥
 आयंके उवसग्गे तितिकखया बम्मचेरगुत्तीसु ।
 पाणिदया तवहेउं सरिीरवोच्छेयणट्ठाए ॥ ३५ ॥
 अवसेसं भणडगं गिज्झ चक्खुसा पडिलेहए ।
 परमद्धजोयणाओ विहारं विहरए सुणी ॥ ३६ ॥
 चउत्थीए पोरिसीए निक्खिवित्ताण भायणं ।
 सज्झायं च तओ कुज्जा सव्वभावविभावणं ॥ ३७ ॥
 पोरिसीए चउडभाए वन्दिताण तओ गुरुं ।
 पडिक्कमित्ता कालस्स सेउजं तु पडिलेहए ॥ ३८ ॥
 पासवणुच्चारभूमिं च पडिलेहिज्ज जयं जई ।
 काउस्सगं तओ कुज्जा सव्वदुक्खविमोक्खणं ॥ ३९ ॥
 देवासियं च अईयारं चिन्तिज्जा अणुपुव्वसो ।
 नाणंमि दंसणे चेव चरित्तमि तहेव य ॥ ४० ॥
 पारियकाउस्सगो वन्दिताण तओ गुरुं ।
 देसियं तु अईयारं आलोपज्ज जहक्कमं ॥ ४१ ॥
 पडिक्कमित्तु निस्सल्लो वन्दिताण तओ गुरुं ।
 काउस्सगं तओ कुज्जा सव्वदुक्खविमोक्खणं ॥ ४२ ॥
 पारियकाउस्सगो वन्दिताण तओ गुरुं ।
 थुइमंगलं च काऊण कालं संपडिलेहए ॥ ४३ ॥
 पढमं पोरिसिं सज्झायं बीयं ज्ञाणं झियायई ।
 तइयाए निदमोक्खं तु सज्झायं तु चउत्थिए ॥ ४४ ॥
 पोरिसीए चउत्थीए कालं तु पडिलेहिया ।
 सज्झायं तु तओ कुज्जा अबोहेन्तो असंजण ॥ ४५ ॥
 पोरिसीए चउडभाए वन्दिऊण तओ गुरुं ।
 पडिक्कमित्तु कालस्स कालं तु पडिलेहए ॥ ४६ ॥
 आगए कायवोस्सगो सव्वदुक्खविमोक्खणे ।
 काउस्सगं तओ कुज्जा सव्वदुक्खविमोक्खणं ॥ ४७ ॥

राइयं च अईयारं चिन्तिज्ज अणुपुव्वसो ।
 नाणंमि दंसणंमि य चरित्तंमि तवंमि य ॥ ४८ ॥
 पारियकाउस्सग्गो वन्दिताण तओ गुरुं ।
 राइयं तु अईयारं आलोएज्ज जहक्कमं ॥ ४९ ॥
 पडिक्कामित्तु निस्सल्लो वन्दिताण तओ गुरुं ।
 काउस्सग्गं तओ कुज्जा सव्वदुक्खविमोक्खणं ॥ ५० ॥
 किं तवं पडिवज्जामि एवं तत्थ विचिन्तए ।
 काउस्सग्गं तु पारित्ता वन्दई य तओ गुरुं ॥ ५१ ॥
 पारियकाउस्सग्गो वन्दिताण तओ गुरुं ।
 तवं तु पडिवज्जेज्जा कुज्जा सिद्धाण संथवं ॥ ५२ ॥
 एसा सामायारी सम्मसेण वियाहिया ।
 जं चरित्ता बहू जीवा स्तिण्णा संसारसागरं ॥ ५३ ॥ ॥ त्ति वेमि ॥
 ॥ सामायारी समत्ता ॥ २६ ॥

॥ खलुंकिज्जं सप्तविंशतितमं अध्ययनम् ॥

थेरे गणहरे गग्गे मुणी आसि विसारए ।
 आइण्णे गणिमावम्मि समाहिं पडिसंधए ॥ १ ॥
 वहणे वहमाणस्स कन्तारं अइवत्तई ।
 जोगे वहमाणस्स संसारो अइवत्तई ॥ २ ॥
 खलुंके जो उ जोएइ विहम्माणो किलिस्सई ।
 असमाहिं च वेएइ तोत्तओ से य भज्जई ॥ ३ ॥
 एगं ङसइ पुच्छंमि एगं विन्धइऽभिक्खणं ।
 एगो भंजइ समिलं एगो उप्पहपाट्ठिओ ॥ ४ ॥
 एगो पडइ पासेणं निवेसइ निवज्जई ।
 उक्कुदइ उप्पिडइ सढे बालगवी वए ॥ ५ ॥
 माई मुद्धेण पडइ कुद्धे गच्छइ पडिप्पहं ।
 मयलक्खेण चिट्ठई वेगेण य पहावई ॥ ६ ॥

छिन्नाले छिन्दइ सेलिं दुइन्तो भंजए जुगं ।
 से वि य सुस्सुयाइत्ता उज्जाहिन्ता पलायए ॥ ७ ॥
 खलुंका जारिसा जोज्जा दुस्सीसा वि हु तारिसा ।
 जाइया धम्मजाणम्मि भज्जन्ति धिइदुन्त्रला ॥ ८ ॥
 इट्ठुंगारविए एगे एगेऽत्थ रसगारवे ।
 सायागारविए एगे एगे सुचिरकीहणे ॥ ९ ॥
 भिक्खालसिए एगे एगे ओमाणभीरुए ।
 थद्वे एगे अनुसासम्मी हेऊहिं कारणेहि य ॥ १० ॥
 सो वि अन्तरभासिल्लो दोसमेव पकुव्वई ।
 आयरियाणं तु वयणं पडिक्खलेइऽभिक्खणं ॥ ११ ॥
 न सा ममं वियाणाइ न य सा मज्झ दाहिई ।
 निगगया होहिई मन्ने साहू अन्नोऽत्थ वच्चउ ॥ १२ ॥
 पेसिया पलिउंचन्ति ते परियन्ति समन्तओ ।
 रायवेट्ठिं च मन्नन्ता करेन्ति भिउडिं मुहे ॥ १३ ॥
 वाइया संगहिआ चेव भत्तपाणेण पोसिया ।
 जायपक्खा जहा हंसा पक्कमन्ति दिसोविसिं । १४ ॥
 अह सारही विचिन्तेइ खलुंकेहिं समागओ ।
 किं मज्झ दुट्ठसीसेहिं अप्पा मे अवसीयई ॥ १५ ॥
 जारिसा मम सीसाओ तारिसा गलिगद्धा ।
 गलिगद्धे जहित्ताणं दढं पगिण्हई तवं ॥ १६ ॥
 मिउ मद्दवसंपन्नो गम्भीरो सुसमाहिओ ।
 विहरइ माहिं महप्पा सीलभूएण अप्पणा ॥ १७ ॥ त्ति वेमि ॥

॥ खलुंकिज्जं समत्तं ॥ १७ ॥

॥ मोक्खमग्गगई अष्टाविंशतितमं अध्ययनम् ॥

मोक्खमग्गगई तच्चं सुणेह जिणभासियं ।
 चउकारणसंजुत्तं नाणदंसणलक्खणं ॥ १ ॥

नाणं च दंसणं चेव चरित्तं च तवो तहा ।
 एस मगो त्ति पन्नत्तो जिणेहिं वरदंसिहिं ॥ २ ॥
 नाणं च दंसणं चेव चरित्तं च तवो तहा ।
 एयमगमणुप्पत्ता जीवा गच्छन्ति सोग्गहं ॥ ३ ॥
 तत्थ पंचविहं नाणं सुयं आभिनिबोहियं ।
 ओहिनाणं तु तइयं मणनाणं च केवलं ॥ ४ ॥
 एयं पंचविहं नाणं दुव्वाण य गुणाण य ।
 पज्जवाण य सन्वेसि नाणं नाणीहि दंसियं ॥ ५ ॥
 गुणाणमासओ दव्वं पगदव्वस्सिया गुणा ।
 लक्खणं पज्जवाणं तु उभओ अस्सिया भवे ॥ ६ ॥
 धम्मो अहम्मो आगासं कालो पुग्गल-जन्तवो ।
 एस लोगो त्ति पन्नत्तो जिणेहिं वरदंसिहिं ॥ ७ ॥
 धम्मो अहम्मो आगासं दव्वं इक्किक्कमाहियं ।
 अणन्ताणि य दव्वाणि कालो पुग्गल-जन्तवो ॥ ८ ॥
 गइलक्खणो उ धम्मो अहम्मो ठाणलक्खणो ।
 भायणं सव्वदव्वाणं नहं ओगाहलक्खणं ॥ ९ ॥
 वत्तणालक्खणो कालो जीवो उवओगलक्खणो ।
 नाणेणं दंसणेणं च सुहेण य दुहेण य ॥ १० ॥
 नाणं च दंसणं चेव चरित्तं च तवो तहा ।
 वीरियं उवओगो य एयं जीवस्स लक्खणं ॥ ११ ॥
 सट्ठन्धयार-उज्जोओ पहा छायातवे इ वा ।
 वण्णरसगन्धफासा पुग्गलाणं तु लक्खणं ॥ १२ ॥
 एगत्तं च पुहत्तं च संखा संठाणमेव य ।
 संजोगा य विभागा य पज्जवाणं तु लक्खणं ॥ १३ ॥
 जीवाजीवा य बन्धो य पुण्णं पावासवो तहा ।
 संवरो निज्जरा मोक्खो सन्तेए तहिया नव ॥ १४ ॥
 तहियाणं तु भावाणं सब्भावे उवएसणं ।
 भावेणं सट्ठहन्तस्स सम्मत्तं तं वियाहियं ॥ १५ ॥
 निसग्गुवएसरुई आणारुई सुत्त-ब्रीयरुईमेव ।
 अभिगम-वित्थारुई किरिया-संखेव-धम्मरुई ॥ १६ ॥

भूयत्थेणाहिगया जीवाजीवा य पुण्णपावं च ।
 सहसम्मइयासवसंवरो य रोणइ उ निसग्गो ॥ १७ ॥
 जो जिणदिट्ठे भावे चउव्विहे सदहाइ सयमेव ।
 एमेव नऽसह त्ति य स निसग्गरुइ त्ति नायव्वो ॥ १८ ॥
 एए चेव उ भावे उवइट्ठे जो परेण सदहई ।
 छउमत्थेण जिणेण व उवएसरुइ त्ति नायव्वो ॥ १९ ॥
 रागो दोसो मोहो अन्नाणं जस्स अवगयं होइ ।
 आणाए रोयंतो सो खलु आणारुई नाम ॥ २० ॥
 जो सुत्तमहिज्जन्तो सुएण ओगाहई उ सम्मत्तं ।
 अंगेण बाहिरेण व सो सुत्तरुइ त्ति नायव्वो ॥ २१ ॥
 एगेण अणेगाई पयाई जो पसरई उ सम्मत्तं ।
 उदई व्व तेल्लबिन्दू सो बीयरुइ त्ति नायव्वो ॥ २२ ॥
 सो होइ अभिगमरुई सुयनाणं जेण अत्थओ विट्ठं ।
 एक्कारस अंगाई पइण्णगं दिट्ठिवाओ य ॥ २३ ॥
 दव्वाण सव्वभावा सव्वपमाणेहि जस्स उवलद्धा ।
 सव्वाहि नयविहीहि वित्थाररुइ त्ति नायव्वो ॥ २४ ॥
 दंसणनाणचरित्ते तवविणए सव्वसमिइगुत्तीसु ।
 जो किरियाभावरुई सो खलु किरियारुई नाम ॥ २५ ॥
 अणभिग्गहियकुदिट्ठी संखेवरुइ त्ति होइ नायव्वो ।
 आविसारओ पवयणे अणभिग्गाहिओ य सेससु ॥ २६ ॥
 जो अत्थिकायधम्मं सुयधम्मं खलु चरित्तधम्मं च ।
 सदहइ जिणाभिहितं सो धम्मरुइ त्ति नायव्वो ॥ २७ ॥
 परमत्थसंथवो वा सुदिट्ठपरमत्थसेवणा वा वि ।
 वावन्नकुदंसणवज्जणा य सम्मत्तसदहणा ॥ २८ ॥
 नत्थि चरित्तं सम्मत्तविहूणं दंसणे उ भइयद्वं ।
 सम्मत्तचरित्ताइं जुगवं पुद्वं व सम्मत्तं ॥ २९ ॥
 नादंसणिस्स नाणं नाणेण विणा न हुन्ति चरणगुणा ।
 अगुणिस्स नत्थि मोक्खो नत्थि अमोक्खस्स निव्वाणं ॥ ३० ॥
 निस्संकिय-निक्कंखिय-निव्वितिगिच्छा अमूढादिट्ठी य ।
 उववूह-थिरीकरणे वच्छल्ल-पभावणे अट्ठ ॥ ३१ ॥

सामाहयत्थ पढमं छेओवट्ठावणं भवे वीयं ।
 परिहारविसुद्धीयं सुद्धमं तह संपरायं च ॥ ३२ ॥
 अकसायं अहक्खायं छउमत्थस्स जिणस्स वा ।
 पयं चयरित्तकरं चरित्तं होइ आहियं ॥ ३३ ॥
 तवो य दुविहो वुत्तो बाहिरिम्मन्तरो तहा ।
 बाहिरो छव्विहो वुत्तो एमेवढिमन्तरो तवो ॥ ३४ ॥
 नाणेण जाणई भावे वंसणेण य सइहे ।
 चरित्तेण न गेणहाइ तवेण परिसुज्झई ॥ ३५ ॥
 खवेत्ता पुव्वकम्माई संजमेण तवेण य ।
 सम्बइक्खप्पहीणट्ठा पक्कमन्ति महेसिणो ॥ ३६ ॥ ॥ त्ति वेमि ॥

॥ भोक्खमग्गगई सम्मत्ता ॥ २८ ॥

॥ सम्मत्तपरक्रमे एकोनत्रिंशं अध्ययनम् ॥

सुयं मे आउसं तेणं भगवया एवमक्खायं । इह खलु सम्मत्तपरक्रमे
 नाम अज्झयणे समणेणं भगवया महावीरेणं कासवेणं पवेइए जं सम्मं
 सइहिता पत्तिथाइत्ता रोयइत्ता फासित्ता पालइत्ता तीरित्ता कित्तइत्ता
 सोहइत्ता आराहित्ता आणाए अणुपालइत्ता बहवे जीवा सिज्झान्ति
 बुज्झान्ति मुच्चन्ति परिनिव्वायन्ति सव्वइक्खणमन्तं करेन्ति । तस्स णं
 अयमट्ठे एवमाहिज्झइ तं जहा । संवेगे १ निव्वेए २ धम्मसद्धा ३ गुरुसा-
 हम्मियसुस्सूसणया ४ आलोचणया ५ निन्दणया ६ गरिहणया ७ सामाइए ८
 चउत्तीसत्थवे ९ वन्दणे १० पडिक्कमणे ११ काउस्सग्गे १२ पञ्चक्खाणे १३
 थवयुईमंगले १४ कालपडिलेहणया १५ पायच्छिच्छकरणे १६ खमाव-
 यणया १७ सज्झाए १८ वायणया १९ पडिपुच्छणया २० पडियट्ठणया २१
 अणुप्पेहा २२ धम्मकहा २३ सुयस्स आराहणया २४ एगग्गमणसंनिवे-
 सणया २५ संजमे २६ तवे २७ वोदाणे २८ सुहसाए २९ अप्पाडिबद्धया ३०
 विवित्तसयणासणसेवणया ३१ विणियट्ठणया ३२ संभोगपञ्चक्खाणे ३३
 उवहिपञ्चक्खाणे ३४ आहारपञ्चक्खाणे ३५ कसायपच्चक्खाणे ३६ जोग-
 पच्चक्खाणे ३७ सरारपच्चक्खाणे ३८ सहस्यपच्चक्खाणे ३९ भत्तपच्च-
 क्खाणे ४० सव्मावपच्चक्खाणे ४१ पडिखणया ४२ वेथावच्चे ४३

सत्त्वगुणसंपुण्णया ४४ वीरागया ४५ खन्ती ४६ मुक्ती ४७ मद्वे ४८ अज्जवे ४९ भावसत्त्वे ५० करणसत्त्वे ५१ जोगसत्त्वे ५२ मणगुत्तया ५३ वइगुत्तया ५४ कायगुत्तया ५५ मणसमाधारणया ५६ वइसमाधारणया ५७ कायसमाधारणया ५८ नाणसंपन्नया ५९ दंसणसंपन्नया ६० चरित्त-संपन्नया ६१ सोइन्दियनिग्गहे ६२ चक्खिन्दियनिग्गहे ६३ घाणिन्दिय-निग्गहे ६४ जिम्भिन्दियनिग्गहे ६५ फासिन्दियनिग्गहे ६६ कोहविजए ६७ माणविजए ६८ मायाविजए ६९ लोहविजए ७० पेज्जदोसमिच्छादंसण-विजए ७१ सेलेसी ७२ अकम्मया ७३ ॥

१ संवेगेणं भन्ते जीवे किं जणयइ ॥ संवेगेणं अणुत्तरं धम्मसद्धं जणयइ । अणुत्तराए धम्मसद्धाए संवेगं हव्वमागच्छइ । अणन्ताणुबन्धि-कोहमाणमायालोभे खवेइ । कम्मं न बन्धइ । तप्पञ्चइयं च णं मिच्छुत्त-विसोहिं काऊण दंसणाराहए भवइ । दंसणविसोहीए य णं विसुद्धाए अत्थेगइए तेणेव भवग्गहणेणं सिज्जइ । सोहीए य णं विसुद्धाए तच्चं पुणे भवग्गहणं नाइक्कमइ ॥ १ ॥

२ निव्वेएणं भन्ते जीवे किं जणयइ ॥ निव्वेएणं दिव्वमाणुसतेरिच्छि-एसु कामभोगेसु निव्वेयं हव्वमागच्छइ । सत्त्वविसएसु विरज्जइ सत्त्वविस-एसु विरज्जमाणे आरम्भपरिच्चायं करेइ । आरम्भपरिच्चायं करेमाणे संसार-मगं वोच्छिन्दइ सिद्धिमगं पडिवक्खे य भवइ ॥ २ ॥

३ धम्मसद्धाए णं भन्ते जीवे किं जणयइ ॥ धम्मसद्धाए णं साया-सोक्खेसु रज्जमाणे विरज्जइ । आगारधम्मं च णं चयइ अणगारिए णं जीवे सारीरमाणसाणं दुक्खाणं छेयणभेयणसंजोगाईणं वोच्छेयं करेइ अवावाहं च सुहं निव्वत्तेइ ॥ ३ ॥

४ गुरुसाहम्मियसुस्सूसणाए णं भन्ते जीवे किं जणयइ ॥ गुरुसाह-म्मियसुस्सूसणाए णं विणयपडिवत्तिं जणयइ । विणयपडिवक्खे य णं जीवे अणच्चासायणसीले नेरइयतिरिक्खजोणियमणुस्सदेवदुग्गईओ निरुम्भइ । वण्णसंजलणभत्तिवहुमाणयाए मणुस्सदेवदुग्गईओ निव्वन्धइ सिद्धिं सोग्गइं च विसोहेइ । पसत्थाईं च णं विणयमूलाईं सत्त्वकज्जाईं साहेइ । अन्ने य बहवे जीवे विणिइत्ता भवइ ॥ ४ ॥

५ आलोयणाए णं भन्ते जीवे किं जणयइ ॥ आलोयणाए णं मायानियाणमिच्छादरिसणसल्लाणं मोक्खमग्गविग्घाणं अणन्तसंसारबन्ध-णाणं उद्धरणं करेइ । उज्जुभावं च जणयइ । उज्जुभावपडिवक्खे य णं जीवे अमाई इत्थीवेयनपुंसगवेयं च न बन्धइ । पुव्ववद्धं च णं निज्जरेइ ॥ ५ ॥

६ निन्दणयाए णं भन्ते जीवे किं जणयइ ॥ निन्दणयाए णं पच्छाणुतावं जणयइ । पच्छाणुतावेणं विरज्जमाणे करणगुणसेहिं पडिवज्जइ । करणगुणसेहिं पडिवच्चे य णं अणगारे मोहणिज्जं कम्मं उग्घाएइ ॥ ६ ॥

७ गरहणयाए णं भन्ते जीवे किं जणयइ ॥ गरहणयाए अपुरेक्कारं जणयइ । अपुरेक्कारणं णं जीवे अप्पसत्थेहिं तो जोगेहिं तो नियत्तेइ पसत्थे य पडिवज्जइ पसत्थजोगपडिवच्चे य णं अणगारे अणन्तघाइपज्जवे सवेइ ॥ ७ ॥

८ सामाइएणं भन्ते जीवे किं जणयइ ॥ सामाइएणं सावज्जजोगविरइं जणयइ ॥ ८ ॥

९ चउव्वीसत्थएणं भन्ते जीवे किं जणयइ ॥ च० दंसणविसोहिं जणयइ ॥ ९ ॥

१० वन्दणएणं भन्ते जीवे किं जणयइ ॥ व० नीयागोयं कम्मं सवेइ । उच्चागोयं कम्मं निवन्धइ । सोहगं च णं अप्पडिहयं आणाफलं निव्वत्तेइ दाहिणभावं च णं जणयइ ॥ १० ॥

११ पडिक्कमणेणं भन्ते जीवे किं जणयइ । प० वयछिद्दाणि पिहेइ । पिडियवयछिद्दे पुण जीवे निरुद्धासवे असबलचरित्ते अट्टसु पवयणमायासु उवउत्ते अपुहत्ते सुप्पणिहिंदिए विहरइ ॥ ११ ॥

१२ काउस्सगणेणं भन्ते जीवे किं जणयइ ॥ का० तीयपडुप्पसं पायच्छित्तं विसोहेइ । विसुद्धपायच्छित्ते य जीवे निव्वुयहियए ओहरियमरु व्व भारवहे पसत्थज्झाणोवगए सुहंसुहेणं विहरइ ॥ १२ ॥

१३ पच्चक्खसाणेणं भन्ते जीवे किं जणयइ ॥ प० आसवदाराइं निरुम्मइ । पच्चक्खसाणेणं इच्छानिरोहं जणयइ । इच्छानिरोहं गए य णं जीवे सव्वदव्वेसु विणीयतण्हे सीइभूए विहरइ ॥ १३ ॥

१४ थवथुइमंगलेणं भन्ते जीवे किं जणयइ ॥ थ० नाणदंसणचरित्त-बोहिलामं जणयइ । नाणदंसणचरित्तबोहिलाभसंपत्ते य णं जीवे अन्तकिरियं कप्पविमाणोववात्तिगं आराहणं आराहेइ ॥ १४ ॥

१५ कालपडिलेहणयाए णं भन्ते जीवे किं जणयइ ॥ का० नाणावरणिज्जं कम्मं सवेइ ॥ १५ ॥

१६ पायच्छित्तकरणेणं भन्ते जीवे किं जणयइ ॥ पा० पावविसोहिं जणयइ । निरइयारे वावि भवइ । सम्मं च णं पायच्छित्तं पडिवज्जमाणे मगं च मगफलं च विसोहेइ आयारं च आयारफलं च आराहेइ ॥ १६ ॥

१७ खमावणयाए णं भन्ते जीवे किं जणयइ ॥ ख० पल्हायणभावं जणयइ । पल्हायणभावमुवगए य सव्वपाणभूयजीवसत्तेसु मेत्तीभावमुप्पाएइ । मेत्तीभावमुवगए यावि जीवे भावविसोहिं काऊण निव्वभए भवइ ॥१७॥

१८ सज्झाएण भन्ते जीवे किं जणयइ ॥ स० नाणावरणिज्जं कम्मं खवेइ ॥ १८ ॥

१९ वायणाए णं भन्ते जीवे किं जणयइ ॥ वा० निज्जरं जणयइ । सुयस्स य अणासायणाए वट्टए । सुयस्स अणासायणाए वट्टमाणे तित्थधम्मं अवलम्बइ । तित्थधम्मं अवलम्बमाणे महानिज्जरे महापज्जवसाणे भवइ ॥ १९ ॥

२० पडिपुच्छणयाए णं भन्ते जीवे किं जणयइ ॥ प० सुत्तत्थतइभयाइं विसोहेइ । कंखामोहणिज्जं कम्मं वोच्छिन्दइ ॥ २० ॥

२१ परियट्ठणाए णं भन्ते जीवे किं जणयइ ॥ प० वंजणाइं जणयइ वंजणलद्धिं च उप्पाएइ ॥ २१ ॥

२२ अणुप्पेहाए णं भन्ते जीवे किं जणयइ ॥ अ० आउयवज्जाओ स उकम्मप्पगडीओ घणियबन्धणबद्धाओ सिट्ठिलवन्धणबद्धाओ पकरेइ । वीहकालट्ठिइयाओ हस्सकालट्ठिइयाओ पकरेइ । तिट्ठ्वाणुभावाओ मन्दाणुभावाओ पकरेइ । [बहुपएसग्गाओ अप्पएसग्गाओ पकरेइ] आउयं च णं कम्मं सिया बन्धइ सिया नो बन्धइ । असायावेयणिज्जं च णं कम्मं नो भुज्जो भुज्जो उवाचिणाइ अणाइयं च णं अणवदग्गं वीहमद्धं चाउरन्तं संसारकन्तारं खिप्पामेव वीइवयइ ॥ २२ ॥

२३ धम्मकहाए णं भन्ते जीवे किं जणयइ ॥ ध० निज्जरं जणयइ । धम्मकहाए णं पवयणं पभावेइ । पवयणपभावेणं जीवे आगमेसस्स भदत्ताए कम्मं निवन्धइ ॥ २३ ॥

२४ सुयस्स आराहणयाए णं भन्ते जीवे किं जणयइ ॥ सु० अज्ञाणं खवेइ न य संकिलिस्सइ ॥ २४ ॥

२५ एगगमणसंनिवेसणयाए णं भन्ते जीवे किं जणयइ ॥ ए० चित्तनिरोहं करेइ ॥ २५ ॥

२६ संजमएणं भन्ते जीवे किं जणयइ ॥ सं० अणण्हयत्तं जणयइ ॥ २६ ॥

२७ तवेणं भन्ते जीवे किं जणयइ ॥ तवेणं वोदाणं जणयइ ॥ २७ ॥

२८ वोदाणेणं भन्ते जीवे किं जणयइ ॥ वो० अकिरियं जणयइ । अकिरियाए भवित्ता तओ पच्छा सिज्झइ वुज्झइ मुच्चइ परिनिव्वाइ सव्वदुक्खाणमन्तं करेइ ॥ २८ ॥

१९ सुहसाएणं भन्ते जीवे किं जणयइ ॥ सु० अणुस्सुयत्तं जणयइ । अणुस्सुयाए णं जीवे अणुकम्पए अणुवमडे विगयसोगे चरित्तमोहणिज्जं कम्मं खवेइ ॥ १९ ॥

२० अप्पडिवद्धयाए णं भन्ते जीवे किं जणयइ ॥ अ० निस्संगत्तं जणयइ । निस्संगत्तेणं जीवे एगे एगगचित्ते दिया य राओ य असज्जमाणे अप्पडिवद्धे यावि विहरइ ॥ २० ॥

२१ विवित्तसयणासणयाए णं भन्ते जीवे किं जणयइ ॥ वि० चरित्त-
गुत्तिं जणयइ । चरित्तगुत्ते य णं जीवे विवित्ताहारे दट्ठचरित्ते एगन्तरए
मोक्खभावपडिवत्ते अट्ठविहकम्मगण्ठिं निज्जरेइ ॥ २१ ॥

२२ विनियट्ठणयाए णं भन्ते जीवे किं जणयइ ॥ वि० पावकम्माणं
अकरणयाए अब्भुट्ठेइ । पुट्ठवद्धाण य निज्जरणाए तं नियत्तेइ तओ
पच्छा चाउरन्तं संसारकन्तारं वीइक्खइ ॥ २२ ॥

२३ संभोगपच्चक्खाणेणं भन्ते जीवे किं जणयइ ॥ सं० आलम्बणाइं
खवेइ । निरालम्बणस्स य आययट्ठिया जोगा भवन्ति । सएणं लाभेणं
संतुस्सइ परलाभं नो आसाएइ परलाभं नो तक्केइ नो पीहेइ नो पत्थेइ नो
अभिलसइ । परलाभं अणस्सायमाणे अतक्केमाणे अपीहमाणे अपत्थेमाणे
अणभिलसमाणे दुच्चं सुहसेज्जं उवसंपज्जित्ता णं विहरइ ॥ २३ ॥

२४ उवाहिपच्चक्खाणेणं भन्ते जीवे किं जणयइ ॥ उ० अपालिमन्थं
जणयइ । निरुवहिणं जीवे निक्कंखी उवहिमन्तरेण य न संकिलिस्सइ ॥ २४ ॥

२५ आहारपच्चक्खाणेणं भन्ते जीवे किं जणयइ ॥ आ० जीविया-
संसप्पओगं वोच्छिन्दइ । जीवियासंसप्पओगं वोच्छिन्दित्ता जीवे
आहारमन्तरेणं न संकिलिस्सइ ॥ २५ ॥

२६ कसायपच्चक्खाणेणं भन्ते जीवे किं जणयइ ॥ क० वीयरग-
भावं जणयइ । वीयरगभावपडिवत्ते वि य णं जीवे समसुहदुक्खे
भवइ ॥ २६ ॥

२७ जोगपच्चक्खाणेणं भन्ते जीवे किं जणयइ ॥ जो० अजोगत्तं
जणयइ । अजोगी णं जीवे नवं कम्मं न बन्धइ पुट्ठवद्धं निज्जरेइ ॥ २७ ॥

२८ सरीरपच्चक्खाणेणं भन्ते जीवे किं जणयइ ॥ स० सिद्धाह-
सयगुणत्तणं निव्वत्तेइ । सिद्धाहसयगुणसंपत्ते य णं जीवे लोगगमुवगए
परमसुही भवइ ॥ २८ ॥

२९ सहायपच्चक्खाणेणं भन्ते जीवे किं जणयइ ॥ स० एगीभावं
जणयइ । एगीभावभूए वि य णं जीवे एगगं भावेमाणे अप्पझंझे अप्पकलहे

अप्पकसाए अप्पतुमंतुमे संजमबहुले संवरबहुले समाहिए यावि भवइ ॥ ३९ ॥

४० मत्तपच्चक्खाणेणं भन्ते जीवे किं जणयइ ॥ भ० अणेगाइं भवसयाइं निरुम्मइ ॥ ४० ॥

४१ सबभावपच्चक्खाणेणं भन्ते जीवे किं जणयइ ॥ स० अनियट्ठिं जणयइ । अनियट्ठिपडिवक्खे य अणगारे चत्तारि केवलिकम्मंसे खवेइ तं जहा वेयणिज्जं आउयं नामं गोयं । तओ पच्छा सिज्झइ बुज्झइ मुच्चइ सब्बदुक्खाणमन्तं करेइ ॥ ४१ ॥

४२ पडिरूवयाए णं भन्ते जीवे किं जणयइ ॥ प० लाघवियं जणयइ । लघुभूए णं जीवे अप्पमत्ते पागडलिंगे पसत्थलिंगे विसुद्धसम्मत्ते सत्तसमिहसमत्ते सब्बपाणभूयजीवसत्तेसु वीससाणिज्जरूवे अप्पडिलेहे जिहन्दिए विउलतवसमिहसमन्नागए यावि भवइ ॥ ४२ ॥

४३ वेयावक्खेणं भन्ते जीवे किं जणयइ ॥ वे० तित्थयरनामगोत्तं कम्मं निबन्धइ ॥ ४३ ॥

४४ सत्त्वगुणसंपन्नयाए णं भन्ते जीवे किं जणयइ ॥ स० अपुणरावर्त्तिं जणयइ । अपुणरावर्त्तिं पत्तए य णं जीवे सारीरमाणसाणं दुक्खाणं नो भागी भवइ ॥ ४४ ॥

४५ वीयरगयाए णं भन्ते जीवे किं जणयइ ॥ वी० नेहाणुवन्धणाणि तण्हाणुवन्धणाणि य वोच्छिन्दइ मणुल्लामणुत्तेसु सदरूवरसफरिसगन्धेसु चैव विरज्जइ ॥ ४५ ॥

४६ खन्तीए णं भन्ते जीवे किं जणयइ ॥ ख० परीसहे जिणइ ॥ ४६ ॥

४७ मुत्तीए णं भन्ते जीवे किं जणयइ ॥ मु० अकिंचणं जणयइ । अकिंचणे य जीवे अत्थलोलोणं अपत्थणिज्जो भवइ ॥ ४७ ॥

४८ अज्जवयाए णं भन्ते जीवे किं जणयइ ॥ अ० काउज्जुययं भावुज्जुययं भासुज्जुययं अविसंवायणं जणयइ । अविसंवायणसंपन्नयाए णं जीवे धम्मस्स आराहए भवइ ॥ ४८ ॥

४९ मद्दवयाए णं भन्ते जीवे किं जणयइ ॥ म० अणुस्सियत्तं जणयइ । अणुस्सियत्ते णं जीवे मिउमद्दवसंपक्खे अट्ठ मयट्ठाणां निट्ठावेइ ॥ ४९ ॥

५० भावसच्चवेणं भन्ते जीवे किं जणयइ ॥ भा० भावविसोहिं जणयइ ॥ भावविसोहीए वट्ठमाणे जीवे अरहन्तपन्नत्तस्स धम्मस्स आराहणयाए अब्भुट्ठेइ । अरहन्तपन्नत्तस्स धम्मस्स आराहणयाए अब्भुट्ठित्ता परलोगधम्मस्स आराहए हवइ ॥ ५० ॥

५१ करणसच्चेणं भन्ते जीवे किं जणयइ ॥ क० करणसत्तिं जणयइ । करणसच्चे वट्टमाणे जीवे जहावाई तहाकारी यावि भवइ ॥ ५१ ॥

५२ जोगसच्चेणं भन्ते जीवे किं जणयइ ॥ जो० जोगं विसोहेइ ॥ ५२ ॥

५३ मणगुत्तयाए णं भन्ते जीवे किं जणयइ ॥ म० जीवे एगगं जणयइ । एगगचित्ते णं जीवे मणगुत्ते संजमाराहए भवइ ॥ ५३ ॥

५४ वयगुत्तयाए णं भन्ते जीवे किं जणयइ ॥ व० निव्वियारत्तं जणयइ । निव्वियारे णं जीवे वइगुत्ते अज्झप्पजोगसाहणजुत्ते यावि भवइ ॥ ५४ ॥

५५ कायगुत्तयाए णं भन्ते जीवे किं जणयइ ॥ का० संवरं जणयइ । संवरेणं कायगुत्ते पुणो पावासवनिरोहं करेइ ॥ ५५ ॥

५६ मणसमाहारणयाए णं भन्ते जीवे किं जणयइ ॥ म० एगगं जणयइ । एगगं जणइत्ता नाणपज्जवे जणयइ । नाणपज्जवे जणइत्ता सम्मत्तं विसोहेइ मिच्छत्तं च निज्जरेइ ॥ ५६ ॥

५७ वयसमाहारणयाए णं भन्ते जीवे किं जणयइ ॥ व० वयसाहारणदंसणपज्जवे विसोहेइ । वयसाहारणदंसणपज्जवे विसोहिता सुलहबोहियत्तं निव्वत्तेइ दुल्लहबोहियत्तं निज्जरेइ ॥ ५७ ॥

५८ कायसमाहारणयाए णं भन्ते जीवे किं जणयइ ॥ का० चरित्तपज्जवे विसोहेइ । चरित्तपज्जवे विसोहिता अहक्खायचरित्तं विसोहेइ । अहक्खायचरित्तं विसोहिता चत्तारि केवलिकम्मंसे खवेइ । तओ पच्छा सिज्झइ बुज्झइ मुच्चइ परिनिव्वाइ सव्वदुक्खाणमन्तं करेइ ॥ ५८ ॥

५९ नाणसंपन्नयाए णं भन्ते जीवे किं जणयइ । ना० जीवे सव्वभावाहिगमं जणयइ । नाणसंपन्ने णं जीवे चाउरन्ते संसारकन्तारे न विणस्सइ । जहा सूर्इ ससुत्ता पडिया न विणस्सइ । तहा जीवे ससुत्ते संसारे न विणस्सइ ॥ नाणविणयतवचरित्तजोगे संपाउणइ ससमयपरसमयविसारए थ असंघायणिज्जे भवइ ॥ ५९ ॥

६० दंसणसंपन्नयाए णं भन्ते जीवे किं जणयइ ॥ दं० भवमिच्छत्तछेयणं करेइ परं न विज्झायइ । परं अविज्झाएमाणे अणुत्तरं नाणदंसणेणं अप्पाणं संजोएमाणे सम्मं भावेमाणे विहरइ ॥ ६० ॥

६१ चरित्तसंपन्नयाए णं भन्ते जीवे किं जणयइ ॥ च० सेलेसीभावं जणयइ । सेलेसिं पडिब्रत्ते थ अणमारे चत्तारि केवलिकम्मंसे खवेइ । तओ पच्छा सिज्झइ बुज्झइ मुच्चइ परिनिव्वाइ सुव्वदुक्खाणमन्तं करेइ ॥ ६१ ॥

६२ सोइन्द्रियनिगहेणं भन्ते जीवे किं जणयइ ॥ सो० मणुसामणु-
न्नेसु सद्देसु रागदोसनिगहं जणयइ तप्पच्चइयं कम्मं न बन्धइ पुव्वबद्धं
च निज्जरेइ ॥ ६२ ॥

६३ चक्खिन्द्रियनिगहेणं भन्ते जीवे किं जणयइ ॥ च० मणुसामणु-
न्नेसु रूवेसु रागदोसनिगहं जणयइ तप्पच्चइयं कम्मं न बन्धइ पुव्वबद्धं
च निज्जरेइ ॥ ६३ ॥

६४ घाणिन्द्रियनिगहेणं भन्ते जीवे किं जणयइ ॥ घा० मणुसाम-
णुन्नेसु गन्धेसु रागदोसनिगहं जणयइ तप्पच्चइयं कम्मं न बन्धइ
पुव्वबद्धं च निज्जरेइ ॥ ६४ ॥

६५ जिह्विन्द्रियनिगहेणं भन्ते जीवे किं जणयइ ॥ जि० मणुसाम-
णुन्नेसु रसेसु रागदोसनिगहं जणयइ तप्पच्चइयं कम्मं न बन्धइ
पुव्वबद्धं च निज्जरेइ ॥ ६५ ॥

६६ फासिन्द्रियनिगहेणं भन्ते जीवे किं जणयइ ॥ फा० मणुसाम-
णुन्नेसु फासेसु रागदोसनिगहं जणयइ तप्पच्चइयं कम्मं न बन्धइ
पुव्वबद्धं च निज्जरेइ ॥ ६६ ॥

६७ कोहविजएणं भन्ते जीवे किं जणयइ ॥ को० सन्ति जणयइ
कोहवेयणिज्जं कम्मं न बन्धइ पुव्वबद्धं च निज्जरेइ ॥ ६७ ॥

६८ माणविजएणं भन्ते जीवे किं जणयइ ॥ मा० मद्दवं जणयइ
माणवेयणिज्जं कम्मं न बन्धइ पुव्वबद्धं च निज्जरेइ ॥ ६८ ॥

६९ मायाविजएणं भन्ते जीवे किं जणयइ ॥ मा० अज्जवं जणयइ
मायावेयणिज्जं कम्मं न बन्धइ पुव्वबद्धं च निज्जरेइ ॥ ६९ ॥

७० लोभविजएणं भन्ते जीवे किं जणयइ ॥ लो० संतोसं जणयइ
लोभवेयणिज्जं कम्मं न बन्धइ पुव्वबद्धं च निज्जरेइ ॥ ७० ॥

७१ पिज्जदोसमिच्छादंसणविजएणं भन्ते जीवे किं जणयइ ॥ पि०
नाणदंसणचरित्तराहणयाए अब्भुट्टेइ ॥ अट्टविहस्स कम्मस्स कम्मगण्ठि-
विमोयणयाए तप्पढमयाए जहाणुपुव्वीए अट्टवीसइविहं मोहणिज्जं कम्मं
उग्धाएइ पंचविहं नाणावरणिज्जं नवाविहं दंसणावरणिज्जं पंचविहं
अन्तरायं एए तिप्पि वि कम्मंसे जुगवं खवेइ । तत्रो पच्छा अणुत्तरं
कासिणं पडिपुणं निरावरणं वित्तिमिरं विसुद्धं लोगालोगप्पभासणं केवल-
वरनाणदंसणं समुप्पाडेइ । जाव सजोगी भवइ ताव इरियावहियं कम्मं
निबन्धइ सुहफरिसं दुसमयठिइयं । तं पढमसमए बद्धं विइयसमए वेइयं

तइयसमए निज्जिण्णं तं बद्धं पुट्ठं उदीरियं वेइयं निज्जिण्णं सेयाले य
अकम्मं चावि भवइ ॥ ७१ ॥

७२ अहाउयं पालइत्ता अन्तोमुहुत्तद्धावसेसाउए जोगनिरोहं
करेमाणे सुहुमकिरियं अप्पडिवाइं सुक्कज्झाणं ज्ञायमाणे तप्पढमयाए
मणजोगं निरुम्भइ वइजोगं निरुम्भइ कायजोगं निरुम्भइ आणापाणनिरोहं
करेइ ईसि पंचरहस्सक्खरुच्चारणद्वाए य णं अणगारे समुच्छिन्नकिरियं
अनियट्ठिसुक्कज्झाणं ज्ञियायमाणे वेयणिज्जं आउयं नामं गोत्तं च एए
चत्तारि कम्मंसे जुगवं खवेइ ॥ ७२ ॥

७३ तओ ओरालियतेयकम्माइं सज्वाहिं विप्पजहणाहिं विप्पजहत्ता
उज्जुसेट्ठिपत्ते अफुसमाणगई उट्ठं एगसमएणं अविग्गहेणं तत्थ गन्ता
सागारोवउत्ते सिज्झइ बुज्झइ जाव अन्तं करेइ ॥ ७३ ॥

७४ एस खलु सम्मत्तपरक्कमस्स अज्झयणस्स अट्ठे समणेणं भगवया
महावीरेणं आघविए पच्चविए परूविए दंसिए उवदंसिए ॥ ७४ ॥
॥ त्ति बेमि ॥

॥ सम्मत्तपरक्कमे समत्ते ॥ २९ ॥

॥ तवमगं त्रिंशं अध्ययनम् ॥

जहा उ पावगं कम्मं रागदोससमज्जियं ।

खवेइ तवसा भिक्खू तमेगगमणो सुण ॥ १ ॥

पाणवहमुसावायाअदत्तमेहुणपरिग्गहा विरओ ।

राईभोयणविरओ जीवो भवइ अणासवो ॥ २ ॥

पंचसमिओ तिगुत्तो अकसाओ जिइन्दिओ ।

अगारवो य निस्सल्लो जीवो होइ अणासवो ॥ ३ ॥

एएसि तु विवच्चासे रागदोससमज्जियं ।

खवेइ उ जहा भिक्खू तमेगगमणो सुण ॥ ४ ॥

जहा महातलायस्स सन्निरुद्धे जलागमे ।

उस्सिचणाए तवणाए कमेणं सोसणा भवे ॥ ५ ॥

एवं तु संजयस्सावि पावकम्मनिरासवे ।

भवकोडीसंचियं कम्मं तवसा निज्जरिज्झइ ॥ ६ ॥

सो तवो दुविहो वुत्तो बाहिरब्धिन्तरो तथा ।
 बाहिरो छुविहो वुत्तो एवमब्धिन्तरो तवो ॥ ७ ॥
 अणसणमूणोयरिया भिक्खायरिया य रसपरिच्चाओ ।
 कायकिलेसो संलीणया य वज्झो तवो होइ ॥ ८ ॥
 इत्तरिय मरणकाला य अणसणा दुविहा भवे ।
 इत्तरिय सावकंखा निरवकंखा उ विइज्जिया ॥ ९ ॥
 जो सो इत्तरियतवो सो समासेण छुविहो ।
 सेदितवो पयरतवो घणो य तह होइ वग्गो य ॥ १० ॥
 तत्तो य वग्गवग्गो पंचमो छुट्ठओ पइण्णतवो ।
 मणइच्छियचित्तत्थो नायव्वो होइ इत्तरिओ ॥ ११ ॥
 जा सा अणसणा मरणे दुविहा सा वियाहिया ।
 सवियारमवियारा कायच्चिट्ठं पई भवे ॥ १२ ॥
 अहवा सपरिकम्मा अपरिकम्मा य आहिया ।
 नीहारिमणीहारी आहारच्छेओ दोसु वि ॥ १३ ॥
 ओमोयरणं पंचहा समासेण वियाहियं ।
 दव्वओ खेत्तकालेण भावेण पज्जवेहि य ॥ १४ ॥
 जो जरस्स उ आहारो तत्तो ओमं तु जो करे ।
 जहच्चेणेगसिंथाई एवं दव्वेण ऊ भवे ॥ १५ ॥
 गामे नगरे तह रायहाणिनिगमे य आगरे पल्ली ।
 खेडे कब्बडदोणमुहपट्टणमडम्बसंवाहे ॥ १६ ॥
 आसमपण विहारे सन्निवेसे समायघोसे य ।
 थलिसेणाखन्धारे सत्थे संवट्टकोट्ठे य ॥ १७ ॥
 वाडेसु व रच्छासु व घरेसु वा एवमित्तिथं खेत्तं ।
 कप्पइ उ एवमाई एवं खेत्तेण ऊ भवे ॥ १८ ॥
 पेडा य अद्धपेडा गोमुत्तिपथंगवीहिया चेव ।
 सम्बुक्कावट्ठाऽऽययगन्तुपच्चागया छट्ठा ॥ १९ ॥
 दिवसस्स पोरुसीणं चउण्हं पि उ जत्तिओ भवे कालो ।
 एवं चरमाणो खलु कालोमाणं मुणेयव्वं ॥ २० ॥
 अहवा तइयाए पोरिसीए ऊणाइ घासमेसन्तो ।
 चउभागूणाए वा एवं कालेण ऊ भवे ॥ २१ ॥

इत्थी वा पुरिसो वा अलंकिओ वाऽणलंकिओ वा वि ।

अन्नयरवयत्थो वा अन्नयरेणं व वत्थेणं ॥ २२ ॥

अन्नेण विसेसेणं वण्णेणं भावमणुमुयन्ते उ ।

एवं चरमाणो खलु भावोमाणं मुणेयव्वं ॥ २३ ॥

दश्वे खेत्ते काले भावम्मि य आहिया उ जे भावा ।

एएहि ओमचरओ पज्जवचरओ भवे भिक्खू ॥ २४ ॥

अट्ठविहगोयरग्गं तु तहा सत्तेव एसणा ।

अभिग्गहा य जे अन्ने भिक्खायरियमाहिया ॥ २५ ॥

खीरदहिसप्पिमाई पणीयं पाणभोयणं ।

परिवज्जणं रसाणं तु भणियं रसविवज्जणं ॥ २६ ॥

ठाणा वीरासणाईया जीवस्स उ सुहावहा ।

उग्गा जहा धरिज्जन्ति कायकिलेसं तमाहियं ॥ २७ ॥

एगन्तमणावाए इत्थीपसुविवज्जिए ।

सयणासणसेवणया विवित्तं सयणासणं ॥ २८ ॥

एसो बाहिरगतवो समासेण वियाहिओ ।

अदिमन्तरं तवं एत्तो वुच्छामि अणुपुव्वसो ॥ २९ ॥

पायच्छित्तं विणओ वेयावच्चं तहेव सज्झाओ ।

ज्ञाणं च विउस्सग्गो एसो अदिमन्तरो तवो ॥ ३० ॥

आलोयणारिहाईयं पायच्छित्तं तु दसविहं ।

जे भिक्खू वहई सम्मं पायच्छित्तं तमाहियं ॥ ३१ ॥

अच्छुट्ठाणं अंजलिकरणं तहेवासणदायणं ।

गुरुभत्तिभावसुस्सूसा विणओ एस वियाहिओ ॥ ३२ ॥

आयरियमाईए वेयावच्चम्मि दसविहे ।

आसेवणं जहाथामं वेयावच्चं तमाहियं ॥ ३३ ॥

वायणा पुच्छणा चेव तहेव परियट्ठणा ।

अणुप्पेहा धम्मकहा सज्झाओ पंचहा भवे ॥ ३४ ॥

अट्ठरुट्ठाणि वज्जित्ता ज्ञापज्जा सुसमाहिए ।

धम्मसुक्काई ज्ञाणाई ज्ञाणं तं तु बुहा वए ॥ ३५ ॥

सयणासणट्ठाणे वा जे उ भिक्खू न वावरे ।

कायस्स विउस्सग्गो छट्ठो सो परिकित्तिओ ॥ ३६ ॥

एवं तवं तु दुविहं जे सम्मं आयरे मुणी ।
 से खिण्णं सन्वसंसारा विप्पमुच्चइ पण्डिए ॥ ३७ ॥ ति वेमि ॥

॥ तवमगं समत्तं ॥ ३० ॥

॥ चरणाविही एकत्रिंशं अध्ययनम् ॥

ચરણવિહિં પવક્કામિ જીવસ્સ ડ સુહાવહં ।
 જં ચરિત્તા બહુ જીવા તિણ્ણા સંસારસાગરં ॥ ૧ ॥
 એગઓ વિરહં કુજ્ઞા એગઓ ય પવત્તણં ।
 અસંજમે નિયત્તિં ચ સંજમે ય પવત્તણં ॥ ૨ ॥
 રાગદ્દોસે ય વો પાવે પાવકમ્મપવત્તણે ।
 જે ભિક્ખૂ રુમ્મહં નિચ્છં સે ન અચ્છઇ મળ્ડલે ॥ ૩ ॥
 દણ્ડાણં ગ્ગરવાણં ચ સલ્લાણં ચ તિયં તિયં ।
 જે ભિક્ખૂ ચયઈ નિચ્છં સે ન અચ્છઇ મળ્ડલે ॥ ૪ ॥
 દિવ્વે ય જે ડવસગ્ગે તહા તેરિચ્છમાણસે ।
 જે ભિક્ખૂ સહઈ સમ્મં સે ન અચ્છઇ મળ્ડલે ॥ ૫ ॥
 વિગહાકસાયસન્નાણં જ્ઞાણાણં ચ દુયં તહા ।
 જે ભિક્ખૂ વજ્જઈ નિચ્છં સે ન અચ્છઇ મળ્ડલે ॥ ૬ ॥
 વણ્ણસુ ઇન્દિયત્થેસુ સમિહંસુ કિરિયાસુ ય ।
 જે ભિક્ખૂ જયઈ નિચ્છં સે ન અચ્છઇ મળ્ડલે ॥ ૭ ॥
 લેસાસુ છસુ કાપ્પસુ છક્કે આહારકારણે ।
 જે ભિક્ખૂ જયઈ નિચ્છં સે ન અચ્છઇ મળ્ડલે ॥ ૮ ॥
 પિણ્ડોગ્ગહપઢિમાસુ મયટ્ઠાણેસુ સત્તસુ ।
 જે ભિક્ખૂ જયઈ નિચ્છં સે ન અચ્છઇ મળ્ડલે ॥ ૯ ॥
 મદેસુ વમ્મગુત્તીસુ ભિક્ખુધમ્મંમિં દસાવિહે ।
 જે ભિક્ખૂ જયઈ નિચ્છં સે ન અચ્છઇ મળ્ડલે ॥ ૧૦ ॥
 ડવાસગાણં પઢિમાસુ ભિક્ખૂણં પઢિમાસુ ય ।
 જે ભિક્ખૂ જયઈ નિચ્છં સે ન અચ્છઇ મળ્ડલે ॥ ૧૧ ॥

किरियासु भूयगामेसु परमाहम्मिएसु य ।
 जे भिक्खू जयई निच्चं से न अच्छइ मण्डले ॥ ११ ॥
 गाहासोलसएहिं तहा असंजमम्मि य ।
 जे भिक्खू जयई निच्चं से न अच्छइ मण्डले ॥ १३ ॥
 बम्मम्मि नायज्झयणेसु ठाणेसु यऽ समाहिण ।
 जे भिक्खू जयई निच्चं से न अच्छइ मण्डले ॥ १४ ॥
 एगवीसाए सबले बावीसाए परीसहे ।
 जे भिक्खू जयई निच्चं से न अच्छइ मण्डले ॥ १५ ॥
 तेवीसाइ स्यगडे रुवाहिणसु सुरेसु अ ।
 जे भिक्खू जयई निच्चं से न अच्छइ मण्डले ॥ १६ ॥
 पणुवीसभावणासु उद्देसेसु वसाइणं ।
 जे भिक्खू जयई निच्चं से न अच्छइ मण्डले ॥ १७ ॥
 अणगारगुणेहिं च पगप्पम्मि तहेव य ।
 जे भिक्खू जयई निच्चं से न अच्छइ मण्डले ॥ १८ ॥
 पावसुयपसंगेसु मोहट्टाणेसु चेव य ।
 जे भिक्खू जयई निच्चं से न अच्छइ मण्डले ॥ १९ ॥
 सिद्धाइगुणजोगेसु तेत्तीसासायणासु य ।
 जे भिक्खू जयई निच्चं से न अच्छइ मण्डले ॥ २० ॥
 ईइ एणसु ठाणेसु जे भिक्खू जयई सया ।
 खिप्पं सो सव्वसंसारा विप्पमुच्चइ पण्डिओ ॥ २१ ॥ त्ति बोमि ॥

॥ चरणविही समत्ता ॥ ३१ ॥

॥ पमायट्टाणं द्वात्रिंशं अध्ययनम् ॥

अच्चन्तकालस्स समूलगस्स सव्वस्स दुक्खस्स उ जो पमाक्खो ।
 तं भासओ मे पडिण्णचित्ता सुणेह एगन्तहियं हियत्थं ॥ १ ॥
 नाणस्स सव्वस्स पगासणाए अन्नणमोहस्स विवज्जणाए ।
 रागस्स दोसस्स य संखएणं एगन्तसोक्खं समुवेइ मोक्खं ॥ २ ॥

तस्सेस मग्गो गुरुविद्वसेवा विवज्जणा बालजणस्स दूरा ।
 सज्झायएगन्तनिसेवणा य सुत्तत्थसंचिन्तणया धिई य ॥ ३ ॥
 आहारमिच्छे मियमेसाणिज्जं सहायमिच्छे निउणत्थबुद्धिं ।
 निकेयमिच्छेज्ज विवेगजोग्गं समाहिकामे समणे तवस्सी ॥ ४ ॥
 न वा लभेज्जा निउणं सहायं गुणाहियं वा गुणओ समं वा ।
 एक्को वि पावाइं विवज्जयन्तो विहरेज्ज कामेसु असज्जमाणो ॥ ५ ॥
 जहा य अण्डप्पभवा बलागा अण्डं बलागप्पभवं जहा य ।
 एमेव मोहाययणं खु तण्हा मोहं च तण्हाययणं वयन्ति ॥ ६ ॥
 रागो य दोसो वि य कम्मबीयं कम्मं च मोहप्पभवं वयन्ति ।
 कम्मं च जाईमरणस्स मूलं दुक्खं च जाईमरणं वयन्ति ॥ ७ ॥
 दुक्खं हयं जस्स न होइ मोहो मोहो हओ जस्स न होइ तण्हा ।
 तण्हा हया जस्स न होइ लोहो लोहो हओ जस्स न किंचणाइं ॥ ८ ॥
 रागं च दोसं च तहेव मोहं उद्धत्तुकामेण समूलजालं ।
 जे जे उवाया पडिवज्जियव्वा ते कित्तइस्सामि अहाणुपुट्ठि ॥ ९ ॥
 रसा पगामं न निसेवियव्वा पायं रसा दित्तिकरा नराणं ।
 दित्तं च कामा समभिद्ववन्ति दुमं जहा साउफलं व पक्खी ॥ १० ॥
 जहा दवग्गी पउरिन्धणे वणे समारुओ नोवसमं उवेइ ।
 एविन्दिद्यग्गी वि पगामभोइणो न बम्भयारिस्स हियाय कस्सई ॥ ११ ॥
 विवित्तसेज्जासणजन्तियाणं ओमासणाणं दमिइन्दियाणं ।
 न रागसत्तू धरिसेइ चित्तं पराइओ वाहिरिवोसहेहिं ॥ १२ ॥
 जहा बिरालावसहस्स मूले न मूसगाणं वसही पसत्था ।
 एमेव इत्थीनिलयस्स मज्झे न बम्भयारिस्स खमो निवासो ॥ १३ ॥
 न रूवलावण्णविलासहासं न जंपियं इंगियपोहियं वा ।
 इत्थीण चित्तंसि निवेसइत्ता द्दुं ववस्से समणे तवस्सी ॥ १४ ॥
 अदंसणं चेव अपत्थणं च अचिन्तणं चेव अकित्तणं च ।
 इत्थीजणस्सारियझाणजुग्गं हियं सया बम्भवए रयाणं ॥ १५ ॥
 कामं तु देवीहि विभूसियाहिं न चाइया खोभइउं तिगुत्ता ।
 तहा वि एगन्तहियं ति नच्चा विवित्तवासो मुणिणं पसत्थो ॥ १६ ॥
 मोक्खाभिकंखिस्स उ माणवस्स संसारमीरस्स ठियस्स धम्मे ।
 नेयारिसं दुत्तरमात्थि लोए जहित्थिओ बालमणोहराओ ॥ १७ ॥

एए य संगे समइकामित्ता सुदुत्तरा चेव भवन्ति सेसा ।
 जहा महासागरमुत्तरित्ता नई भवे आवि गंगासमाणा ॥ १८ ॥
 कामाणुगिद्धिप्पभवं खु दुक्खं सव्वस्स लोगस्स सदेवगस्स ।
 जं काइयं माणसियं च किंचि तस्सऽन्तगं गच्छइ वीयरारो ॥ १९ ॥
 जहा य किंपागफला मणोरमा रसेण वण्णेण य भुज्जमाणा ।
 ते खुट्टुए जीविय पच्चमाणा एओवमा कामगुणा विवागे ॥ २० ॥
 जे इन्द्रियाणं विसया मणुज्जा न तेसु भावं निसिरे कयाइ ।
 न याऽमणुज्जेसु मणं पि कुज्जा समाहिकामे समणे तवस्सी ॥ २१ ॥
 चक्खुस्स रुवं गहणं वयन्ति तं रागहेउं तु मणुज्जमाहु ।
 तं दोसहेउं अमणुज्जमाहु समो य जो तेसु स वीयरारो ॥ २२ ॥
 रुवस्स चक्खुं गहणं वयन्ति चक्खुस्स रुवं गहणं वयन्ति ।
 रामस्स हेउं समणुज्जमाहु दोसस्स हेउं अमणुज्जमाहु ॥ २३ ॥
 रुवेसु जो गिद्धिमुवेइ तिव्वं अकालियं पावइ से विणासं ।
 रागाउरे से जह वा पयंगे आलोयलोले समुवेइ मच्चुं ॥ २४ ॥
 जे यावि दोसं समुवेइ तिव्वं तंसि क्खणे से उ उवेइ दुक्खं ।
 दुद्धन्तदोसेण सएण जन्तू न किंचि रुवं अवरुज्झई से ॥ २५ ॥
 पगन्तरत्ते रुइरंसि रुवे अतालिसे से कुणई पओसं ।
 दुक्खस्स संपीलमुवेइ बाले न लिप्पई तेण मुणी विरामे ॥ २६ ॥
 रुवाणुगासाणुगए य जीवे चराचरे हिंसइ जेगरुवे ।
 चित्तेहिं ते परितावेइ बाले पीलेइ अत्तट्टगुरू किलिट्टे ॥ २७ ॥
 रुवाणुवाएण परिग्गहेण उप्पायणे रक्खणसन्धिओगे ।
 वए विओगे य कहं सुहं से संभोगकाले य अतित्तिलाभे ॥ २८ ॥
 रुवे अतिसे य परिग्गहंमि सत्तोवसत्तो न उवेइ तुट्ठिं ।
 अत्तुट्ठिदोसेण दुही परस्स लोभाविले आययई अक्कं ॥ २९ ॥
 तण्हाभिभूयस्स अक्कहारिणो रुवे अतित्तस्स परिग्गहे य ।
 मायामुसं बड्डइ लोभदोसा तत्थाऽवि दुक्खा न विमुच्चई से ॥ ३० ॥
 मोसस्स पच्छा य पुरत्थओ य पओगकालि य दुही दुरन्ते ।
 एवं अक्काणि समाययन्तो रुवे अतित्तो दुहिओ अणिस्सो ॥ ३१ ॥
 रुवाणुरत्तस्स नरस्स एवं कत्तो सुहं होज्ज कयाइ किंचि ।
 तत्थोवमोगे वि किलेसदुक्खं निव्वत्तई जस्स कएण दुक्खं ॥ ३२ ॥

एमेव रुवम्मि गओ पओसं उवेइ दुक्खोहपरंपराओ ।
 पट्टुचित्तो य चिणाइ कम्मं जं से पुणो होइ इहं विवाने ॥ ३३ ॥
 रुवे विरत्तो मणुओ विसोमो एएण दुक्खोहपरंपरेण ।
 न लिप्पए भवमज्जे वि सन्तो जलेण वा पोक्खरिणीपलासं ॥ ३४ ॥
 सोयस्स सइं महणं वयन्ति तं रागहेउं तु मणुक्कमाहु ।
 तं दोसहेउं अमणुक्कमाहु समो य ओ तेसु स वीयरामो ॥ ३५ ॥
 सइस्स सोयं महणं वयन्ति सोवस्स सइं महणं वयन्ति ।
 रागस्स हेउं समणुक्कमाहु दोसस्स हेउं अमणुक्कमाहु ॥ ३६ ॥
 सइसु जो मिद्धिमुवेइ तिव्वं अकालियं पावइ से विणासं ।
 रागाउरे हरिणमिगे व मुद्धे सइे अतित्ते समुवेइ मच्चुं ॥ ३७ ॥
 जे यावि दोसं समुवेइ तिव्वं तंसि कत्तणे से उ उवेइ दुक्खं ।
 दुइन्तदोसेण सएण जन्तु न किंचि सइं अबक्कज्जई से ॥ ३८ ॥
 एगन्तरत्ते रुहरंसि सइे अताळिसे से कुणई पओसं ।
 दुक्खस्स संपीलमुवेइ ङाले न लिप्पई तेण मुणी विरामो ॥ ३९ ॥
 सद्धानुमासाणुगए य जीवे चराचरे हिंसइ जेयकवे ।
 चित्तोई ते परियावेइ ङाले पीळेइ अत्तट्टमुक्क किळिट्टे ॥ ४० ॥
 सद्धानुवाएण परिग्गहेण उप्पायणे रक्खणसन्निओमे ।
 वए विओगे य कहं सुहं से संभोगकाले य अतित्तिलामे ॥ ४१ ॥
 सइे अतित्ते य परिग्गहंमि सत्तोयसत्तो न उवेइ तुट्ठि ।
 अत्तुट्ठिदोसेण इही परस्स लोमाविले आययई अदत्तं ॥ ४२ ॥
 तण्हाभिभूयस्स अक्कहारिणो सइे अतित्तस्स परिग्गहे य ।
 मायामुसं वड्डइ लोभदोसा तत्थावि दुक्खा न विमुच्चई से ॥ ४३ ॥
 मोसस्स पच्छा य पुरत्थओ य पओगकाले य इही दुरन्ते ।
 एवं अदत्ताणि समाययन्तो सइे अतित्तो इहिओ अणिस्सो ॥ ४४ ॥
 सद्धानुरत्तस्स नरस्स पवं कत्तो सुहं होज्ज कयाइ किंचि ।
 तत्थोवभोगे वि किलेसदुक्खं निव्वत्तई जस्स कएण दुक्खं ॥ ४५ ॥
 एमेव सइम्मि गओ पओसं उवेइ दुक्खोहपरंपराओ ।
 पट्टुचित्तो य चिणाइ कम्मं जं से पुणो होइ इहं विवाने ॥ ४६ ॥
 सइे विरत्तो मणुओ विसोगो एएण दुक्खोहपरंपरेण ।
 न लिप्पए भवमज्जे वि सन्तो जलेण वा पोक्खरिणीपलासं ॥ ४७ ॥

घाणस्स गन्धं गहणं वयन्ति तं रागहेउं तु मणुजमाहु ।
 तं दोसहेउं अमणुजमाहु समो य जो तेसु स वीयरारो ॥ ४८ ॥
 गन्धस्स घाणं गहणं वयन्ति घाणस्स गन्धं गहणं वयन्ति ।
 रागस्स हेउं समणुजमाहु दोसस्स हेउं अमणुजमाहु ॥ ४९ ॥
 गन्धेसु जो गिद्धिमुवेइ तिव्वं अकालियं पावइ से विणासं ।
 रागाउरे ओसइगन्धगिद्धे सप्पे बिलाओ विव निक्खमन्ते ॥ ५० ॥
 जे यावि दोसं समुवेइ तिव्वं तंसि कखणे से उ उवेइ दुक्खं ।
 इइन्दोसेण सएण जन्तू न किंचि गन्धं अवरुज्झई से ॥ ५१ ॥
 एमन्तरत्ते रुइरंसि गन्धे अतालिसे से कुणई पओसं ।
 दुक्खस्स संपीलमुवेइ बाले न लिप्पई तेण मुणी विरागो ॥ ५२ ॥
 गन्धाणुगासाणुगए य जीवे चराचरे हिंसइ जेगरूवे ।
 चित्तेहिं ते परितावेइ बाले पीलेइ अत्तइगुरू किलिट्ठे ॥ ५३ ॥
 गन्धाणुवाएण परिगहेण उप्पायणे रक्खणसस्सिओगे ।
 वए विओगे य कहं सुहं से संभोगकाले य अतित्तिलाभे ॥ ५४ ॥
 गन्धे अतित्ते य परिभहमि सत्तोवसत्तो न उवेइ तुट्ठिं ।
 अतुट्ठिदोसेण इही परस्स लोभाविले आययई अदत्तं ॥ ५५ ॥
 तण्हामिभूयस्स अदत्तहारिणो गन्धे अतित्तस्स परिगहे य ।
 मासामुयं वड्डइ लोभदोसा तत्थावि दुक्खा न विमुच्चई से ॥ ५६ ॥
 भोसस्स पच्छा य पुरत्थओ य पओगकाले व इही दुरन्ते ।
 एवं अदत्ताणि समाययन्तो गन्धे अतित्तो इहिओ अणिस्सो ॥ ५७ ॥
 गन्धाणुरत्तस्स नरस्स एवं कत्तो सुहं होज्ज कयाइ किंचि ।
 तत्थोबभोगे वि किलेसदुक्खं निव्वत्तई जस्स कएण दुक्खं ॥ ५८ ॥
 एमेव गन्धम्मि गओ पओसं उवेइ दुक्खोहपरंपराओ ।
 पइट्ठुचित्तो य चिणाइ कम्मं जं से पुणो होइ इहं विवागे ॥ ५९ ॥
 गन्धे विरत्तो मणुओ विसोगो एएण दुक्खोहपरंपरेण ।
 न लिप्पई भवमज्जे वि सन्तो जलेण वा पोक्खरिणीपलासं ॥ ६० ॥
 जिह्माए रसं गहणं वयन्ति तं रागहेउं तु मणुजमाहु ।
 तं दोसहेउं अमणुजमाहु समो य जो तेसु स वीयरारो ॥ ६१ ॥
 रसस्स जिह्मं गहणं वयन्ति जिह्माए रसं गहणं वयन्ति ।
 रागस्स हेउं समणुजमाहु दोसस्स हेउं अमणुजमाहु ॥ ६२ ॥

रसेसु जो गेहिमुवेइ तिव्वं अकालियं पावइ से विणासं ।
 रागाउरे बडिसविभक्काए मच्छे जहा आमिसभोगगिद्धे ॥ ६३ ॥
 जे यावि दोसं समुवेइ तिव्वं तंसि कखणे से उ उवेइ दुक्खं ।
 दुइन्तदोसेण सएण जन्तू रसं न किंचि अवकज्झई से ॥ ६४ ॥
 एगन्तरत्ते रुइरे रसम्मि अतालसे से कुणई पओसं ।
 दुक्खस्स संपीलमुवेइ बाले न लिप्पई तेण मुणी विरागो ॥ ६५ ॥
 रसाणुगासाणुगए य जीवे चराचरे हिंसइ जेगरूवे ।
 चित्तोहिं ते परितावेइ बाले पीलेइ अत्तट्टगुरु किलिट्टे ॥ ६६ ॥
 रसाणुवाएण परिग्गहेण उप्पायणे रक्खणसन्निओगे ।
 वए विओगे यं कहं सुहं से संभोगकाले य अतित्तिलामे ॥ ६७ ॥
 रसे अतित्ते य परिग्गहंमि सत्तोवसत्तो न उवेइ तुट्ठिं ।
 अत्तट्ठिदोसेण दुही परस्स लोभाविले आययई अवत्तं ॥ ६८ ॥
 तण्हाभिभूयस्स अदत्तहारिणो रसे अतित्तस्स परिग्गहे य ।
 मायामुसं बड्डइ लोभदोसा तत्थावि दुक्खा न विमुच्चई से ॥ ६९ ॥
 मोसस्स पच्छा य पुरत्थओ य पओमकाले य दुही दुरन्ते ।
 एवं अक्खाणि समाययन्तो रसे अतित्तो इहिओ अणिस्सो ॥ ७० ॥
 रसाणुरत्तस्स नरस्स एवं कत्तो सुहं होज्ज कयाइ किंचि ।
 तत्थोवभोगे वि किलेसदुक्खं निव्वत्तई जस्स कएण दुक्खं ॥ ७१ ॥
 एमेव रसम्मि गओ पओसं उवेइ दुक्खोहपरंपराओ ।
 पट्टुच्चित्तो य चिणाइ कम्मं जं से पुणो होइ दुहं विवामे ॥ ७२ ॥
 रसे विरत्तो मणुओ विसोगो एएण दुक्खोहपरंपरेण ।
 न लिप्पई भवमज्झे वि सन्तो जलेण वा पोक्खरिणीपलासं ॥ ७३ ॥
 कायस्स फासं गहणं वयन्ति तं रामहेउं तु मणुञ्चमाहु ।
 तं दोसहेउं अमणुञ्चमाहु समो य जो तेसु स वीयरगो ॥ ७४ ॥
 फासस्स कायं गहणं वयन्ति कायस्स फासं गहणं वयन्ति ।
 रागस्स हेउं समणुञ्चमाहु दोसस्स हेउं अमणुञ्चमाहु ॥ ७५ ॥
 फासेसु जो गिद्धिमुवेइ तिव्वं अकालियं पावइ से विणासं ।
 रागाउरे सीयजलावसन्ने गाहग्गहीए महिसे विवन्ने ॥ ७६ ॥
 जे यावि दोसं समुवेइ तिव्वं तंसि कखणे से उ उवेइ दुक्खं ।
 दुइन्तदोसेण सएण जन्तू न किंचि फासं अवकज्झई से ॥ ७७ ॥

एगन्तरत्ते रुइरंसि फासे अतालसे से कुणई पओसं ।
 दुक्खस्स संपीलमुवेइ बाले न लिप्पई तेण मुणी विरागो ॥ ७८ ॥
 फासाणुगासाणुगए य जीवे चराचरे हिंसइ जेगरूवे ।
 चित्तेहिं ते परितावेइ बाले पीलेइ अत्तट्टगुरू किलिट्ठे ॥ ७९ ॥
 फासाणुवाएण परिग्गहेण उप्पायणे रक्खणसन्निओमे ।
 वए विओगे य कहं सुहं से संभोगकाले य अतित्तिलामे ॥ ८० ॥
 फासे अतित्ते य परिग्गहंमि सत्तोवसत्तो न उवेइ तुट्ठिं ।
 अतुट्ठिदोसेण दुही परस्स लोभाविले आययई अदत्तं ॥ ८१ ॥
 तण्हाभिभूयस्य अदत्तहारिणो फासे अतित्तस्स परिग्गहे य ।
 मायामुसं वड्ढइ लोभदोसा तत्थावि दुक्खा न विमुच्चई से ॥ ८२ ॥
 मोसस्स पच्छा य पुरत्थओ य पओगकाले य दुही दुरन्ते ।
 एवं अदत्ताणि समाययन्तो फासे अतित्तो दुहिओ अणिस्सो ॥ ८३ ॥
 फासाणुरत्तस्स नरस्स एवं कत्तो सुहं होज्ज कयाइ किंचि ।
 तत्थोवभोगे वि किलेसदुक्खं निव्वत्तई जस्स कएण दुक्खं ॥ ८४ ॥
 एमेव फासम्मि गओ पओसं उवेइ दुक्खोहपरंपराओ ।
 पदुद्गुचित्तो य चिणाइ कम्मं जं से पुणो होइ दुहं विवागे ॥ ८५ ॥
 फासे विरत्तो मणुओ विसोगो पएण दुक्खोहपरंपरेण ।
 न लिप्पई भवमज्झे वि सन्तो जलेण वा पोक्खरिणीपलासं ॥ ८६ ॥
 मणस्स भावं गहणं वयन्ति तं रागहेउं तु मणुज्जमाहु ।
 तं दोसहेउं अमणुज्जमाहु समो य जो तेसु स वीयरगो ॥ ८७ ॥
 भावस्स मणं गहणं वयन्ति मणस्स भावं गहणं वयन्ति ।
 रागस्स हेउं समणुज्जमाहु दोसस्स हेउं अमणुज्जमाहु ॥ ८८ ॥
 भावेसु जो गिद्धिमुवेइ तिव्वं अकालियं पावइ से विणासं ।
 रागाउरे कामगुणेसु गिद्धे करेणुमगावहिणं गए वा ॥ ८९ ॥
 जे यावि दोसं समुवेइ तिव्वं तंसि क्खणे से उ उवेइ दुक्खं ।
 दुइन्तदोसेण सएण जन्तू न किंचि भावं अवरुज्झई से ॥ ९० ॥
 एगन्तरत्ते रुइरंसि भावे अतालसे से कुणई पओसं ।
 दुक्खस्स संपीलमुवेइ बाले न लिप्पई तेण मुणी विरागो ॥ ९१ ॥
 भावाणुगासाणुगए य जीवे चराचरे हिंसइ जेगरूवे ।
 चित्तेहिं ते परितावेइ बाले पीलेइ अत्तट्टगुरू किलिट्ठे ॥ ९२ ॥

भावाणुवाएण परिग्गहेण उप्पायणे रक्खणसन्निओगे ।
 वए विओगे य कहं सुहं से संभोगकाले य अतित्तिलाभे ॥ ९३ ॥
 भावे अतित्ते य परिग्गहंमि सत्तोवसत्तो न उवेइ तुट्ठिं ।
 अतुट्ठिवोसेण दुही परस्स लोभाविले आययई अवत्तं ॥ ९४ ॥
 तण्हाभिभूयस्स अवत्तहारिणो भावे अतित्तस्स परिग्गहे य ।
 मायासुसं वट्ठइ लोभदोसा तत्थावि दुक्खा न विमुच्चई से ॥ ९५ ॥
 मोसस्स पच्छां य पुरत्थओ य पओगकाले य दुही दुरन्ते ।
 एवं अवत्ताणि समाययन्तो भावे अतित्तो दुहिओ अणिस्सो ॥ ९६ ॥
 भावाणुरत्तस्स नरस्स एवं कत्तो सुहं होज्ज कयाइ किंचि ।
 तत्थोवभोगे वि किलेसदुक्खं निव्वत्तई जस्स कएण दुक्खं ॥ ९७ ॥
 एमेव भावम्मि गओ पओसं उवेइ दुक्खोहपरंपराओ ।
 पदुट्ठचित्तो य चिणाइ कम्मं जं से पुणो. होइ दुहं विवामे ॥ ९८ ॥
 भावे विरत्तो मणुओ विसोमो एएण दुक्खोहपरंपरेण ।
 न लिप्पई भवमज्जे वि सन्तो जलेण वा पोक्खरिणीपलासं ॥ ९९ ॥
 एविन्दियत्था य मणस्स अत्था दुक्खस्स हेउं मणुयस्स रागिणो ।
 ते चेव थोवं पि कयाइ दुक्खं न धीयरामस्स कुरेन्ति किंचि ॥ १०० ॥
 न कामभोगा समयं उवेन्ति न यावि भोगा विगइं उवेन्ति ।
 जे तप्पओसी य परिग्गही य सो तेसु मोहा विगइं उवेइ ॥ १०१ ॥
 कोहं च माणं च तहेव मायं लोहं दुगुंछं अरइं रइं च ।
 हासं मयं सोगपुमित्थिवेयं नपुंसवेयं विविहे य भावे ॥ १०२ ॥
 आवज्जई एवमणेगरूवे पवंविहे कामगुणेसु सत्तो ।
 अस्से य एयप्पभवे विसेसे कारुणदीणे हिरिमे वइस्से ॥ १०३ ॥
 कप्पं न इच्छिज्ज सहायलिच्छू पच्छाणुतावेण तवप्पभावं ।
 एवं वियारे अभियप्पयारे आवज्जई इन्दियचोरवस्से ॥ १०४ ॥
 तओ से जायन्ति पओयणाई निमज्जिउं मोहमहण्णवम्मि ।
 सुहेसिणो दुक्खविणोयणट्ठा तप्पच्चयं उज्जमए य रागी ॥ १०५ ॥
 विरज्जमाणस्स य इन्दियत्था सहाइया तावइयप्पगारा ।
 न तस्स सग्गे वि मणुन्नयं वा निव्वत्तयन्ती अमणुन्नयं वा ॥ १०६ ॥
 एवं ससंकप्पविकप्पणासुं संजायई समयमुवट्ठियस्स ।
 अत्थे असंकप्पयओ तओ से पहीयए कामगुणेसु तण्हा ॥ १०७ ॥

स वीयरगो कयसद्वकिच्चो खवेइ नाणावरणं खणेणं ।
 तहेव जं दंसणमावरेइ जं चउन्तरायं पकरेइ कम्मं ॥ १०८ ॥
 सद्वं तओ जाणइ पासए य अमोहणे होइ निरन्तराए ।
 अणासवे ज्ञाणसमाहिजुत्ते आउक्खए मोक्खमुवेइ सुद्धे ॥ १०९ ॥
 सो तस्स सव्वस्स दुहस्स मुक्को जं बाहई सययं जन्तुमेयं ।
 दीहामयं विप्पमुक्को पसत्थो तो होइ अच्चन्तसुही कयत्थो ॥ ११० ॥
 अणाइकालप्पभवस्स एसो सव्वस्स दुक्खस्स पमोक्खमग्गो ।
 वियाहिओ जं समुविच्च सत्ता कमेण अच्चन्तसुही भवन्ति ॥ १११ ॥
 त्ति बोमि ॥

॥ पमायट्ठाणं समत्तं ॥ ३२ ॥

॥ कम्मपयडी त्रयस्त्रिंशं अध्ययनम् ॥

अट्ट कम्माइं वोच्छामि आणुपूर्विं जहक्कमं ।
 जोहं बद्धो अयं जीवो संसारि-परिवट्ठई ॥ १ ॥
 नाणस्सावरणिज्जं दंसणावरणं तथा ।
 वेयणिज्जं तथा मोहं आउकम्मं तहेव य ॥ २ ॥
 नामकम्मं च गोयं च अन्तरायं तहेव य ।
 एवमेयाइं कम्माइं अट्टेव उ समासओ ॥ ३ ॥
 नाणावरणं पंचविहं सुयं आभिणिबोद्धियं ।
 ओहिनाणं च तइयं मणनाणं च केवलं ॥ ४ ॥
 निद्दा तहेव पयला निद्धानिद्दा पयलपयला य ।
 तत्तो य थीणगिद्धी उ पंचमा होइ नायव्वा ॥ ५ ॥
 चक्खुमचक्खुओहिस्स दंसणे केवले य आवरणे ।
 एवं तु नवविगप्पं नायव्वं दंसणावरणं ॥ ६ ॥
 वेयणीयं पि य दुविहं सायमसायं च आहियं ।
 सायस्स उ वट्ठ भेया एमेव असायस्स वि ॥ ७ ॥
 मोहणिज्जं पि दुविहं दंसणे चरणे तथा ।
 दंसणे तिविहं वुत्तं चरणे दुविहं भवे ॥ ८ ॥

सम्मत्तं चैव मिच्छत्तं सम्मामिच्छत्तमेव य ।
 पयाओ तिक्खि पयडीओ मोहणिज्जस्स वंसणे ॥ १ ॥
 चरित्तमोहणं कम्मं इविहं तु वियाहियं ।
 कसायमोहणिज्जं तु नोकसायं तहेव य ॥ १० ॥
 सोलसविहमेपणं कम्मं तु कसायजं ।
 सत्तविहं नवविहं वा कम्मं च नोकसायजं ॥ ११ ॥
 नेरइयतिरिक्खत्ताउं मणुस्साउं तहेव य ।
 वेवाउयं चउत्थं तु आउकम्मं चउत्विहं ॥ १२ ॥
 नामं कम्मं तु इविहं सुहमसुहं च आहियं ।
 सुहस्स उ बहू भेया एमेव असुहस्स वि ॥ १३ ॥
 मोयं कम्मं इविहं उच्चं नीयं च आहियं ।
 उच्चं अट्ठविहं होइ पवं नीयं पि आहियं ॥ १४ ॥
 दाणे लामे य भोमे य उवभोगे वीरिप तहा ।
 पंचविहमन्तरायं समासेण वियाहियं ॥ १५ ॥
 पयाओ मूलपयडीओ उत्तराओ य आहिवा ।
 पएसग्गं सेत्तकाळे य भावं चाउत्तरं सुण ॥ १६ ॥
 सव्वेसिं चैव कम्माणं पएसग्गमणन्तमं ।
 गण्ठियसत्ताइयं अन्तो सिद्धाण आहियं ॥ १७ ॥
 सव्वजीवाण कम्मं तु संगहे छद्दिसागयं ।
 सव्वेसु वि पएससु सव्वं सव्वेण बद्धमं ॥ १८ ॥
 उवहीसरिसनामाण तीसई कोडिकोडिओ ।
 उक्कोसिवा ठिई होइ अन्तोमुहुत्तं जहन्निया ॥ १९ ॥
 आवरणिज्जाण दुण्हं पि वेयणिज्जे तहेव य ।
 अन्तराप य कम्मम्मि ठिई एसा वियाहिया ॥ २० ॥
 उवहीसरिसनामाणं सत्तरिं कोडिकोडिओ ।
 मोहणिज्जस्स उक्कोसा अन्तोमुहुत्तं जहन्निया ॥ २१ ॥
 तेत्तीस सागरोवमा उक्कोसेण वियाहिया ।
 ठिई उ आउकम्मस्स अन्तोमुहुत्तं जहन्निया ॥ २२ ॥
 उवहीसरिसनामाणं वीसई कोडिकोडिओ ।
 नामगोत्ताणं उक्कोसा अट्ठ मुहुत्ता जहन्निया ॥ २३ ॥

सिद्धाणऽणन्तभागो य अणुभागा हवन्ति उ ।
 सव्वेसु वि पपसग्गं सव्वजीवे सऽइच्छियं ॥ २४ ॥
 तम्हा एणसि कम्मार्णं अणुभागे वियाणिया ।
 एणसि संवरे चेव खवणे य जए बुहे ॥ २५ ॥ सि बेमि ॥

॥ कम्मपयडी समत्ता ॥ ३३ ॥

॥ लेसज्झयणं चतुस्त्रिंशं अध्ययनम् ॥

लेसज्झयणं पवक्खामि आणुपूर्वि जहकमं ।
 छण्हं पि कम्मलेसाणं अणुभावे सुणेह मे ॥ १ ॥
 नामाहं वण्णरसगन्धकासपरिणामलक्खणं ।
 ठाणं ठिहं गहं चाउं लेसाणं तु सुणेह मे ॥ २ ॥
 किण्हा नीला य काऊ य तेऊ पम्हा तहेव य ।
 सुक्कलेसा य छट्ठा य नामाहं तु जहकमं ॥ ३ ॥
 जीमूयनिद्धसंकासा गवलरिट्ठगसन्निभा ।
 खंजणनयणनिभा किण्हलेसा उ वण्णओ ॥ ४ ॥
 नीलाऽसोगसंकासा चासपिच्छसमप्पमा ॥
 बेरलियनिद्धसंकासा नीललेसा उ वण्णओ ॥ ५ ॥
 अयसीपुप्फसंकासा कोइलच्छदसन्निभा ।
 पारेवयगीवनिभा काऊलेसा उ वण्णओ ॥ ६ ॥
 हिंशुलधाउसंकासा तरुणाइच्चसन्निभा ।
 सुयतुण्डपईवनिभा तेऊलेसा उ वण्णओ ॥ ७ ॥
 हरियालभेयसंकासा हलिद्दाभेयसंनिभा ।
 सणासणकुसुमनिभा पम्हलेसा उ वण्णओ ॥ ८ ॥
 संखंककुन्वसंकासा खीरपूरसमप्पमा ।
 रययहारसंकासा सुक्कलेसा उ वण्णओ ॥ ९ ॥
 जह कडुयतुम्बगरसो निम्बरसो कडुयरोहिणिरसो वा ।
 यत्तो वि अणन्तगुणो रसो य किण्हाए नायव्वो ॥ १० ॥

जह तिकडुयस्स य रसो तिव्वो जह हत्थिपिप्पलीए वा ।

एत्तो वि अणन्तगुणो रसो उ नीलाए नायव्वो ॥ ११ ॥

जह तरुणअम्बगरसो तुवरकविट्ठस्स वावि जारिसओ ।

एत्तो वि अणन्तगुणो रसो उ काऊए नायव्वो ॥ १२ ॥

जहपरिणयम्बगरसो पक्ककविट्ठस्स वावि जारिसओ ।

एत्तो वि अणन्तगुणो रसो उ तेऊए नायव्वो ॥ १३ ॥

वरवारुणीए व रसो विविहाण व आसवाण जारिसओ ।

महुमेरयस्स व रसो एत्तो पम्हाए परएणं ॥ १४ ॥

खज्जुरमुद्दियरसो खीररसो खण्डसक्कररसो वा ।

एत्तो वि अणन्तगुणो रसो उ सुक्काए नायव्वो ॥ १५ ॥

जह गोमडस्स गन्धो सुणगमडस्स व जहा अहिमडस्स ।

एत्तो वि अणन्तगुणो लेसाणं अप्पसत्थाणं ॥ १६ ॥

जह सुरहिकुसुमगन्धो गन्धवासाण पिस्समाणाणं ।

एत्तो वि अणन्तगुणो पसत्थलेसाणं तिण्हं पि ॥ १७ ॥

जह करगयस्स फासो गोजिब्भाए व सागपत्ताणं ।

एत्तो वि अणन्तगुणो लेसाणं अप्पसत्थाणं ॥ १८ ॥

जह बूरस्स व फासो नवणीयस्स व सिरीसकुसुमाणं ।

एत्तो वि अणन्तगुणो पसत्थलेसाणं तिण्हं पि ॥ १९ ॥

तिविहो व नवविहो वा सत्तावीसइविहंक्कसीओ वा ।

दुसओ तेयालो वा लेसाणं होइ परिणामो ॥ २० ॥

पंचासवप्पवत्तो तीहिं अगुत्तो छुसुं अविरओ य ।

तिव्वारम्भपरिणओ खुड्डो साहसिओ नरो ॥ २१ ॥

निद्धन्धसपरिणामो निस्संसो अजिइन्दिओ ।

एयजोगसमाउत्तो किण्हलेसं तु परिणमे ॥ २२ ॥

इस्साअमरिसअतवो अविज्जमाया अहीरिया य ।

गेही पओसे य सढे पमत्ते रसलोलुए ॥ २३ ॥

आरम्भाओ अविरओ खुड्डो साहसिओ नरो ।

एयजोगसमाउत्तो नीललेसं तु परिणमे ॥ २४ ॥

वंके वंकसमायारे नियडिल्ले अणुज्जुए ।

पालिउंचग ओवहिए मिच्छदिट्ठी अणारिए ॥ २५ ॥

उप्फालगद्धुवाई य तेजे यावि य मच्छरी ।
 पयजोगसमाउत्तो काउलेसं तु परिणमे ॥ २६ ॥
 नीयावित्ती अचवले अमाई अकुऊहले ।
 विणीयाविणए दन्ते जोगवं उवहाणवं ॥ २७ ॥
 पियधम्मे वढधम्मे वज्जभीरु हिएसए ।
 पयजोगसमाउत्तो तेउलेसं तु परिणमे ॥ २८ ॥
 पयणुक्कोहमाणे य मायालोभे य पयणुए ।
 पसन्ताचित्ते दन्तप्पा जोगवं उवहाणवं ॥ २९ ॥
 तहा पयणुवाई य उवसन्ते जिहन्दिए ।
 पयजोगसमाउत्तो पम्हलेसं तु परिणमे ॥ ३० ॥
 अट्ठरुद्धाणि वज्जित्ता धम्मसुक्काणि शायए ।
 पसन्ताचित्ते दन्तप्पा समिए गुत्ते य गुत्तिट्ठु ॥ ३१ ॥
 सरागे वीयरगे वा उवसन्ते जिहन्दिए ।
 पयजोगसमाउत्तो सुक्कलेसं तु परिणमे ॥ ३२ ॥
 असंखिज्जाणोसप्पिणीण उस्सप्पिणीण जे समया ।
 संस्वाईया लोगा लेसाण हवन्ति ठाणाई ॥ ३३ ॥
 मुहुत्तद्धं तु जहन्ना तेत्तीसा सागरा मुहुत्ताहिया ।
 उक्कोसा होइ ठिई नायव्वा किण्हलेसाए ॥ ३४ ॥
 मुहुत्तद्धं तु जहन्ना दस उदही पलियमसंखभागमब्भाहिया ।
 उक्कोसा होइ ठिई नायव्वा नीललेसाए ॥ ३५ ॥
 मुहुत्तद्धं तु जहन्ना तिण्णुवही पलियमसंखभागमब्भाहिया ।
 उक्कोसा होइ ठिई नायव्वा काउलेसाए ॥ ३६ ॥
 मुहुत्तद्धं तु जहन्ना दोण्णुवही पलियमसंखभागमब्भाहिया ।
 उक्कोसा होइ ठिई नायव्वा तेउलेसाए ॥ ३७ ॥
 मुहुत्तद्धं तु जहन्ना दस होन्ति य सागरा मुहुत्ताहिया ।
 उक्कोसा होइ ठिई नायव्वा पम्हलेसाए ॥ ३८ ॥
 मुहुत्तद्धं तु जहन्ना तेत्तीसं सागरा मुहुत्ताहिया !
 उक्कोसा होइ ठिई नायव्वा सुक्कलेसाए ॥ ३९ ॥
 एसा खलु लेसाणं ओहिण ठिई उ वणििया होइ ।
 चउसु वि गईसु एत्तो लेसाण ठिई तु वोच्छामि ॥ ४० ॥

दस वाससहस्ताईं काऊए ठिई जहन्निया होइ ।
 तिण्णुदही पलियमसंखभागं च उक्कोसा ॥ ४१ ॥
 तिण्णुदही पलियवमसंखभागो जहन्न नीलठिई ।
 दस उदही पलिओवममसंखभागं च उक्कोसा ॥ ४२ ॥
 दस उदही पलिओवममसंखभागं जहन्निया होइ ।
 तेत्तीससागराईं उक्कोसा होइ किण्हाए ॥ ४३ ॥
 एसा नेरइयाणं लेसाण ठिई उ वणिण्या होइ ।
 तेण परं वोच्छामि तिरियमणुस्साण देवाणं ॥ ४४ ॥
 अन्तोमुहुत्तमद्धं लेसाण ठिई जहिं जहिं जा उ ।
 तिरियाण नराणं वा वज्जित्ता केवलं लेसं ॥ ४५ ॥
 मुहुत्तद्धं तु जहन्ना उक्कोसा होइ पुव्वकोडी उ ।
 नवहि वरिसोहिं ऊणा नायव्वा सुक्कलेसाए ॥ ४६ ॥
 एसा तिरियनराणं लेसाण ठिई उ वणिण्या होइ ।
 तेण परं वोच्छामि लेसाण ठिई उ देवाणं ॥ ४७ ॥
 दस वाससहस्ताईं किण्हाए ठिई जहन्निया होइ ।
 पलियमसंखिज्जइमो उक्कोसा होइ किण्हाए ॥ ४८ ॥
 जा किण्हाए ठिई खलु उक्कोसा सा उ समयमव्वहिया ।
 जहन्नेणं नीलाए पलियमसंखं च उक्कोसा ॥ ४९ ॥
 जा नीलाए ठिई खलु उक्कोसा सा उ समयमव्वहिया ।
 जहन्नेणं काऊए पलियमसंखं च उक्कोसा ॥ ५० ॥
 तेण परं वोच्छामि तेऊलेसा जहा सुरगणाणं ।
 भवणवइ-वाणमन्तर-जोइस-वेमाणियाणं च ॥ ५१ ॥
 पलिओवमं जहन्ना उक्कोसा सागरा उ दुण्हइहिया ।
 पलियमसंखेज्जेणं होइ सभागेण तेऊए ॥ ५२ ॥
 दस वाससहस्ताईं तेऊए ठिई जहन्निया होइ ।
 दुण्णुदही पलिओवमअसंखभागं च उक्कोसा ॥ ५३ ॥
 जा तेऊए ठिई खलु उक्कोसा सा उ समयमव्वहिया ।
 जहन्नेणं पम्हाए दस मुहुत्ताइहियाईं उक्कोसा ॥ ५४ ॥
 जा पम्हाए ठिई खलु उक्कोसा सा उ समयमव्वहिया ।
 जहन्नेणं सुक्काए तेत्तीसमुहुत्तमव्वहिया ॥ ५५ ॥

किण्हा नीला काऊ तिस्सि वि एयाओ अहम्मलेसाओ ।
 एयाहि तिहि वि जीवो दुग्गई उववज्जई ॥ ५६ ॥
 तेऊ पम्हा सुक्का तिस्सि वि एयाओ धम्मलेसाओ ।
 एयाहि तिहि वि जीवो सुग्गई उववज्जई ॥ ५७ ॥
 लेसाहिं सव्वाहिं पढमे समयम्मि परिणयाहिं तु ।
 न हु कस्सइ उववाओ परे भवे अत्थि जीवस्स ॥ ५८ ॥
 लेसाहिं सव्वाहिं चरिमे समयम्मि परिणयाहिं तु ।
 न हु कस्सइ उववाओ परे भवे अत्थि जीवस्स ॥ ५९ ॥
 अन्तमुहुत्तम्मि गए अन्तमुहुत्तम्मि सेसए चव ।
 लेसाहिं परिणयाहिं जीवा गच्छन्ति परलोयं ॥ ६० ॥
 तम्हा एयासि लेसाणं अणुभावं वियाणिया ।
 अप्पसत्थाओ वज्जित्ता पसत्थाओऽहिट्ठिए मुणि ॥ ६१ ॥
 ॥ ति बेमि ॥

॥ लेसज्झयणं समत्तं ॥ ३४ ॥

॥ अणगारज्झयणं पञ्चत्रिंशं अध्ययनम् ॥

सुणेह मे एगमणा मगं बुद्धेहिं वेसियं ।
 जमायरन्तो भिक्खु दुक्खवाणन्तकरे भवे ॥ १ ॥
 गिहवासं परिच्चज्ज पवज्जामस्सिए मुणी ।
 इमे संगे वियाणिज्जा जेहिं सज्जन्ति माणवा ॥ २ ॥
 तहेव हिंसं अलियं चोज्जं अब्भसेवणं ।
 इच्छाकामं च लोभं च संजओ परिवज्जए ॥ ३ ॥
 मणोहरं चित्तघरं मल्लघूवेण वासियं ।
 सकवाडं पण्डुरुल्लोवं मणसा यि न पत्थए ॥ ४ ॥
 इन्दियाणि उ भिक्खुस्स तारिसम्मि उवस्सए ।
 दुक्कराई निवारेउं कामरागविवद्दणे ॥ ५ ॥

सुसाणे सुन्नगारे वा रुक्खमूले व पक्कओ ।
 पइरिक्के परकडे वा वासं तत्थऽभिरोयए ॥ ६ ॥
 फासुयम्मि अणावाहे इत्थीहिं अणभिदुए ।
 तत्थ संकप्पए वासं भिक्खू परमसंजए ॥ ७ ॥
 न सयं गिहाइं कुविज्जा णेव अञ्जेहिं कारण ।
 गिहकम्मसमारम्भे भूयाणं दिस्सए वहो ॥ ८ ॥
 तसाणं थावराणं च सुदुमाणं बायराण य ।
 तम्हा गिहसमारम्भं संजओ परिवज्जए ॥ ९ ॥
 तहेव भत्तपाणेसु पयणे पयावणेसु य ।
 पाणभूयव्यट्ठाए न पये न पयावए ॥ १० ॥
 जलधन्ननिस्सिया जीवा पुढवीकट्टनिस्सिया ।
 हम्मन्ति भत्तपाणेसु तम्हा भिक्खू न पयावए ॥ ११ ॥
 विसप्पे सव्वओधारे बहुपाणविणासणे ।
 नत्थि जोइसमे सत्थे तम्हा जोइं न वीवए ॥ १२ ॥
 हिरणं जायख्वं च मणसा वि न पत्थए ।
 समलेट्टुकंचणे भिक्खू विरए कयविक्रए ॥ १३ ॥
 किणन्तो कइओ होइ विक्किणन्तो य वाणिओ ।
 कयविक्रयम्मि वट्टन्तो भिक्खू न भवइ तारिसो ॥ १४ ॥
 भिक्खियव्वं न केयव्वं भिक्खुणा भिक्खवित्तिणा ।
 कयविक्रओ महावोसो भिक्खवित्ती सुहावहा ॥ १५ ॥
 समुयाणं उल्लमेसिज्जा जहासुत्तमणिन्दियं ।
 लाभालाभम्मि संतुट्ठे पिण्डवायं चरे मुणी ॥ १६ ॥
 अलोले न रसे गिद्धे जिह्मादन्ते अमुच्छिणए ।
 न रसट्ठाए भुंजिज्जा जवणट्ठाए महामुणी ॥ १७ ॥
 अच्चणं रयणं चेव वन्दणं पूयणं तहा ।
 इड्ढीसक्कारसम्माणं मणसा वि न पत्थए ॥ १८ ॥
 सुक्कं ज्ञाणं झियाएज्जा अणियाणे अर्किचणे ।
 वोसट्टकाए विहरेज्जा जाव कालस्स पज्जओ ॥ १९ ॥
 निज्जुहिऊण आहारं कालधम्मे उवट्ठिए ।
 जहिऊण माणुसं बोन्दिं पट्ट पुक्खा विमुच्चइ ॥ २० ॥

निम्ममे निरहंकारे वीयरामो अणासवो ।
संपत्तो केवलं नाणं सासयं परिणिब्बुडे ॥ ११ ॥ त्ति वेमि ॥

॥ अणमारज्जयणं समत्तं ॥ ३५ ॥

॥ जीवाजीवविमत्ती षट्त्रिंशं अध्ययनम् ॥ ३६ ॥

जीवाजीवविमत्तिं सुणेह मे एगमणा हओ ।
जं जाणिऊण भिक्खुं सम्मं जयह संजमे ॥ १ ॥
जीवा चेव अजीवा य एस लोए वियाहिण ।
अजीवदेसमागासे अलोमे से वियाहिण ॥ २ ॥
द्ववओ खेतओ चेव कालओ भावओ तथा ।
परूवणा तेसि भवे जीवाणमजीवाण य ॥ ३ ॥
रूविणो चेवऽरूवी य अजीवा दुविहा भवे ।
अरूवी दसहा वुत्ता रूविणो य चउन्विहा ॥ ४ ॥
धम्मत्थिकाए तहेसे तप्पएसे य आहिण ।
अहम्मे तस्स देसे य तप्पएसे य आहिण ॥ ५ ॥
आगासे तस्स देसे य तप्पएसे य आहिण ।
अद्धासमए चेव अरूवी दसहा भवे ॥ ६ ॥
धम्माधम्मे य वो चेव लोगमिन्ता वियाहिया ।
लोगालोमे य आगासे समए समयखेत्तिण ॥ ७ ॥
धम्माधम्मागासा तिप्पि वि एए अणाइया ।
अपज्जवसिया चेव सव्वद्वं तु वियाहिया ॥ ८ ॥
समए वि सन्तइं पप्प एवमेव वियाहिण ।
आएसं पप्प सारिए सपज्जवसिए वि य ॥ ९ ॥
खन्धा य खन्धवेसा य तप्पएसा तहेव य ।
परमाणुणो य बोद्ध्वा रूविणो य चउन्विहा ॥ १० ॥
एगत्तेण पुहत्तेण खन्धा य परमाणुणो ।
लोएगदेसे लोए य भइयव्वा ते उ खेतओ ॥

इत्तो कालविभागं तु तेसिं वुच्छं च उम्बिहं ॥ ११ ॥

संतहं पप्प तेऽण्णार्ह अपज्जवसिया वि य ।

ठिई पडुच्च सार्हया सपज्जवसिया वि य ॥ १२ ॥

असंखकालमुक्कोसं एक्को समओ जहन्नयं ।

अजीवाण य रुव्वाणं ठिई एसा वियाहिया ॥ १३ ॥

अणन्तकालमुक्कोसमेक्को समओ जहन्नयं ।

अजीवाण य रुव्वाण अन्तरेयं वियाहियं ॥ १४ ॥

वण्णओ गन्धओ चेव रसओ फासओ तथा ।

संठाणओ य विस्सेओ परिणामो तेसि पंचहा ॥ १५ ॥

वण्णओ परिणया जे उ पंचहा ते पकित्तिया ।

किण्हा नीला य लोहिया हालिदा सुक्खिला तथा ॥ १६ ॥

गन्धओ परिणया जे उ इविहा ते वियाहिया ।

सुब्भिगन्धपरिणामा इब्भिगन्धा तहेव य ॥ १७ ॥

रसओ परिणया जे उ पंचहा ते पकित्तिया ।

तिक्तकडुयकसाया अब्बिला मङ्गुरा तथा ॥ १८ ॥

फासओ परिणया जे उ अट्टहा ते पकित्तिया ।

कक्खलडा मउया चेव गरुया लहुया तथा ॥ १९ ॥

सीया उण्हा य निद्धा य तथा लुक्खा य आहिया ।

इय फासपरिणया एए पुग्गला समुदाहिया ॥ २० ॥

संठाणपरिणया जे उ पंचहा ते पकित्तिया ।

परिमण्डला य वट्ठा व तंसा चउरंसमायया ॥ २१ ॥

वण्णओ जे भवे किण्हे भइए से उ गन्धओ ।

रसओ फासओ चेव भइए संठाणओ वि य ॥ २२ ॥

वण्णओ जे भवे नीले भइए से उ गन्धओ ।

रसओ फासओ चेव भइए संठाणओ वि य ॥ २३ ॥

वण्णओ लोहिण जे उ भइए से उ गन्धओ ।

रसओ फासओ चेव भइए संठाणओ वि य ॥ २४ ॥

वण्णओ पीयण जे उ भइए से उ गन्धओ ।

रसओ फासओ चेव भइए संठाणओ वि य ॥ २५ ॥

વળ્ણઓ સુક્કિલે જે ઉ મહિય સે ઉ ગન્ધઓ ।
 રસઓ ફાસઓ ચેવ મહિય સંઠાણઓ વિ ય ॥ ૨૬ ॥
 ગન્ધઓ જે ભવે સુઘ્મી મહિય સે ઉ વળ્ણઓ ।
 રસઓ ફાસઓ ચેવ મહિય સંઠાણઓ વિ ય ॥ ૨૭ ॥
 ગન્ધઓ જે ભવે દુઘ્મી મહિય સે ઉ વળ્ણઓ ।
 રસઓ ફાસઓ ચેવ મહિય સંઠાણઓ વિ ય ॥ ૨૮ ॥
 રસઓ તિત્તય જે ઉ મહિય સે ઉ વળ્ણઓ ।
 ગન્ધઓ ફાસઓ ચેવ મહિય સંઠાણઓ વિ ય ॥ ૨૯ ॥
 રસઓ કઢુય જે ઉ મહિય સે ઉ વળ્ણઓ ।
 ગન્ધઓ ફાસઓ ચેવ મહિય સંઠાણઓ વિ ય ॥ ૩૦ ॥
 રસઓ કસાંય જે ઉ મહિય સે ઉ વળ્ણઓ ।
 ગન્ધઓ ફાસઓ ચેવ મહિય સંઠાણઓ વિ ય ॥ ૩૧ ॥
 રસઓ અમ્બિલે જે ઉ મહિય સે ઉ વળ્ણઓ ।
 ગન્ધઓ ફાસઓ ચેવ મહિય સંઠાણઓ વિ ય ॥ ૩૨ ॥
 રસઓ મહુરય જે ઉ મહિય સે ઉ વળ્ણઓ ।
 ગન્ધઓ ફાસઓ ચેવ મહિય સંઠાણઓ વિ ય ॥ ૩૩ ॥
 ફાસઓ કક્કલ્લે જે ઉ મહિય સે ઉ વળ્ણઓ ।
 ગન્ધઓ રસઓ ચેવ મહિય સંઠાણઓ વિ ય ॥ ૩૪ ॥
 ફાસઓ મડય જે ઉ મહિય સે ઉ વળ્ણઓ ।
 ગન્ધઓ રસઓ ચેવ મહિય સંઠાણઓ વિ ય ॥ ૩૫ ॥
 ફાસઓ ગુરુય જે ઉ મહિય સે ઉ વળ્ણઓ ।
 ગન્ધઓ રસઓ ચેવ મહિય સંઠાણઓ વિ ય ॥ ૩૬ ॥
 ફાસઓ લહુય જે ઉ મહિય સે ઉ વળ્ણઓ ।
 ગન્ધઓ રસઓ ચેવ મહિય સંઠાણઓ વિ ય ॥ ૩૭ ॥
 ફાસઓ સીયય જે ઉ મહિય સે ઉ વળ્ણઓ ।
 ગન્ધઓ રસઓ ચેવ મહિય સંઠાણઓ વિ ય ॥ ૩૮ ॥
 ફાસઓ ઝળ્લય જે ઉ મહિય સે ઉ વળ્ણઓ ।
 ગન્ધઓ રસઓ ચેવ મહિય સંઠાણઓ વિ ય ॥ ૩૯ ॥
 ફાસઓ નિદ્ધય જે ઉ મહિય સે ઉ વળ્ણઓ ।
 ગન્ધઓ રસઓ ચેવ મહિય સંઠાણઓ વિ ય ॥ ૪૦ ॥

फासओ लुक्खए जे उ भइए से उ वण्णओ ।
 गन्धओ रसओ चेव भइए संठाणओ वि य ॥ ४१ ॥
 परिमण्डलसंठाणे भइए से उ वण्णओ ।
 गन्धओ रसओ चेव भइए फासओ वि य ॥ ४२ ॥
 संठाणओ भवे वट्ठे भइए से उ वण्णओ ।
 गन्धओ रसओ चेव भइए फासओ वि य ॥ ४३ ॥
 संठाणओ भवे तंसे भइए से उ वण्णओ ।
 गन्धओ रसओ चेव भइए फासओ वि य ॥ ४४ ॥
 संठाणओ भवे चउरंसे भइए से उ वण्णओ ।
 गन्धओ रसओ चेव भइए फासओ वि य ॥ ४५ ॥
 जे आययसंठाणे भइए से उ वण्णओ ।
 गन्धओ रसओ चेव भइए फासओ वि य ॥ ४६ ॥
 एसा अजीवविभत्ती समासेण वियाहिया ।
 इत्तो जीवविभत्तिं वुच्छामि अणुपुब्बसो ॥ ४७ ॥
 संसारत्था य सिद्धा य इविहा जीवा वियाहिया ।
 सिद्धा णेगविहा वुत्ता तं मे किञ्चयओ सुण ॥ ४८ ॥
 इत्थी पुरिससिद्धा य तहेव य नपुंसगा ।
 सल्लिगे अन्नल्लिगे य गिहिल्लिगे तहेव य ॥ ४९ ॥
 उक्कोसोगाहणाए य जहन्नमज्झिमाइ य ।
 उट्ठं अहे य तिरियं च समुद्धम्मि जलम्मि य ॥ ५० ॥
 वस य नपुंसएसुं वीसं इत्थियासु य ।
 पुरिसेसु य अट्टसयं समएणेगेण सिज्झई ॥ ५१ ॥
 चत्तारि य गिहिल्लिगे अन्नल्लिगे वसेव य ।
 सल्लिगेण अट्टसयं समएणेगेण सिज्झई ॥ ५२ ॥
 उक्कोसोगाहणाए य सिज्झन्ते जुगवं दुवे ।
 चत्तारि जहन्नाए मज्झे अटुत्तरं सयं ॥ ५३ ॥
 चउरुट्ठलोए य दुवे समुद्धे तओ जलं वीसमहे तहेव य ।
 सयं च अटुत्तर तिरियलोए समएणेगेण सिज्झई धुवं ॥ ५४ ॥
 कहिं पडिहया सिद्धा कहिं सिद्धा पइट्ठिया ।
 कहिं बोन्दि अइत्ताणं कत्थ मन्तूण सिज्झई ॥ ५५ ॥

अलोप पडिहया सिद्धा लोयगे य पडिट्टिया ।
 इहं बोन्दि चइत्ताणं तत्थ गन्तूण सिज्झई ॥ ५६ ॥
 बारसहिं जोयणेहिं सव्वट्टस्सुवरिं भवे ।
 ईसीपब्भारनामा उ पुढवी छत्तसंठिया ॥ ५७ ॥
 पणयालसयसहस्सा जोयणाणं तु आयया ।
 तावइयं चेव वित्थिण्णा तिगुणो साहियपरिरओ ॥ ५८ ॥
 अट्टजोयणबाहुल्ला सा मज्झमि वियाहिया ।
 परिहायन्ती चरिमन्ते मच्छियपत्ताओ तणुयरी ॥ ५९ ॥
 अज्जुणसुवण्णगमई सा पुढवी निम्मला सहावेणं ।
 उत्ताणगच्छत्तगसंठिया य मणिया जिणवरेहिं ॥ ६० ॥
 संसंककुन्दसंकासा पण्डुरा निम्मला सुहा ।
 सीयाए जोयणे तत्तो लोयन्तो उ वियाहिओ ॥ ६१ ॥
 जोयणस्स उ जो तत्थ कोसो उवरिमो भवे ।
 तस्स कोसस्स छब्भाए सिद्धाणोगाहणा भवे ॥ ६२ ॥
 तत्थ सिद्धा महाभागा लोग्गमि पडिट्टिया ।
 भवप्पवंचओ मुक्का सिद्धि वरगई गया ॥ ६३ ॥
 उस्सेहो जस्स जो होइ भवमि चरिममि उ ।
 तिभागहीणा तत्तो य सिद्धाणोगाहणा भवे ॥ ६४ ॥
 एगत्तेण साईया अपज्जवसिया वि य ।
 पुहत्तेण अण्णईया अपज्जवसिया वि य ॥ ६५ ॥
 अरूविणो जीवघणा नाणदंसणसन्निया ।
 अउलं सुहं संपत्ता उवमा जस्स नत्थि उ ॥ ६६ ॥
 लोगेगदेसे ते सव्वे नाणदंसणसन्निया ।
 संसारपासनित्थिण्णा सिद्धि वरगई गया ॥ ६७ ॥
 संसारत्था उ जे जीवा डुविहा ते वियाहिया ।
 तसा य थावरा चेव थावरा तिंविहा तहिं ॥ ६८ ॥
 पुढवी आउजीवा य तहेव य वणस्सई ।
 इच्चेए थावरा तिंविहा तेसिं भेए सुणेह मे ॥ ६९ ॥
 डुविहा पुढवीजीवा सुहुमा चायरा तहा ।
 पज्जत्तमपज्जत्ता एवमेए डुहा पुणो ॥ ७० ॥

बायरा जे उ पज्जत्ता दुविहा-ते वियाहिया ।
 सण्हा खरा य बोद्ध्वा सण्हा सत्ताविहा तहिं ॥ ७१ ॥
 किण्हा नीला य रुहिरा य हालिद्वा सुक्किला तहा ।
 पण्डुपणगमट्ठिया खरा छत्तीसईविहा ॥ ७२ ॥
 पुढवी य सक्करा बालुया य उवले सिला य लोणूसे ।
 अय-तउय-तम्ब-सीसग-रुप्प-सुवण्णे य वईरे य ॥ ७३ ॥
 हरियाले हिंशुलए मणोसिला सासगंजण-पवाले ।
 अब्भपडलऽब्भवालुय बायरकाए मणिविहाणे ॥ ७४ ॥
 गोमेज्जए य रुयगे अंके फलिहे य लोहियक्खे य ।
 मरगय-मसारगळे भुयमोयग-इन्दनीले य ॥ ७५ ॥
 चन्दण-गेरुय-हंसगम्भे पुलए सोगन्धिए य बोद्धत्वे ।
 चन्दप्पह-वेरुलिए जलकन्ते सूरकन्ते य ॥ ७६ ॥
 एए खरपुढवीए भेया छत्तीसमाहिया ।
 एगविहमणाणत्ता सुहुमा तत्थ वियाहिया ॥ ७७ ॥
 सुहुमा सव्वलोगम्मि लोग्गसे य बायरा ।
 इत्तो कालविभागं तु तेसिं वुच्छं चउन्विहं ॥ ७८ ॥
 संतई पप्पऽणार्इया अपज्जवसिया वि य ।
 ठिईं पडुच्च सार्इया सपज्जवसिया वि य ॥ ७९ ॥
 बावीससहस्साईं वासाणुक्कोसिया भवे ।
 आउठिईं पुढवीणं अन्तोमुहुत्तं जहन्निया ॥ ८० ॥
 असंखकालमुक्कोसं अन्तोमुहुत्तं जहन्नयं ।
 कायठिईं पुढवीणं तं कायं तु अमुंचओ ॥ ८१ ॥
 अणन्तकालमुक्कोसं अन्तोमुहुत्तं जहन्नयं ।
 विजट्ठमि सए काए पुढवीजीवाण अन्तरं ॥ ८२ ॥
 एणसिं वण्णओ चेव गन्धओ रसफासओ ।
 संठाणदेसओ वावि विहाणाईं सहस्सओ ॥ ८३ ॥
 दुविहा आउजीवा उ सुहुमा बायरा तहा ।
 पज्जत्तमपज्जत्ता एवमेए दुहा पुणो ॥ ८४ ॥
 बायरा जे उ पज्जत्ता पंचहा ते पकित्तिया ।
 सुद्धादए य उस्से हरतणू महिया हिमे ॥ ८५ ॥

एगविहमणाणत्ता सुहुमा तत्थ वियाहिया ।
 सुहुमा सव्वलोगम्मि लोगदेसे य बायरा ॥ ८६ ॥
 सन्तई पप्पण्णाईया अपज्जवसिया वि य ।
 ठिई पडुच्च सार्इया सपज्जवसिया वि य ॥ ८७ ॥
 सत्तेव सहस्साई वासाणुकोसिया मवे ।
 आउट्ठिई आऊणं अन्तोमुहुत्तं जहच्चिया ॥ ८८ ॥
 असंखकालमुक्कोसं अन्तोमुहुत्तं जहच्चयं ।
 कायट्ठिई आऊणं तं कायं तु अमुंचओ ॥ ८९ ॥
 अणन्तकालमुक्कोसं अन्तोमुहुत्तं जहच्चयं ।
 विजडंमि सए काए आऊजीवाण अन्तरं ॥ ९० ॥
 एएसि वण्णओ चेव मच्चओ रसफासओ ।
 संठाणवेसओ वाचि विहाणाई सहस्सओ ॥ ९१ ॥
 बुविहा वणस्सईजीवा सुहुमा बायरा तहा ।
 पज्जत्तमपज्जत्ता एवमेए बुहा पुणो ॥ ९२ ॥
 बायरा जे उ पज्जत्ता बुविहा ते वियाहिया ।
 साहारणसरीरा य पत्तेगा य तहेव य ॥ ९३ ॥
 पत्तेगसरीरा उ जेगहा ते पकित्तिचा ।
 रुक्खा गुच्छा य गुम्मा य लया वल्ली तणा तहा ॥ ९४ ॥
 वलया पव्वमा कुहुणा जलरुहा ओसही तहा ।
 हरियकाया य बोद्धव्वा पत्तेगाई वियाहिया ॥ ९५ ॥
 साहारणसरीरा उ जेगहा ते पकित्तिचा ।
 आलुए मूलए चेव सिंगवेरे तहेव य ॥ ९६ ॥
 हरिली सिरिली सस्सिरिली जावई केयकन्दली ।
 पलण्डुलसणकन्दे य कन्दली य कुडुंबए ॥ ९७ ॥
 लोहिणीहू य थीहू य कुहगा य तहेव य ।
 कन्दे य वज्जकन्दे य कन्दे सूरणए तहा ॥ ९८ ॥
 अस्सकण्णी य बोद्धव्वा सीहकण्णी तहेव य ।
 मुसुण्डी य हलिहा यऽजेगहा एवमायओ ॥ ९९ ॥
 एगविहमणाणत्ता सुहुमा तत्थ वियाहिया ।
 सुहुमा सव्वलोगम्मि लोगदेसे य बायरा ॥ १०० ॥

संतई पप्पऽणार्इया अपज्जवसिया वि य ।
 ठिई पडुच्च सार्इया सपज्जवसिया वि य ॥ १०१ ॥
 वस चेव सहस्साई वासाणुकोसिया भवे ।
 वणप्फईण आउं अन्तोमुहुत्तं जहन्नयं ॥ १०२ ॥
 अणन्तकालमुक्कोसं अन्तोमुहुत्तं जहन्नयं ।
 कायट्ठिई पण्णाणं तं कायं तु अमुंचओ ॥ १०३ ॥
 असंखकालमुक्कोसं अन्तोमुहुत्तं जहन्नयं ।
 विजढमि सए काए पणमजीवाण अन्तरं ॥ १०४ ॥
 एणसिं वण्णओ चेव गन्धओ रसफासओ ।
 संठाणवेसओ वावि विहाणाई सहस्ससो ॥ १०५ ॥
 इच्चए थावरा तिविहा समासेण वियाहिया ।
 इत्तो उ तसे तिविहे बुच्छामि अणुपुव्वसो ॥ १०६ ॥
 तेऊ वाऊ य बोद्धवा उराला य तसा तहा ।
 इच्चए तसा तिविहा तेसिं भेए सुणंह मे ॥ १०७ ॥
 दुविहा तेउजीवा उ सुहुमा बायरा तहा ।
 पज्जत्तमपज्जत्ता एवमेए इहा पुणो ॥ १०८ ॥
 बायरा जे उ पज्जत्ता णेगहा ते वियाहिया ।
 इंगाले मुम्मुरे अगणी अच्चिं जाला तहेव य ॥ १०९ ॥
 उक्का विज्जू य बोद्धवा णेगहा एवमायओ ।
 एगविहमणाणत्ता सुहुमा ते वियाहिया ॥ ११० ॥
 सुहुमा सव्वलोगम्मि लोमवेसे य बायरा ।
 इत्तो कालविभागं तु तेसिं बुच्छं चउव्विहं ॥ १११ ॥
 संतई पप्पऽणार्इया अपज्जवसिया वि य ।
 ठिई पडुच्च सार्इया सपज्जवसिया वि य ॥ ११२ ॥
 तिण्णेव अहोरत्ता उक्कोसेण वियाहिया ।
 आउट्ठिई तेऊणं अन्तोमुहुत्तं जहन्निया ॥ ११३ ॥
 असंखकालमुक्कोसं अन्तोमुहुत्तं जहन्नयं ।
 कायट्ठिई तेऊणं तं कायं तु अमुंचओ ॥ ११४ ॥
 अणन्तकालमुक्कोत्तं अन्तोमुहुत्तं जहन्नयं ।
 विजढमि सए काए तेउजीवाण अन्तरं ॥ ११५ ॥

एणसि वण्णओ चेव गन्धओ रसफासओ ।
 संठाणदेसओ वावि विहाणाइं सहस्ससो ॥ ११६ ॥
 इविहा वाउजीवा उ सुहुमा बायरा तहा ।
 पज्जत्तमपज्जत्ता एवमेव इहा पुणो ॥ ११७ ॥
 बायरा जे उ पज्जत्ता पंचहा ते पकित्तिया ।
 उक्कलिया-मण्डलिया-घण-गुंजा सुद्ध-वाया य ॥ ११८ ॥
 संवट्ठगवाया यऽणेगहा एवमायओ ।
 एगविहमण्णत्ता सुहुमा तत्थ वियाहिया ॥ ११९ ॥
 सुहुमा सत्त्वलोगम्मि एगदेसे य बायरा ।
 इत्तो कालविभागं तु तेसि वुच्छं चउव्विहं ॥ १२० ॥
 संतइं पप्पऽणाइया अपज्जवसिया वि य ।
 ठिइं पडुच्च सार्इया सपज्जवसिया वि य ॥ १२१ ॥
 तिण्णेव सहस्साइं वासाणुक्कोसिया मवे ।
 आउट्ठिइं वाऊणं अन्तोमुहुत्तं जहन्निया ॥ १२२ ॥
 असंखकालमुक्कोसं अन्तोमुहुत्तं जहन्नयं ।
 कायट्ठिइं वाऊणं तं कायं तु अमुंचओ ॥ १२३ ॥
 अणन्तकालमुक्कोसं अन्तोमुहुत्तं जहन्नयं ।
 विजदंमि सए काए वाउजीवाण अन्तरं ॥ १२४ ॥
 एणसि वण्णओ चेव गन्धओ रसफासओ ।
 संठाणदेसओ वावि विहाणाइं सहस्ससो ॥ १२५ ॥
 ओराला तसा जे उ चउहा ते पकित्तिया ।
 बेइन्दिय-तेइन्दिय-चउसे-पंचिन्दिया चेव ॥ १२६ ॥
 बेइन्दिया उ जे जीवा इविहा ते पकित्तिया ।
 पज्जत्तमपज्जत्ता तेसि भेए सुणेह मे ॥ १२७ ॥
 किमिणो सोमंगला चेव अलसा माइवाहया ।
 वासीमुहा य सिप्पीया संखा संखणम तहा ॥ १२८ ॥
 पल्लोयाणुल्लया चेव तहेव य वराडगा ।
 जल्लगा जालगा चेव चन्दणा य तहेव य ॥ १२९ ॥
 इइ बेइन्दिया एए णेमहा एवमायओ ।
 लोगेगदेसे ते सत्त्वे न सव्वत्थ वियाहिया ॥ १३० ॥

संतईं पप्पऽणार्इया अपज्जवसिया वि य ।
 ठिईं पडुच्च सार्इया सपज्जवसिया वि य ॥ १३१ ॥
 वासाईं बारसा चेव उक्कोसेण वियाहिया ।
 वेइन्दियआउठिईं अन्तोमुहुत्तं जहन्निया ॥ १३२ ॥
 संखिज्जकालमुक्कोसं अन्तोमुहुत्तं जहन्नयं ।
 वेइन्दियकायठिईं तं कायं तु अमुंचओ ॥ १३३ ॥
 अणन्तकालमुक्कोसं अन्तोमुहुत्तं जहन्नयं ।
 वेइन्दियजीवाणं अन्तरं च वियाहियं ॥ १३४ ॥
 एणसिं वण्णओ चेव गन्धओ रसफासओ ।
 संठाणदेसओ वावि विहाणाईं सहस्ससो ॥ १३५ ॥
 तेइन्दिया उ जे जीवा इविहा ते पकित्तिया ।
 पज्जत्तमपज्जत्ता तेसिं भेए सुणेह मे ॥ १३६ ॥
 कुन्थुपिवील्लिउडुंसा उक्कलुद्देहिया तहा ।
 तणहारकट्टहारा य मालुरा पत्तहारगा ॥ १३७ ॥
 कप्पासऽट्ठिमिजा य न्तिदुगा तउसमिजगा ।
 सदावरी य गुम्मी य बोद्धवा इन्दगाइया ॥ १३८ ॥
 इन्दगोवगमाईया णेगहा एवमायओ ।
 लोगेगदेसे ते सव्वे न सव्वत्थ वियाहिया ॥ १३९ ॥
 संतईं पप्पऽणार्इया अपज्जवसिया वि य ।
 ठिईं पडुच्च सार्इया सपज्जवसिया वि य ॥ १४० ॥
 एगूणपण्णऽहोरत्ता उक्कोसेण वियाहिया ।
 तेइन्दियआउठिईं अन्तोमुहुत्तं जहन्निया ॥ १४१ ॥
 संखिज्जकालमुक्कोसं अन्तोमुहुत्तं जहन्नयं ।
 तेइन्दियकायठिईं तं कायं तु अमुंचओ ॥ १४२ ॥
 अणन्तकालमुक्कोसं अन्तोमुहुत्तं जहन्नयं ।
 तेइन्दियजीवाणं अन्तरेयं वियाहियं ॥ १४३ ॥
 एणसिं वण्णओ चेव गन्धओ रसफासओ ।
 संठाणदेसओ वावि विहाणाईं सहस्ससो ॥ १४४ ॥
 चउरिन्दिया उ जे जीवा इविहा ते पकित्तिया ।
 पज्जत्तमपज्जत्ता तेसिं भेए सुणेह मे ॥ १४५ ॥

अन्धिया पोत्तिया चेव मच्छिया मसगा तथा ।
 भमरे कीडपयंगे य ढिकुणे कुंकुणे तथा ॥ १४६ ॥
 कुक्कुडे भिंगिरीडी य नन्दावत्ते य विछिण ।
 टोले भिंगारी य विरली अच्छियेहण ॥ १४७ ॥
 अच्छिले माहण अच्छिरोडण विन्नित्ते चित्तपत्तण ।
 ओर्हिजलिया जलकारी य नीया तन्तवयाइया ॥ १४८ ॥
 इय चउरिन्दिया एण ऽणगहा एवमायओ ।
 लोगेगदेसे ते सत्वे न सव्वत्थ वियाहिया ॥ १४९ ॥
 संतई पप्पऽणार्इया अपज्जवसिया वि य ।
 ठिई पडुच्च सार्इया सपज्जवसिया वि य ॥ १५० ॥
 छच्चेव य मासा उ उक्कोसेण वियाहिया ।
 चउरिन्दिय-आउठिई अन्तोमुहुत्तं जहन्निया ॥ १५१ ॥
 संखिज्जकालमुक्कोसं अन्तोमुहुत्तं जहन्नयं ।
 चउरिन्दिय-कायठिई तं कायं तु अमुंचओ ॥ १५२ ॥
 अणन्तकालमुक्कोसं अन्तोमुहुत्तं जहन्नयं ।
 चउरिन्दियजीवाणं अन्तरेयं वियाहियं ॥ १५३ ॥
 एएसिं वण्णओ चेव गन्धओ रसफासओ ।
 संठाणदेसओ वावि विहाणाइं सहस्ससो ॥ १५४ ॥
 पंचिन्दिया उ जे जीवा चउव्विहा ते वियाहिया ।
 नेरइयतिरिक्खा य मणुया देवा य आहिया ॥ १५५ ॥
 नेरइया सत्तविहा पुढवीसु सत्तसू भवे ।
 रयणाभसक्कराभा वालुयाभा य आहिया ॥ १५६ ॥
 पंकाभा धूमाभा तमा तमतमा तथा ।
 इइ नेरइया एण सत्तहा परिकित्तिया ॥ १५७ ॥
 लोगस्स एगदेसम्मि ते सत्वे उ वियाहिया ।
 एत्तो कालविभागं तु वोच्छं तेसिं चउव्विहं ॥ १५८ ॥
 संतई पप्पऽणार्इया अपज्जवसिया वि य ।
 ठिई पडुच्च सार्इया सपज्जवसिया वि य ॥ १५९ ॥
 सागरोवममेगं तु उक्कोसेण वियाहिया ।
 पढमाण जहन्नेणं दसवाससहस्सिया ॥ १६० ॥

तिण्णेव सागरा ऊ उक्कोसेण वियाहिया ।
 दोच्चाए जहन्नेण एगं तु सागरोवमं ॥ १६१ ॥
 सत्तेव सागरा ऊ उक्कोसेण वियाहिया ।
 तइयाए जहन्नेण तिण्णेव सागरोवमा ॥ १६२ ॥
 दस सागरोवमा ऊ उक्कोसेण वियाहिया ।
 चउत्थीए जहन्नेण सत्तेव सागरोवमा ॥ १६३ ॥
 सत्तरस सागरा ऊ उक्कोसेण वियाहिया ।
 पंचमाए जहन्नेण दस चेव सागरोवमा ॥ १६४ ॥
 बावीस सागरा ऊ उक्कोसेण वियाहिया ।
 छट्ठीए जहन्नेण सत्तरस सागरोवमा ॥ १६५ ॥
 तेत्तीस सागरा ऊ उक्कोसेण वियाहिया ।
 सत्तमाए जहन्नेण बावीस सागरोवमा ॥ १६६ ॥
 जा चेव य आउठिई नेरइयाणं वियाहिया ।
 सा तेसि कायुठिई जहन्नुकोसिया भवे ॥ १६७ ॥
 अणन्तकालमुक्कोसं अन्तोमुहुत्तं जहन्नयं ।
 विजडंमि सए काए नेरइयाणं अन्तरं ॥ १६८ ॥
 एणसिं वण्णओ चेव गन्धओ रसफासओ ।
 संठाणवेसओ वावि विहाणाइं सहस्ससो ॥ १६९ ॥
 पंचिन्दियतिरिक्खाओ दुविहा ते वियाहिया ।
 सम्मुच्छिमतिरिक्खाओ गम्भवक्कन्तिया तहा ॥ १७० ॥
 दुविहा ते भवे तिविहा जलयरा थलयरा तहा ।
 खहयरा य बोद्धव्वा तेसि भेए सुणेह मे ॥ १७१ ॥
 मच्छा य कच्छभा य गाहा य मगरा तहा ।
 सुंसुमारा य बोद्धव्वा पंचहा जलयराहिया ॥ १७२ ॥
 लोणगदेसे ते सव्वे न सव्वत्थ वियाहिया ।
 एत्तो कालाविभागं तु वोच्छं तेसि चउद्विहं ॥ १७३ ॥
 संतइं पप्पण्णाय्या अपज्जवसिया वि य ।
 ठिइं पडुच्च साइया सपज्जवसिया वि य ॥ १७४ ॥
 एगा य पुव्वकोडी उ उक्कोसेण वियाहिया ।
 आउठिई जलयराणं अन्तोमुहुत्तं जहन्निया ॥ १७५ ॥

पुव्वकोडीपुहुत्तं तु उक्कोसेण विद्याहिया ।
 कायट्ठिं जलयराणं अन्तोमुहुत्तं जहन्निया ॥ १७१ ॥
 अणन्तकालमुक्कोसं अन्तोमुहुत्तं जहन्नयं ।
 विजदंमि सप काप जलयराणं अन्तरं ॥ १७२ ॥
 एणसिं वण्णओ चेव गंधओ रसफासओ ।
 संठाणवेसओ वावि विहाणां सहस्ससो ॥ १७८ ॥
 चउप्पया य परिसप्पा इविहा थलयरा भवे ।
 चउप्पया चउविहा ते मे कित्तयओ सुण ॥ १७९ ॥
 एगखुरा इखुरा चेव गण्डीपयसणप्पया ।
 हयमाइगोणमाइगयमाइसीहमाइणो ॥ १८० ॥
 भुओरगपरिसप्पा य परिसप्पा इविहा भवे ।
 गोहाई अहिमाई य एक्केक्का जेगहा भवे ॥ १८१ ॥
 लोणगेसे ते सव्वे न सव्वत्थ विद्याहिया ।
 एत्तो कालविभागं तु वोच्छं तेसिं चउव्विहं ॥ १८२ ॥
 संतहं पप्पणाईया अपज्जवसिया वि य ।
 ठिं पडुच्च सार्इया सपज्जवसिया वि य ॥ १८३ ॥
 पलिओवमाई तिण्णि उ उक्कोसेण विद्याहिया ।
 आउट्ठिं थलयराणं अन्तोमुहुत्तं जहन्निया ॥ १८४ ॥
 पुव्वकोडीपुहुत्तेणं अन्तोमुहुत्तं जहन्निया ।
 कायट्ठिं थलयराणं अन्तरं तेसिमं भवे ॥ १८५ ॥
 कालमणन्तमुक्कोसं अन्तोमुहुत्तं जहन्नयं ।
 विजदंमि सप काप थलयराणं तु अन्तरं ॥ १८६ ॥
 चम्मे उ लोमपक्खी य तइया समुग्गपक्खिया ।
 विययपक्खी य बोद्ध्वा पक्खिणो य चउव्विहा ॥ १८७ ॥
 लोमगेसे ते सव्वे न सव्वत्थ विद्याहिया ।
 इत्तो कालविभागं तु वोच्छं तेसिं चउव्विहं ॥ १८८ ॥
 संतहं पप्पणाईया अपज्जवसिया वि य ।
 ठिं पडुच्च सार्इया सपज्जवसिया वि य ॥ १८९ ॥
 पलिओवमस्स भागो असंखेज्जइमो भवे ।
 आउट्ठिं थलयराणं अन्तोमुहुत्तं जहन्निया ॥ १९० ॥
 असंखभागो पलियस्स उक्कोसेण उ साहिओ ।
 पुव्वकोडीपुहुत्तेणं अन्तोमुहुत्तं जहन्निया ॥ १९१ ॥

कायटिई सहयराणं अन्तरं तेसिमं भवे ।
 कालं अणन्तमुक्कोसं अन्तोमुहुत्तं जहन्नयं ॥ १९२ ॥
 एणसिं वण्णओ चेव गन्धओ रसफासओ ।
 संठाणवेसओ वावि विहाणाईं सहस्ससो ॥ १९३ ॥
 मणुया दुविहमेया उ ते मे किन्तयओ सुण ।
 संमुच्छिमा य मणुया गवमवक्कन्तिया तहा ॥ १९४ ॥
 गवमवक्कन्तिया जे उ तिविहा ते वियाहिया ।
 अकम्मकम्मभूमा य अन्तरदीवया तहा ॥ १९५ ॥
 पन्नरस तीसविहा मेया अट्टवीसईं ।
 संखा उ कमसो तेसिं इह एसा वियाहिया ॥ १९६ ॥
 संमुच्छिमाण एसेव भेओ होइ वियाहिओ ।
 लोगस्स एगवेसम्मि ते सव्वे वि वियाहिया ॥ १९७ ॥
 संतईं पप्पड्जाईया अपज्जवसिया वि य ।
 ठिईं पडुच्च साईया सपज्जवसिया वि य ॥ १९८ ॥
 पलिओवमाईं तिण्णि उ असंखेज्जभो भवे ।
 आउट्ठिईं मणुयाणं अन्तोमुहुत्तं जहन्निया ॥ १९९ ॥
 पलिओवमाईं तिण्णि उ उक्कोसेण उ साहिया ।
 पुव्वकोडिपुहत्तेणं अन्तोमुहुत्तं जहन्निया ॥ २०० ॥
 कायट्ठिईं मणुयाणं अन्तरं तेसिमं भवे ।
 अणन्तकालमुक्कोसं अन्तोमुहुत्तं जहन्नयं ॥ २०१ ॥
 एणसिं वण्णओ चेव गन्धओ रसफासओ ।
 संठाणवेसओ वावि विहाणाईं सहस्ससो ॥ २०२ ॥
 देवा चउव्विहा वुत्ता ते मे किन्तयओ सुण ।
 मोमिज्ज-वाणमन्तर-जोइस-वेमाणिया तहा ॥ २०३ ॥
 इसहा भवणवासी अट्टहा वण्णचारिणो ।
 पंचविहा जोइसिया दुविहा वेमाणिया तहा ॥ २०४ ॥
 असुरा नागसुवण्णा विज्जू अग्गी वियाहिया ।
 दीवोदहिविसा वाया थणिया भवणवासिणो ॥ २०५ ॥
 पिसायभूया जक्खा य रक्खसा किन्नरा य किंपुरिसा ।
 महोरगा य गन्धवा अट्टविहा बाणमन्तरा ॥ २०६ ॥

चन्दा सूरु य नवखत्ता गहा तारागणा तहा ।
 दिसाविचारिणो चैव पंचहा जोइसालया ॥ २०७ ॥
 वेमाणिया उ जे देवा दुविहा ते वियाहिया ।
 कप्पोवगा य बोद्धवा कप्पाईया तहेव य ॥ २०८ ॥
 कप्पोवगा बारसहा सोहम्मीसाणगा तहा ।
 सर्णकुमारमाहिन्दा बम्भलोगा य लन्तगा ॥ २०९ ॥
 महासुक्का सहस्सारा आणया पाणया तहा ।
 आरणा अच्चुया चैव इइ कप्पोवगा सुरु ॥ २१० ॥
 कप्पाईया उ जे देवा दुविहा ते वियाहिया ।
 गेविज्जाऽणुत्तरा चैव गेविज्जा नवहा तहिं ॥ २११ ॥
 हेट्ठिमाहेट्ठिमा चैव हेट्ठिमामज्झिमा तहा ।
 हेट्ठिमाउवरिमा चैव मज्झिमाहेट्ठिमा तहा ॥ २१२ ॥
 मज्झिमामज्झिमा चैव मज्झिमाउवरिमा तहा ।
 उवरिमाहेट्ठिमा चैव उवरिमामज्झिमा तहा ॥ २१३ ॥
 उवरिमाउवरिमा चैव इय गेविज्जगा सुरु ।
 विजया वेजयन्ता य जयन्ता अपराजिया ॥ २१४ ॥
 सव्वत्थसिद्धगा चैव पंचहाऽणुत्तरा सुरु ।
 इय वेमाणिया एए णेगहा एवमायओ ॥ २१५ ॥
 लोगस्स एगदेसम्मि ते सव्वे वि वियाहिया ।
 इत्तो कालविभागं तु वोच्छं तेसिं चूउन्विहं ॥ २१६ ॥
 संतइं पप्पाऽणाईया अपज्जवसिया वि य ।
 ठिइं पडुच्च साईया सपज्जवसिया वि य ॥ २१७ ॥
 साहियं सागरं एक्कं उक्कोसेणं ठिइं भवे ।
 भोमेज्जाणं जहन्नेणं दसवाससहस्सिया ॥ २१८ ॥
 पलिओवममेगं तु उक्कोसेणं ठिइं भवे ।
 वन्तराणं जहन्नेणं दसवाससहस्सिया ॥ २१९ ॥
 पलिओवममेगं तु वासलक्खेण साहियं ।
 पलिओवमद्दुभागो जोइसेसु जहन्निया ॥ २२० ॥
 दो चैव सागरां उक्कोसेण वियाहिया ।
 सोहम्मंमि जहन्नेणं एगं च पलिओवमं ॥ २२१ ॥
 सागरा साहिया दुच्चि उक्कोसेणं वियाहिया ।
 ईसाणम्मि जहन्नेणं साहियं पलिओवमं ॥ २२२ ॥

सागराणि य सत्तेव उक्कोसेणं ठिई भवे ।
 सणंकुमारे जहन्नेणं दुक्कि ऊ सागरोवमा ॥ २२३ ॥
 साहिया सागरा सत्त उक्कोसेणं ठिई भवे ।
 माहिन्दम्मि जहन्नेणं साहिया दुक्कि सागरा ॥ २२४ ॥
 दस चेव सागराई उक्कोसेणं ठिई भवे ।
 वम्भलोए जहन्नेणं सत्त ऊ सागरोवमा ॥ २२५ ॥
 चउद्दस सागराई उक्कोसेणं ठिई भवे ।
 लन्तगम्मि जहन्नेणं दस ऊ सागरोवमा ॥ २२६ ॥
 सत्तरस सागराई उक्कोसेणं ठिई भवे ।
 महासुक्के जहन्नेणं चोद्दस सागरोवमा ॥ २२७ ॥
 अट्टारस सागराई उक्कोसेणं ठिई भवे ।
 सहस्सारे जहन्नेणं सत्तरस सागरोवमा ॥ २२८ ॥
 सागरा अउणवीसं तु उक्कोसेणं ठिई भवे ।
 आणयम्मि जहन्नेणं अट्टारस सागरोवमा ॥ २२९ ॥
 वीसं तु सागराई उक्कोसेणं ठिई भवे ।
 पाणयम्मि जहन्नेणं सागरा अउणवीसई ॥ २३० ॥
 सागरा इक्कवीसं तु उक्कोसेणं ठिई भवे ।
 आरणम्मि जहन्नेणं वीसई सागरोवमा ॥ २३१ ॥
 बावीसं सागराई उक्कोसेणं ठिई भवे ।
 अच्चुयम्मि जहन्नेणं सागरा इक्कवीसई ॥ २३२ ॥
 तेवीस सागराई उक्कोसेणं ठिई भवे ।
 पढमम्मि जहन्नेणं बावीसं सागरोवमा ॥ २३३ ॥
 चउवीस सागराई उक्कोसेणं ठिई भवे ।
 बिइयम्मि जहन्नेणं तेवीसं सागरोवमा ॥ २३४ ॥
 पणवीस सागराई उक्कोसेणं ठिई भवे ।
 तइयम्मि जहन्नेणं चउवीसं सागरोवमा ॥ २३५ ॥
 छव्वीस सागराई उक्कोसेणं ठिई भवे ।
 चउत्थम्मि जहन्नेणं सागरा पणुवीसई ॥ २३६ ॥
 सागरा सत्तवीसं तु उक्कोसेणं ठिई भवे ।
 पंचमम्मि जहन्नेणं सागरा उ छवीसई ॥ २३७ ॥
 सागरा अट्टवीसं तु उक्कोसेणं ठिई भवे ।
 छट्ठम्मि जहन्नेणं सागरा सत्तवीसई ॥ २३८ ॥

सागरा अउणतीसं तु उक्कोसेणं ठिई भवे ।
 सत्तमम्मि जहन्नेणं सागरा अट्टवीसई ॥ २३९ ॥
 तीसं तु सागराई उक्कोसेणं ठिई भवे ।
 अट्टमम्मि जहन्नेणं सागरा अउणतीसई ॥ २४० ॥
 सागरा इक्कतीसं तु उक्कोसेणं ठिई भवे ।
 नवमम्मि जहन्नेणं तीसई सागरोवमा ॥ २४१ ॥
 तेत्तीस सागराई उक्कोसेणं ठिई भवे ।
 चउसुं पि विजयाईसु जहन्नेणक्कतीसई ॥ २४२ ॥
 अजहन्नमणुक्कोसा तेत्तीसं सागरोवमा ।
 महाविमाणे सव्वट्ठे ठिई एसा वियाहिया ॥ २४३ ॥
 जा चेव य आउठिई देवाणं तु वियाहिया ।
 सा तेसिं कायठिई जहन्नमुक्कोसिया भवे ॥ २४४ ॥
 अणन्तकालमुक्कोसं अन्तोमुहुत्तं जहन्नयं ।
 विजट्ठमि सए काए देवाणं हुज्ज अन्तरं ॥ २४५ ॥
 एएसिं वण्णओ चेव गन्धओ रसफाससो ।
 संठाणदेसओ वावि विहाणाई सहस्सओ ॥ २४६ ॥
 संसारत्था य सिद्धा य इय जीवा वियाहिया ।
 रूविणो चेव रूवी य अजीवा दुविहा वि य ॥ २४७ ॥
 इय जीवमजीवे य सोच्चा सद्दहिऊण य ।
 सव्वनयाणं अणुमए रमेज्ज संजमे मुणी ॥ २४८ ॥
 तओ बहूणि वासाणि सामण्णमणुपालिया ।
 इमेण कम्मजोगेण अप्पाणं संलिहे मुणी ॥ २४९ ॥
 बारसेव उ वासाई संलेहुक्कोसिया भवे ।
 संवच्छरं मज्झिमिया छम्मासा य जहन्निया ॥ २५० ॥
 पढमे वासचउक्कमि विगई-निज्जूहणं करे ।
 बिइए वासचउक्कमि विचित्तं तु तवं चरे ॥ २५१ ॥
 एगन्तरमायामं कट्ठु संवच्छरे दुवे ।
 तओ संवच्छरद्धं तु नाइविगिट्ठं तवं चरे ॥ २५२ ॥
 तओ संवरच्छरद्धं तु विगिट्ठं तु तवं चरे ।
 परिमियं चेव आयामं तंमि संवच्छरे करे ॥ २५३ ॥
 कोडीसहियमायामं कट्ठु संवच्छरे मुणी ।
 मासद्ध-मासिएणं तु आहारेण तवं चरे ॥ २५४ ॥

कन्दप्पमाभिओगं च किब्बिसियं मोहमासुरत्तं च ।
 एयाउ दुग्गईओ मरणम्मि विराहिया होन्ति ॥ २५५ ॥
 मिच्छादंसणरत्ता सनियाणा उ हिंसगा ।
 इय जे मरन्ति जीवा तेसिं पुण दुल्लाहो बोही ॥ २५६ ॥
 सम्मदंसणरत्ता अनियाणा सुक्कलेसमोगाढा ।
 इय जे मरन्ति जीवा तेसिं सुल्लाहो भवे बोही ॥ २५७ ॥
 मिच्छादंसणरत्ता सनियाणा कण्हेल्लेसमोगाढा ।
 इय जे मरन्ति जीवा तेसिं पुण दुल्लाहो बोही ॥ २५८ ॥
 जिणवयणे अणुरत्ता जिणवयणं जे करेन्ति भवेण ।
 अमला असंकिलिद्धा ते होन्ति परित्तसंसारी ॥ २५९ ॥
 बालमरणाणि बहुसो अकाममरणाणि चेव य बहूणि ।
 मरिहिन्ति ते वराया जिणवयणं जे न जाणन्ति ॥ २६० ॥
 बहुआगमविज्ञाणा समाहिउप्पायगा य गुणगाही ।
 एएण कारणेणं अरिहा आलोयणं सोउं ॥ २६१ ॥
 कन्दप्प-कोक्कुर्याइं तह सील-सहाव-हसण-विगहाइं ।
 विम्हावेन्तो य परं कन्दप्पं भावणं कुणइ ॥ २६२ ॥
 मन्ताजोगं काउं भूईकम्मं च जे पउंजन्ति ।
 साय-रस-इड्डि-हेउं अभिओगं भावणं कुणइ ॥ २६३ ॥
 नाणस्स केवलीणं धम्मायरियस्स संघसाहूणं ।
 माई अवण्णवाई किब्बिसियं भावणं कुणइ ॥ २६४ ॥
 अणुबद्धरोसपससे तह य निमित्तामि होइ पडिसेवि ।
 एएहि कारणेहि आसुरियं भावणं कुणइ ॥ २६५ ॥
 सत्थग्गहणं विसभक्कवणं च जलणं च जलप्पवेसो य ।
 अणायारभण्डसेवा जम्मणमरणाणि बन्धन्ति ॥ २६६ ॥
 इइ पाउकरे बुद्धे नायए परिनिव्वुए ।
 छत्तीसं उत्तरज्झाए भवसिद्धीयसंमए ॥ २६७ ॥ त्ति बोमि

॥ जीवाजीवविभक्ती समत्ता ॥ ३९ ॥

॥ उत्तराध्ययनसूत्रं समाप्तम् ॥

